

ANG DIOS SA NIINING DAUTAN NGA KAPANAHONAN



[Nagaingon si Igsoong Neville, “Kini nga pahayag, human sa hiniusa nga pakigpulong sa hunta sa mga diyakono ug sa mga tinugyanan sa tabernakulo niadtong Biyernes sa gabii, ginabasa namo kini nga mga resolusyon nga nagapahinungod sa matag lalaki, sa matag babaye, nga giila nga sumusunod niini nga ministerio, nga buut makahibalo sa hunahuna sa board, sa pastor ug sa kaabag nga pastor. Ginabasa ko kining maong mga resolusyon niining buntaga. Ang matag usa magahatag og mainiton nga pagpaminaw ug pagtagad niini kutob sa inyong mahimo.” Ginabasa na ni Igsoong Neville ang mosunod nga mga resolusyon—Ed.]

[“Giuyonan kini nga mga resolusyon ug gipasa sa board sa mga trustee, ug sa mga diyakono nga dunay bug-os nga pag-uyon sa pastor ug sa kaabag nga pastor.]

[“Ang tanang mga teyp sa wali ni Rev. William Branham pagahimoon lamang ni Fred Sothmann, hangtud nga dunay pagtugot sa board. Dili namo ginaila niining higayona ang bisan unsang ministerio sa libre nga pagpanghimo og teyp. Kini nga mga teyp adunay prangkisya, ug nga dili puedeng kopyahon ni bisan kinsa man nga tawo gawas kang Fred Sothmann kon wala’y iyang sinulat nga permiso.]

[“Numero dos. Ang si kinsa man nga tawong magpahigayon og mga panagtigum, mamaligya og mga libro o mga teyp, magsulat og gagmay’ng mga basahon, manghatag og mga prayer cloth o mga kard sa bisan unsa nga matang, o mangayo’g mga amot, dili sila kabahin sa niini nga iglesia o sa pastor niini. Ginahimo nila kini nga nagpakaaron-ingnon lang, ug nga wala hatagi og awtoridad sa pagbuhat niana.]

[“Tres. Kini nga iglesia dili nagapadala og bisan kinsa nga mga ministro gawas lang sa pastor niini, nga si Rev. William Branham, aron magpahigayon og mga panerbisyo sa kung asa man.]

[“Ang mga hinungdan alang niining mga resolusyon mao ang mga mosunod:]

[“Miabot kini sa among pagtagad nga adunay mga ministro nga nagalibot sa tibuok nasud ug nagapahigayon og uban nga mga pagpakig-fellowship, nagaingon nga sila kono nahisakop, ug gipadala sa niining iglesia aron ipahigayon ang maong mga panagtigum.]

[“Miabot usab sa among pagtagad nga adunay mga tawo nga nagaprinta og mga kard ug mga gagmay’ng basahon, nagapadala og mga prayer cloth ug uban pa, nga daw sa gihatagan sila og katungod nga buhaton ang ingon-niini sa niining iglesia dinhi ug sa pastor niini, nga dili man tinuod. Pagapasalamatan gayud namo kini kung inyong ipahibalo sa iglesia ang si kinsa man nga tawo nga mahibaloan ninyo nga nagahimo niini.]

[“Kini nga mga resolusyon gibasa ug giaprobahan sa maong pastor nga si Rev. William Branham, kaabag nga pastor nga si Rev. Orman Neville, ug sa hunta sa mga tinugyanan ug sa mga diyakono.”]

[Nagaingon si Igsoong Neville, “Hinaut nga panalanginan kamo sa Ginoo.” Sa pagkagabii nga panerbisyo, 65-0801E, ginasulti ni Igsoong Branham kung giunsa paghimo sa maong hunta sa iglesia kini nga mga pag-desisyon. Blangko nga bahin sa teyp.]

Things are possible, only believe;
Only believe, only believe,
All things are possible, only . . .

Iduko nato ang atong ulo.

Minahal nga langitnong Amahan, mapasalamaton kami niining buntaga nga makahimo kaming motoo. Nahimo kining posible pinaagi sa giula nga Dugo sa Imong Anak, nga si Jesus, nga kami mamahimong umalambit sa Iyang grasya; ug nahimong mga anak nga lalaki ug mga anak nga babaye sa Dios, pinaagi sa Iyang pagkamasinugtanon aron mamatay didto sa krus, gipakamatarung kami pinaagi sa pag-too Kaniya ug sa Iyang pagkabanhaw, ug karon ang Balaang Espiritu gibubu nganhi sa among mga kasingkasing.

² Mapasalamaton kami alang sa niining kahigayonan nga makaanhi karong buntaga aron nga ipaambit ang among mga panghunahuna ug among mga pagsimba, mga pagpahayag pinaagi og mga alawiton, mga testimony, pagbasa og Mga Salmo, pagbasa sa Imong Pulong, ug maalampoon nga ginahulat ang Balaang Espiritu nga maghatod kanamo sa Mensahe nga gikatagana alang niini nga takna. Itugot kini, Ginoo. Hinaut nga mapahimuslan namo ang among pagkaania dinhi karon. Ug sa pagbiya na namo niining maong bilding, hinaut nga masulti namo sama niadtong mga nagagikan sa Emaus, “Dili ba ang atong mga kasingkasing nagdilaab man sa sulod nato samtang nakigsulti Siya kanato niining buntaga?” Itugot kini nga mga butang, Eternal nga Dios, sa Ngalan ni Jesus Cristo. Amen.

Makapanglingkod na.

³ Maayong buntag, mga higala, dinhi, dinhi sa tabernakulo ug sa atong mga higala sa tibuok nasud, gikan didto sa West Coast, usab niining buntaga, hangtud sa East Coast, ug sa amihanan ug sa habagatan, sa mga nakakonekta dinha sa telepono.

4 Usa kini ka maanindot nga adlaw dinhi sa Indiana, nga daw sa, medyo madag-umon, bugnaw, pagkamaanindot. Napuno ang tabernakulo, hangtud na dinha sa nataran ug hangtud na dinha sa mga bungbong. Nagalaum gayud kita nga duawon kita sa Ginoo karon. Ug nagalaum kami nga gihatagan kamo sa Dios og maanindot nga adlaw bisan asa pa man kamo. Ug usa gyud kini ka maanindot nga adlaw, kay gihatag man kini sa Ginoo. Bisan unsa pa ang kahimtang sa panahon, usa gyud kini ka maanindot nga adlaw. Malipayon kita nga maania dinhi, malipayon nga aduna pa kita og kahigayonan nga mapahayag sa kalibutan ang atong pagtoo diha kang Jesus Cristo. Ug gusto natong gamiton ang matag kahigayonan nga madawat nato aron nga maipahayag ang Iyang gugma ug sa kon unsay Iyang gihimo para kanato. Karon atong. . .

5 Gihatagan ako, kaganina, og usa—usa ka pagpahibalo nga pagahimoon, ug dayon aduna ako’y pipila ka mga butang dinhi nga gusto kong isulti. Ug ang usa niini, mao ang pagpahibalo nga ginapahimo kanako mahatungod sa pakigpulong sa mga diyakono niadtong miaging gabii. Ug adunay usa ka diyakono dinhi sa iglesia nga didto na mipuyo sa Arizona, nga mao si Igsoong Collins, ang atong bililhon nga igsoon. Ug sa diha nga wala siya, sila, ang hunta, ilang gipili si Igsoong Charlie Cox nga mopuli kaniya samtang wala siya. Ug si Igsoong Charlie Cox opisyal na nga gipahimutang sa mga tinugyanan. . . o sa hunta sa mga diyakono sa niining iglesia, nga maoy mopuli sa katungdanan ni Igsoong Collins, sa diha nga wala siya.

6 Ug ang usa pa ka butang nga gusto kong isulti, pag-usab, gusto kong pasalamatang kamong tanan nga mga tawo, tungod kay basin manguli na ang pipila kaninyo sa dili pa ang panerbisyo sa pagpang-ayo unyang gabii, alang sa maanindot nga mga diyutay’ng gasa, mga regalo. Daghang pagkaon ang gidala para kanamo sukad niadtong pag-abot namo dinhi. Ug gikan kanako ug sa akong asawa, ug sa akong pamilya, ginapasalamatang gayud namo kini. Usahay mahikalimtam ko na gani nga mosulti og bisan unsa mahitungod niini. Okupado gyud ko kaayo, kabalo na mo. Gatuyok na lang pirmi ang akong hunahuna. Hunahunaa na lang ninyo kung unsa kini, nga mga tawo, dili lang nga ania niini nga iglesia, kondili sa tibuk kalibutan. Kita n’yo? Ug daw sa ginapapuliki ako niini kanunay.

7 Adunay nagahisgot mahitungod sa paghalad sa mga bata, ug panerbisyo sa pagbautismo, ug uban pa. Maayo man kaayo kana. Mahimo ko unta kini, apan okupado na gyud kaayo, ako—wala na ko halos og panahon. Gikinahanglan kong itutok ang hunahuna ko sa niini mismong, niini nga Mensahe. Kabalo mo miingon ang Biblia sa mga apostoles kaniadto, o. . . Ang mga apostoles, diay, diha sa Biblia, miingon, “Panglakaw kamo, pangita kamo, sa taliwala ninyo, og mga kalalaken-an nga adunay maayong pagpamatuod, ug matinud-anon ug puno sa

Espiritu Santo, aron nga magabuhat sila sa mga buluhaton.” Ug giingnan ko si Billy. . .

Ingon siya, “Imo bang ihalad ang mga bata karon, daddy?”

Ingon ko, “Oh, my!” Kita n’yo? Kung. . . Aduna kita og pipila dinhi nga nagahulat nga maihalad, ug husto kana, tingali’g mobalik na lang ako ug mogahin og usa ka espesyal nga adlaw alang sa paghalad sa mga bata. Busa gusto ko unta nga himoon kana, karon.

⁸ Apan gusto namong pasalamatan ang matag usa kaninyo gikan sa among mga kasingkasing; akong asawa, ako, ug ang among pamilya. Gidalhan kami og mga de-lata sa mga tawo, presko nga mga butterbean, mga sandiya, mga melon, oh, mga strawberry. Bisan unsa na lang nga mahunahunaan nga mahimong dalhon, ginadala nila kini.

⁹ May usa ka bililhong igsoon lalaki ug igsoon niyang babaye, niadtong miaging adlaw, gidalhan nila kami og daku kaayo nga pabo. Hangtud karon nagsige pa ko’g kaon niadto. Ug mao nga. . . Oh, ug kinahanglan kong hutdon kadto sa dili pa ako mobiya, siguro. Kay kung dili, iya gyud kadtong ipadala kanamo. Ug busa—busa among. . . Ginapasalamatan gayud namo kining mga butanga. Nailhan ko na ang pipila sa mga tawo; wala ko pa pud nailhan ang uban kanila. Atua kini nila gipangbutang sa balkonahe sa dihang pasulod na kami. Ug mao nga ginapasalamatan ko gayud kini.

Ug daghan ang nailhan na nako. Aduna ako’y. . . Daghan kanila’y ako nang nahimamat, ug daghan pud ang wala ko pa nahimamat. Ako—sigurado ko nga masabtan kini sa tanan nga ako—gusto ko gayud nga mahimamat ang matag usa kung mahimo ko pa, apan usa lamang ako. Kita n’yo? Mao nga. . . Dili ko gayud mahimamat ang matag usa. Ginabuhat ko man ang tanan nga nahibaloan kong buhaton.

¹⁰ Busa, ang Dios magauban kaninyo. Sigurado ako nga adunay Usa nga magauban kaninyo; mao kana si Jesus Cristo, ug mahimo gyud Niya. Siya lang ang bugtong Persona nga anaa sa tanang dapit. Ug Siya’y makagagahum sa tanan usab, mao nga mahimo Niyang ihatag ang tanang panginahanglan. Ug, ingon nga nasayod-sa-tanan, nasayod usab sa inyong mga panginahanglan, sa kon unsa ang inyong gikinahanglan.

¹¹ Ginasultihan ko ang tanan nga dili ko. . . Ginapaspasan ko na kini kutob sa akong mahimo, sukad pa sa pagsulod ko dinhi karong buntag, ug nga mahimamat ko ang tanan kutob sa mahimo ko. Ug kung. . . Kung aduna ma’y dili nako mahimamat, ang Dios nga makagagahum sa tanan mao ang—ang magasangkap sa tanan ninyong panginahanglan sumala sa Iyang mga bahandi sa Himaya.

¹² [Mihunong si Igsoong Branham, dayon nagpakig-istorya kang Igsoong Neville—Ed.] Dili ko kini mabasa kaayo. Mahimo mo bang basahon kini?

Usa kini ka espesyal nga pagpahibalo sa kung unsa man. Ug sa hunahuna ko si Billy Paul tingali ang misulat niini. Mora gayud siya og ako; dili ko man gani mabasa ang kaugalingon kong sinulatan. Ug mao nga aduna ako og kinaugalingon kong paagi sa pagsulat. Ug kung inyong tan-awon ang pipila sa akong mga teksto dinhi, nga gisulat dinhi, sa hunahuna n'yo masabtan kaha ninyo kini? [Ginapakita ni Igsoong Branham ang iyang sinulat nga teksto diha sa kongregasyon, ug mikatawa siya uban kanila—Ed.] Aduna ko'y mora og bitoon, nga nagatabok sa usa ka taytayan, ug uban pa, halos tanan. . .

[Ginabasa ni Igsoong Neville ang usa ka pagpahibalo—Ed.]

Igsoong Adair, Adair nga taga-Arkansas, magapakigkita ka kono kang Rev. Pearry Green dinha luyo sa simbahan sa karon dayon. Sige.

¹³ Karon, ug ang usa pa ka butang nga buut kong—buut kong ipahibalo dinhi mao—mao nga, unyang gabii adunay mga panerbisyo sa pagpang-ayo. Magaampo kita para sa mga may sakit unyang gabii, ug busa ako—nagasalig ko nga moanhi kamo dinhi.

¹⁴ Ug ginapadangat namo ang among mga pagpangamusta sa tanang mga katawhan sa tibuok yuta, sa Ngalan ni Ginoong Jesus, nga panalanginan kamo sa Dios niining buntaga. Ang uban kaninyo mao'y padulong na sa kaudtuhon dinha. Dinha sa New York, mga anaa na dapit sa kaudtuhon. Ug dinha sa Arizona, sa West Coast, mga alas siete pa lang. Ug adunay. . . Ug dinhi mismo anaa lang kita sa tunga-tunga. Busa panalanginan kamo sa Dios samtang nagapaminaw kamo. Karon tingali kini. . .

Gibutang ko na kini sa akong kasingkasing, nga samtang ania ako dinhi. . .

¹⁵ Ug wala kita tugoti kaniadto nga magamit ang awditoryum, ug sa katapusan gitugotan ra nila kita; mahimo kita magpahigayon og usa ka panerbisyo, apan kinahanglan dili kono kita magaampo sa bisan kinsa man nga masakiton. Ako—dili ako. . . Mao kana ang akong ministerio. Gikinahanglan kong buhaton kung unsa ang ginaingon kanako sa Balaang Espiritu nga pagabuhaton. Busa ako—mibalibad gyud ako, tungod kay gusto kong anaa kita'y kagawasan sa pagbuhat sa kung unsa ang ginaingon sa Balaang Espiritu nga pagabuhaton. Kita n'yo? Busa naghunahuna ko nga mag-agwanta na lang kita og usa pa ka adlaw, bisan pa man, dinhi sa tabernakulo. Ug bugnaw man pud karon nga buntag. Ang Ginoong naghimo gayud og maayo nga adlaw para kanato dinhi, busa mapasalamaton kaayo kita.

¹⁶ Karon, sa paghimo niini, mianhi ako dinhi alang sa katuyoan nga itudlo ang katapusan nga mga Panaksan, katapusang Pito ka mga Panaksan, ug ang katapusang Pito ka mga Trumpeta, ug ang katapusang Pito ka mga Dalugdog, diha sa Basahon sa Pinadayag, idugtong ang mga niini sa niining panahon nga atong gikapuy-an karon; aron sundan ang pag-abli sa Pito ka mga Selyo, ang Pito ka mga Kapanahonan sa Iglesia. Apan, dili man kita makakuha og igo nga lawak aron nga ipahigayon kini. Busa ako—nagalaum ako nga, sa madali nga mahimo ko, kita . . . pagmakakuha na og igong lugar para niana, dinhi man o sa Louisville, New Albany, o kaha magtukod na lang og usa ka tolda, kon diin puede kitang magdugay ingon sa pagpanguna sa Ginoo kanato.

¹⁷ Apan sa niini karon, dawaton ko kini nga kahigayonan nga ipahayag diha sa mga tawo ang akong pagtoo ug pagsalig sa Dios, ug dayon dalhon ko kamo ngadto sa panahon nga atong gikapuy-an. Ug kini, dili kini pagbuot sa kung kinsa man nga tawo, unsa man nga mga kredo, o unsa pa man; kini maoy akong pagtan-aw sa Pulong sa Dios. Ug niadtong miaging Dominggo nagkaaduna kita og maayo kaayo nga pagbubo sa Espiritu diha sa Pulong. Dugay kaayo kadto, ug dili ko gusto nga magdugay og ingon-niadto; aron bisan pa man wala kita mahibalo kung unsang orasa kitang magkatigum sa katapusan nga higayon. Ug kinahanglan nato, sama sa . . . gusto nato. Gusto ko, diay, sama sa giingon ni Pablo kaniadto, “Wala ko man gililong kaninyo ang pagpahayag sa tibuok Pagbulut-an sa Dios.” Si Jesus miingon nga Siya walay bisan unsa man nga gitago sa Iyang mga tinun-an.

Ug samtang ako, okupado gayud nga naninguhang magpabilin ilalum sa dihog sa Espiritu Santo, aron hibaloon kung unsa na ang—ang panahon, ang Mensahe alang sa niining kapanahonan, usahay mapakyas akong mogawas ug himoon ang akong mga katungdanan ingon nga usa ka sulugoon ni Cristo, ingon nga usa ka ministro. Apan aduna man ako og pipila ka mga kalalaken-an nga naningkamot nga motabang kanako sa paghimo niini, nga ako gayud silang ginapasalamatan, ang tanan kong mga igsoon nga mga ministro.

¹⁸ Karon, wala ko ginatuyo nga mapadugay ang mga tawo. Kung kamo, dinha sa mga lugar diin kining Mensahe nagaabot, kung mahimo lang ninyong motindog dinhi ug tan-awon ang palibot niining iglesia karong buntaga, diha sa mga pasilyo, sa mga lawak para sa mga bata, sa gawas, sa mga nakakonekta sa radyo, sa mga sakyanan, sa mga dagkung sakyanan, ug uban pa, ug sa mga awto, makita ninyo kung unsa ang problema. Ug dayon sa matag panerbisyo, daghan, daghan ang nagabiyaha paanhi; ug nagapanawag, ug bisan unsa na lang, dili gani sila makasulod o makaanha sa palibot. Ug gikinahanglan gyud nato

og mas daku nga lugar aron nga makalingkod ang mga tawo ug mahimong komportable sila.

Ug dayon maghatud og usa—usa ka Mensahe nga sa hunahuna ko mahinungdanon kaayo, gibati ko nga kinahanglan gyud nato, ang matag usa, nga mahimong komportable ug makalingkod gyud, ug aron makapaminaw kita; nga may mga lapis ug papel, ug mga sulatanan ug Biblia, ug uban pa, aron nga maisulat ang—ang mahinungdanon nga mga punto. Gani sa niini nga butang naghunahuna ko nga balikan nato ang panahon nga aduna kita, nga atong gikapuy-an, ug paninguhaong hisgotan ang pipila sa niining mga butang nga atong pagaatubangon. Ug kinahanglan gyud ninyo ang mga niini.

¹⁹ Kung mianhi ako karon dinhi, o sa lahi man nga adlaw, o si kinsa mang uban nga ministro, nga maninguhang magdala og usa ka mensahe ngadto sa mga tawo, mga tawong naghimalasyon na nga sama kanato karon, ug sa panahon nga haduol na kaayo, maingon sa pagtoo ko nga ingon na niana kini nga adlaw; mamahimo akong usa ka hipokrito nga maninguhang magdala og usa ka butang dinhi nga nahibalo kong mahimuot kamo niini ug gani mahimong batok man sa Pulong sa Dios, o usa ka butang nga magadani og daghang mga tawo, o—o mora'g ingon-niana; ako—dili ako...dili ako mamahimo kung unsa nga ako—kung unsa nga ania ako, usa ka ministro ni Cristo. Gusto kong maghatud og usa ka butang nga sa hunahuna ko usa ka mahinungdanon kaayong magamit ninyo, dili lang aron nga makita ninyo; kondili usa gyud ka butang nga kung ako mamatay man karon, pagkaugma mamahimong nakaangkla na kini sulod sa inyong kasingkasing aron managpadayon kamo ug mangalagad sa Dios.

²⁰ Karon gusto kong isulti nga adunay usa ka butang nga andam nang mahitabo. Nasayod ako niini. Daghan kaninyo dinhi ang makahinumtum kaniadtong mianhi kanako si Igsoong Junior Jackson sa makadiyut sa wala pa kami miadto sa Arizona, mahatungod sa iyang damgo. Pagkahibulongan nga butang! Pila ba ang makahinumtum pa niadto? [Nagaingon ang kongregasyon, “Amen.”—Ed.] Ug gihatag kanato sa Ginoo ang maong hubad, ug nahitabo kadto sa eksakto gayud sa kon unsa kini. Karon, nagdamgo na usab siya og usa pa ka, damgo.

²¹ Ug ang makahibulongan nga butang, mao'y dunay usa ka lalaki nga mianhi niadtong miaging adlaw, nga taga-Oregon. Wala siya nakaila kanako, ug...nagdamgo siya mahitungod sa mao ra nga damgo, nga gidamgo ni Junior Jackson, ug—ug mao nga mianhi siya aron isulti kanako. Ako—wala ako mahibalo sa hubad niini; ginahulat ko pa ang Ginoo. Apan nasayod ko nga gikan gyud kini sa Dios. Hinumtumi lang kana. Kini'y MAO KINI ANG GINAINGON SA GINOO. Butang kini nga nagagikan sa Dios. Wala ako mahibalo kung unsa kini. Makahibulongan kaayo, makahibulongan gayud! Sa tinuod

lang, sumala sa—sa damgo niadtong duha ka lalaki. . . Ang usa kanila akong. . . tingali'g usa siya ka Baptist, Presbyterian. Siya—tingali'g nagalingkod siya dinhi karong buntaga. Wala ko kahibalo. Ania man siya dinhi niadtong miaging adlaw. Wala ako makaila sa maong lalaki.

²² Apan gisugilon niya ang maong damgo, nga adunay mga luha sa iyang mga mata. Ug nabalaka siya niadto. Mianhi siya dinhi nga gikan pa sa Oregon, aron lang nga ipahayag kadto. Si Igsoong Jackson mianhi usab sa mao ra nga paagi, karong buntaga. Usa ka lalaki nga wala makaila sa usa pa; ang usa, linibo pa ka mga milya ang gilay-on sa laing usa pa, ug ang duha ka mga damgo eksakto gayud nga nagapahinungod sa mao ra nga butang. Ug wala pa gihatag kanako sa Balaang Espiritu ang paghubad niadto. Wala ko kahibalo kung unsay isulti sa maong lalaki. Apan nasayod ko nga aduna gayu'y butang nga pagahimoon ang Dios, ug mamahimo kining mahimayaon gayud sa atong mga mata.

²³ Karon, sa Mensahe niining buntaga, gusto kong mobasa gikan sa Basahon sa Mga Taga-Galacia. Dili ako magawali o basta lang. . . Usa kini ka leksyon nga pang-Sunday school. Ug karon, kamong mga kalalaken-an ug mga kababayen-an nga nagatindog diha sa may bungbong, ug aduna ma'y gustong magkigbaylo og puwesto ug palingkoron kamo sa makadiyut, o ingon niana, karon, dili kamo makadisturbo kanako; basta magmatahaon lang gayud. Ug sa mga inahan, kung mohilak man ang ilang mga gagmay'ng bata o ingon niana, adunay mogawas una diha sa lawak sa mga bata aron nga magkaaduna og lugar ang ilang gamay'ng bata.

²⁴ Ug karon kuhaa na ninyo ang inyong lapis, Biblia, ug mag-andam na nga isulat ang pipila ka mga Kasulatan nga atong pagabasahon. Dili ko gusto nga mabati ninyo nga ginalimitahan kamo. Gusto kong mabati ninyo—gusto kong mabati ninyo nga gawasnon kamo nga makapanglingkod ug magtuon. Ug tingali'g aduna kamo og dili-mauyonan, okey lang kana. Apan nagahisgot lamang ako niini sa tibuok nasud niining buntaga, aron nga ang mga tawo nga nagatoo sa Mensahe nga gikahatag kanako ni Ginoong Jesus alang niini nga kapanahonan, mahimong mahibalo kung unsa na ang nagakahitabo, ug mahinumduman kini diha sa Kasulatan.

²⁵ Niadtong miaging Domingo naghisgot kita mahitungod sa *Ang Mga Dinihogan Sa Kaulahiang Adlaw*. Ug kung kamo, bisan kinsa man kaninyo, nga mga tigpaminaw sa teyp, siguradoha ninyo nga makakuha kamo niana nga teyp. Dili ingon nga gusto namong mamaligya og teyp; dili kana mao ang ginahunahuna namo. Ang among ginahunahuna mao ang pagpakaylap sa Mensahe. Kita n'yo? Kita n'yo? Kung aduna kamo'y kahimanan nga nagapatukar og teyp, mangtapok kamo, ug ipatukar kini, ug maminaw og ayo. “Ang mga dinihogan.”

²⁶ Madungog ninyo ang mga tawo nga magapanindog ug moingon, “Oh, miingon ang Biblia, ‘Sa kaulahiang mga adlaw, manungha ang mini nga mga propeta ug mamuhat niini nga mga ilhanan.’” Ingon-niana ka tukma ang Kasulatan. Kung ingon-niana diin man kana maaplikar? Kinahanglan nga maaplikar kini nga husto.

Unyang gabii gusto kong maghisgot mahatungod sa, kon itugot sa Ginoo, mahatungod sa: *Ang Dios Nadayag Diha Sa Kaugalingon Niyang Pulong*, kung unsa nga ang mata dili mahimong gamiton kon diin ang dalunggan unta ang angay’ng pagagamiton. Kita n’yo? Sama lang sa pagprinta sa tibuok Biblia, ug, sa tibuok nga Biblia, nagahulagway kini ni Jesus Cristo. Busa gusto kong maghisgot bahin niana unyang gabii, kon itugot sa Ginoo. Ug karon, kung dili man, siguro sa lahi nalang nga petsa.

²⁷ Karon sa Basahon sa Mga Taga-Galacia. Ug sa Basahon sa Ikaduhang Mga Taga-Corinto 4:1 hangtud sa 6, pagkahuman Mga Taga-Galacia 1:1 hangdtud sa 4, buut kong mobasa og pipila ka mga Kasulatan. Karon diha sa Mga Taga-Galacia 1:1 hangtud sa 4, “Si Pablo, nga usa ka apostoles,” bantayi ninyo ang kalit nga paghunong dinha. Ang *Apostoles* nagakahulogan nga “usa ka sinugo,” o, “usa ka misyonero.”

Si Pablo, nga apostol, (dili gikan sa mga tawo, ni pinaagig tawo, kondili. . . ni Jesus Cristo, ug sa Dios nga Amahan, nga nagbanhaw kaniya gikan sa mga patay);

Ug ang tanang mga igsoon nga ania uban kanako, nganha sa mga iglesia sa Galacia:

Ang grasya maanaa kaninyo ug ang kalinaw nga gikan sa Dios nga atong Amahan, ug sa atong Ginoong Jesus Cristo,

Nga mitugyan sa iyang kaugalingon alang sa atong mga sala, aron nga maluwas kita niya gikan niining dautan nga kapanahonan sa kalibutan karon, sumala sa kabubot-on sa Dios. . . nga atong Amahan:

Kaniya mao ang himaya hangtud sa kahangturan. Amen.

²⁸ Karon diha sa Basahon sa Ikaduhang Mga Taga-Corinto, sa ika-4 nga kapitulo, ug magabasa kita gikan sa 1 hangtud 6, nga mga bersekulo.

Tungod niana kay nakabaton kami niini nga ministerio, ingon sa kalooy nga among nadawat, wala kami magpakaluya;

Apan gisalikway namo ang mga butang nga tinago sa kaulawan, sa walay paggawi sa limbong, bisan sa pagsimbug sa pulong sa Dios; kondili pinaagi sa pagpadayag sa kamatuoran nanugyan kami sa among

kaugalingon ngadto sa kaisipan sa tanang mga tawo sa atubangan sa Dios.

Ug bisan kung ang atong maayong balita natabilan, natabilan kini kanila nga nagakawala:

Kung dili kana nagakahulogan og predestinasyon, wala ko kahibalo kung unsa’y ginapakahulogan niini.

Nga kanila gibutaan sa dios niini nga panahona sa kalibutan ang mga salabutan sa mga dili matinoohon, aron ang kahayag sa maayong balita sa himaya ni Cristo, nga mao ang dagway sa Dios, dili mosidlak kanila.

Maingon man kaniadto sa tanaman sa Eden, “Papahawaa sila, tingali unya hikapon nila kana nga Kahoy.”

Kay kami wala magwali sa among kaugalingon, kondili si Cristo Jesus ang Ginoo; . . . ang among mga kaugalingon inyong mga ulipon tungod kang Cristo.

Sanglit nga ang Dios, mao ang miingon ang kahayag magasidlak gikan sa kangitngit, nga misidlak sa among mga kasingkasing, ug sa paghatag og kahayag sa pag-ila sa himaya sa Dios diha sa nawong ni Jesus Cristo.

²⁹ Amen! Sa ingon niini mabasa ang Pulong! Karon, ang teksto ko niining buntaga, mao ang: *Ang Dios Sa Niining Dautan Nga Kapanahonan*. Maingon sa atong nabasa diha sa mga Kasulatan, “ang dios sa niini nga kalibutan, sa niining dautan nga kapanahonan.” Karon, ginapunto niini nga Mensahe ang mga kadautan sa niining dautan nga kapanahonan, ug haum kini sa propesiya alang sa niining dautan nga kapanahonan.

Ug nagatoo ako nga ang matag. . . nga ang Biblia adunay tubag alang sa matag kapanahonan, nga nahisulat na sa Biblia, alang sa magtotoo nianang maong kapanahonan. Nagatoo ko nga ang tanang gikinahanglan nato nahisulat na *Dinhi* mismo, kinahanglang pagahubaron na lang sa Balaang Espiritu. Wala ako nagatoo nga adunay katungod ang si kinsa man nga tawo sa kalibutan nga mohimo og kaugalingon niyang interpretasyon sa Pulong. Wala magkinahanglan ang Dios kang bisan kinsa aron nga hubaron ang Iyang Pulong. Siya mao ang Kaugalingon Niyang tighubad. Miingon Siya nga pagahimoon Niya kini, ug ginahimo gyud Niya kini.

³⁰ Sama sa gikaingon ko na sa makadaghang higayon. Miingon Siya, “Usa ka ulay ang manamkon,” gisulti Niya kana pinaagi sa mga ngabil sa usa ka propeta, ug nanamkon ang maong babaye. Wala’y tawo ang kinahanglan nga mohubad pa niana. Sa sinugdan, miingon Siya, “Motungha ang kahayag,” ug nagkaaduna og kahayag. Wala’y tawo ang kinahanglan nga mohubad pa Niini. Miingon Siya, “Sa ulahing mga adlaw, Iyang igabubo ang Iyang Espiritu sa tanang unod,” ug gibuhat Niya.

Wala na nagkinahanglan pa og bisan unsa aron hubaron Kini. Ingon Siya, “Sa ulahing mga adlaw, kining mga butanga” (nga atong makita nga nagakahitabo karon) “maania dinhi.” Wala na kini nagkinahanglan og bisan unsa nga paghubad. Gihubad na kini. Kita n’yo?

³¹ Karon, himatikdi pag-ayo karon samtang nagatuon kita sa Pulong. *Ang Dios Sa Niining Dautan Nga Kapanahonan*, nga atong gikapuy-an karon. Daw sa kahibulongan, kahibulongan kaayo nga butang, sa niining kapanahonan sa grasya, sa dihang, “nagakuha ang Dios og usa ka katawhan alang sa Iyang Ngalan,” nga mao ang Iyang Pangasaw-onon, sa niining maong dautan nga kapanahonan nga pagatawgon nga kapanahonan sa kadautan. Ang mismong kapanahonan nga “nagatawag ang Dios og usa ka katawhan alang sa Iyang Ngalan,” pinaagi og grasya, pagawas, ug pagatawgon nga usa ka dautan nga kapanahonan. Karon, atong pamatud-an pinaagi sa Biblia nga mao kini ang kapanahonan nga ginahisgotan Niya. Pagka-kahibulongan nga hunahunaon nga, nga sa usa ka dautan nga kapanahonan nga sama niini, nga ang Dios magatawag sa Iyang Pangasaw-onon.

³² Himatikdi ninyo, miingon Siya, “usa ka katawhan,” dili “usa ka iglesia.” Ngano man? Bisana pa man, gitawag Kini og Iglesia, apan magatawag Siya og “usa ka katawhan.” Karon, ang iglesia usa ka panagtigum sa daghang mga tawo sa nagkalainlaing mga kinaiya. Apan magatawag ang Dios og usa dinhi... Wala Siya miingon, “Pagatawgon Ko ang mga Methodist, Baptist, Pentecostal.” Miingon Siya nga magatawag Siya og usa ka katawhan. Alang sa unsa? Sa Iyang Ngalan. Kita n’yo, usa ka katawhan; usa gikan sa Methodist, usa gikan sa Baptist, usa gikan sa Lutheran, usa gikan sa Katoliko. Kita n’yo?

Apan magatawag Siya, dili nga usa ka pundok sa iglesia, kondili “usa ka katawhan alang sa Iyang Ngalan,” nga magadawat sa Iyang Ngalan, igaminyo sa Iyang Ngalan, moadto sa kasal aron maikasal Kaniya, aron mamahimong kabahin Niya, kita n’yo, pinaagi og predestinasyon. Sama sa usa ka lalaki nga nagapili og usa ka husto nga asawa sa kinabuhi, nga gikatagana nang daan aron nga mahimong kabahin sa iyang lawas. Busa, mao kana, ang Pangasaw-onon ni Cristo sa umalabot, ug sa karon, gikan pa kaniadto, gikatagana nang daan sa Dios aron mahimong kabahin niana nga Lawas. Kita n’yo? Oh, madagayaon kaayo ang mga Kasulatan, puno gayud og dugos!

³³ Himatikdi, dili sa kung unsa’y gisulti sa usa ka tawo, kung unsa’y gitawag sa usa ka tawo; kondili sa kung unsa’y gipili sa Dios sa wala pa ang pagkatukod sa kalibutan, ug nagatawag na niining mga katawhan sa kaulahiing mga adlaw; dili nga usa ka organisasyon. “Usa ka katawhan alang sa Iyang Ngalan.” Ug sa niining dautan nga kapanahonan diin pagabuhaton Niya kini, sa niini mismong kapanahonan sa pagpanglimbong.

³⁴ Niadtong miaging semana, diha sa Mateo 24, kini mao ang pinakamalimbongon nga kapanahonan sa tanang mga kapanahonan. Sa tanang mga kapanahonan sa pagpanglimbong, gikan pa sa tanaman sa Eden, hangtud karon, wala pa gayu'y kapanahonan sukad nga malimbongon kaayo sama niini nga kapanahonan. "Manungha ang mini nga mga propeta ug magapakita og ilhanan ug mga katingalahan, nga kon mahimo pa igapahisalaag ang mga Pinili." Kita n'yo? Karon, ang mabugnaw, pormal, tuskig nga mga iglesia, ug uban pa, tungod sa teolohiyang hinimo sa tawo, dili ang mga niana; dili gayud kana makapadani sa pagtagad sa mga Pinili. Apan kini ang maoy halos sama ra gayud sa tinuod nga butang. Ang gikinahanglan mong pagabuhaton mao lamang ang pagtangtang og usa ka Pulong. Ang gisaad sa maong kapanahonan; grabe kaayo nga panahon! Mga Cristohanon, sa bisan asa man, magmabinantayon gayud sa panahon nga atong gikapuy-an! Isulat ninyo kana ug basaha, ug paminaw pag-ayo.

³⁵ Unsa'y hinungdan nga nagatawag ang Dios og katawahan gikan niining dautan nga kapanahonan, sa Iyang Ngalan? Ang hinungdan niini mao'y, aron sulayan Siya, ang Iyang Pangasaw-onon. Kini'y aron... Maipadayag ang Pangasaw-onon, masulayan, mapamatud-an, mapanghimatud-an kang Satanas. Sama ra kaniadto sa sinugdan, mao usab kini sa katapusan.

³⁶ Maingon man sa usa ka binhi nga nagaturok diha sa yuta, nagasaka kini tungod sa mga nagadala niini, sa kinabuhi niini, apan sa katapusan ang mao ra kini sa gihapon nga binhi sa diha nga gipugas kini kaniadto diha sa yuta.

Ug sa mao ra nga paagi nga naitanum sa yuta kaniadto ang binhi sa pagpanglimbong, didto sa Eden, mosangpot kini sa mao ra nga paagi sa kaulahiing mga adlaw.

Sama ra kaniadto nga nahulog ang Maayong Balita ngadto sa pagka-denominasyon sa Nicaea, Roma, mosangpot kini ngadto sa pagkadaku kaayong organisasyon.

Sama ra usab nga nalubong kaniadto ang Binhi sa Iglesia, nga inubanan og mga ilhanan, mga katingalahan, ug anaa sa taliwala nila ang buhi nga Cristo, magahinapos kini sa kaulahiing mga adlaw ilalum sa ministerio sa Malaquias 4, ug igapasiuli pag-usab ang orihinal nga Pagtoo nga gikahatag kaniadto.

³⁷ Atong makita karon, nga sa niining dautan nga kapanahonan pagapamatud-an, kang Satanas, nga ang Pangasaw-onon dili susama kang Eva, nga dili Siya ingon niadtong matang sa babaye. Ug pagasulayan Siya pinaagi sa Iyang Pulong, ang Pangasaw-onon, sama nga gisulayan kaniadto ang pangasaw-onon ni Adan pinaagi sa Pulong. Ug gitooan kaniadto sa pangasaw-onon ni Adan ang matag tipik sa Pulong,

ang tanan, apan nalibog lang sa usa ka saad, nga, “Siya mao sa gihapon kagahapon, karon, ug hangtud sa kahangturan,” karon, kita n’yo; nasipyat lang diha sa usa ka saad, tungod sa panulay sa kaaway, nga inatubangay gyud. Ug karon, ang katawhan nga gitawag alang sa Iyang Ngalan, nga siyempre, mao ang Iyang Pangasaw-onon. Kinahanglan Niyang atubangon ang mao ra nga butang; dili pinaagi sa denominasyonhong kamatuoran o unsa man, kondili pinaagi sa matag Pulong!

³⁸ Kay, sa sinugdan diha sa Biblia, gihatagan ang tawo og Pulong sa Dios aron nga ikinabuhi. Usa ra ka Pulong, ang gisayup pagpasabot sa usa ka—usa ka tawong gitawag og Satan, diha sa persona sa usa ka hayop nga gitawag og serpente. Si Satan, sa niini nga persona, nagpakigsulti kang Eva, ug gisayup pagpasabot ang Pulong ngadto kaniya, ug naalaut kini. Kita n’yo, kinahanglan Kini nga matag Pulong gayud.

³⁹ Sa tunga-tunga sa Biblia, miabot si Jesus ug miingon, “Ang tawo mabuhi dili sa tinapay lamang, kondili sa matag Pulong,” sa dihang gitintal Siya ni Satan kaniadto.

Karon, nagaingon ang Dios kanato dinhi sa kaulahiing mga adlaw, nga, “Ang dios sa niining kalibutan motungha sa kaulahiing mga adlaw.”

“Ug ang kinsa man nga magadugang og usa ka pulong ngadto Niini, o magataktak og usa ka Pulong gikan Niini, pagataktakon ang iyang bahin gikan sa Libro sa Kinabuhi.”

Malooy unta ang Dios kanato! Ug dili unta kita manlakaw nga mora’g mga si kinsa, pinalabaw ang mga dughan, nakataas ang ulo, daw sa nahibalo gyud sa tanan, tungod kay kita man usab kaniadto atua sa pagka-masupilon. Itugot nga kita tungod sa grasya, ug kalooy, ug pagbati sa atong kasingkasing ngadto sa Dios, mapainubsanon kitang mangduol sa Trono sa grasya.

⁴⁰ Pagka-kahibulongan karon, pagkahuman sa mga dise-nuebe ka gatus ka tuig nga pagwali sa Maayong Balita, ug karon siya, kanang sistema sa kalibutan, mas samut pang nagkadautan kay sa niadtong mga adlaw nga, ania pa Siya dinhi kaniadto. Mas samut pang nagkadautan ang sistema sa kalibutan. Nagapadulong na ang kalibutan ngadto sa usa ka grabeng sangkoanan niini. Nasayod kamo niana. Ginatuman na sa Ginoo ang Iyang Pulong sa bisan asa.

⁴¹ Kagahapon, sa nagatindog ako. . . Nanghinaut ko nga ang batan-ong lalaki dili. . . Dili siya. Miadto ko kauban ang akong asawa, ug si Mrs. Wood, si Igsoong Roy Roberson, sa usa ka dapit dinhi, si Igsoong Wood usab, mihunong kami dinhi sa niining Youngstown Shopping Center, aron kuhaon ang usa ka—usa ka pinadala para kang Igsoong babayeng Wood. Ug sa. . . samtang nagatindog kami didto, adunay usa ka batan-ong lalaki ang miduol ug nagpaila sa iyang kaugalingon, ug dili ko siya kaila.

Adunay usa na pud ka lalaki ang miduol ug miingon nga gikan pa kono sila sa Alabama, o kaha sa Georg-. . . Sa hunahuna ko nga sa Georgia, tungod kay gipangutana ko sila kung kaila ba sila sa atong Igsoong Welch Evans. Ug nagka-istoryahanay kami sa pipila ka minuto. Ug sa dihang molakaw na ko, mitan-aw kanako kining batan-ong lalaki. Samtang milakaw na kadtong usa pa ka lalaki ug ang iyang gamay'ng anak nga lalaki, gisige ko'g tan-aw niining batan-ong lalaki. Ingon siya, "Aduna unta ko'y gustong isulti."

Miingon ko, "Usa—usa ka ba ka magtotoo? Usa ka ba ka Cristohanon?"

Ingon pa, "Dili, sir." Ingon siya, "Ako. . ."

⁴² Tingali dili ko eksaktong maisulti dinhi ang iyang giingon, apan medyo aduna siya'y pagduhaduha. Gipangutana ko siya mahitungod sa mga butang nga ang Manulonda sa Ginoo nagapakita. Ug miingon siya nga nadungog na kono niya ang mahitungod niini, apan wala pa gyud kono siya nakaadto og simbahan sukad, sa niini nga simbahan. Ingon ko, "Nagatoo ka ba Niini?"

Miingon, "Oo, sir." Ingon siya, "ako—aduna ako'y ginatan-aw." Miingon, "Ginaingnan ako sa mga tawo mahitungod sa niini nga mga panagna ug mga butang, ug nadungog ko sa teyp nga imong gipanagna kung unsa nga masiak ang California nga sama niana." Ug ingon pa, "Sa dihang nakita ko kadto sa mantalaan, nan mitoo na ako niini." Ingon siya, "Moanhi ako karon o ugma," karong adlaw kana, "para sa una kong higayon."

Ingon ko, "Panalanginan ka sa Ginoo, dong," ug gisugdan kong lamanohon siya.

Ingon siya, "Apan adunay usa ka butang nga gusto kong isulti kanimo, sir." Miingon siya, "Nasaag ako maingon sa usa ka nahisalaag gayud." Ingon siya, "Susama ra ako sa usa ka sensilyo diha sa nagkatipun-og nga balas, nawala!"

⁴³ Miingon ko, "Apan dili mo man kinahanglan nga magpabilin og ingon-niana. Adunay Usa nga ania dinhi karon Kinsang mangita kanimo sa higayon nga andam ka na nga mahikaplagan."

Ingon siya, "Andam na ako."

Ingon ko, "Mahimo mo bang iduko ang imong ulo?"

Ingon siya, "Wala ako naulaw."

Dili lang kana, apan miluhod gyud siya, didto niadtong paradahan, sa atubangan sa tanang mga tawo. Ginatan-aw siya niadtong mga tawo sa kalsada. Nag-ampo kami nga kauban siya didto, hangtud nga gihatag niya sa Dios ang iyang kasingkasing. Miduol siya, nga usa ka makasasala; mibalik siya, ingon nga usa na ka anak sa Dios. Miduol siya didto sa kilid sa sakyanan, nga patay; ug mibalik siya, nga buhi na.

44 Miingon ko, “Bukas ang bautismohanang ugma.”

Aduna’y usa ka Tuburan nga puno sa Dugo,
Gikan sa mga kaugatan ni Immanuel,
Kon diin ang mga makasasala nanglusbog sa
maong baha
Mangatangtang ang tanan nilang mga lama sa
sala.

Miingon ko, “Tindog ug magpabautismo sa Ngalan ni Jesus Cristo, nga nagatawag sa Ngalan sa Ginoo. Pagapun-on ka sa Dios sa Balaang Espiritu, ug igahatag kanimo kining halangdong mga butang, ug ipahitabo kini kanimo aron imo Kining makita.”

45 Unsa man kini? Nagapadulong na ang kalibutan sa usa ka sangkoanan. Ngano man? Ang espiritu sa pagkamalinapason sa kasugoan, pagkadunot sa moralidad, siyentipikong relihiyon, mao’y nagdala niini ngadto sa “halwa sa tanang dulomtanan ug mahugaw nga mga langgam,” sama sa giingon sa Biblia. Atong basahon kini, Pinadayag 18. Samtang ginasugdan nato kini nga punto, atong kuhaon ang Pinadayag 18:1 hangtud 5. Siguro namarkahan ko na kini.

Ug sa human niining mga butanga nakita ko nga nanaug gikan sa langit ang usa usab ka manolunda, nga may dakung pagbulut-an; ug ang yuta ginaiwagan sa iyang himaya.

Ug siya misinggit sa makusog nga tingog, (karon kamong mga tawo nga nagadamgo og mga damgo) . . . nga nagaingon, Nahulog na, nahulog na ang bantugang Babilonia, ug nahimong puloy-anan sa mga yawa, ug tigumanan sa tanang espiritu nga mahugaw, . . . tugdonanan sa tanang langgam nga mahugaw ug dulomtanan.

Kay ang tanang mga nasud nangahulog tungod sa vino sa kaisug sa iyang (iglesia kini) pagpakighilawas, ug ang mga hari sa yuta nakapakighilawas uban kaniya, ug ang mga magpapatigayon sa yuta nangadato tungod sa gahum sa iyang mausikong pagpatuyang.

Ug nadungog ko ang lain nga tingog gikan sa langit, nga nagaingon, Gumula kamo kaniya, katawohan ko, aron dili kamo makaambit sa iyang mga sala, . . . aron dili kamo makadawat sa iyang mga hampak.

Kay ang iyang sala nakaabot hangtud sa langit, ug nahinumduman sa Dios ang iyang pagkadili-matarung.

46 Daw sa unsa nga pasidaan! Eksaktong ginadala niini ang iglesia diha sa Pinadayag 3:14, sa kapanahonan sa Laodicea, malinapason sa kasugoan; tinuod nga relihiyoso, apan malinapason sa kasugoan. “Ikaw, tungod kay nagaingon ka,

‘Ako dato, wala ako magkinahanglan sa bisan unsa,’ wala ka makahibalo nga ikaw hubo, makaloolooy, buta, ug wala nakahibalo niini.” Bug-os ka eksakto gayud sa Kasulatan alang niining kapanahonan, dili Kasulatan nga alang sa kapanahonan ni Daniel, dili alang kanila sa ngalan ni...nga alang sa kapanahonan ni Noe, kondili alang sa niining kaulahian, dautan nga kapanahonan.

⁴⁷ Himatikdi dinhi, “Ikaw hubo.” Tugoti nga motuhop kana sa halalum gayud. Nasayod ko nga mahimong adunay dakung dili pag-uyon kanako sa niini nga panghunahuna, apan miabot na kini sa punto nga ang usa ka Cristohanon dili na halos makalakaw gawas sa iyang balay ug nga dili siya mahiadto sa taliwala niining dautan nga kapanahonan, tungod sa mga kababayen-an nga halos wala na’y bisti.

⁴⁸ Mga kababayen-an, isulti ko kini, ug gusto kong maminaw kamo. Ug, mga kalalaken-an ug mga kababayen-an, mahimong dili kamo mouyon niini, apan mabati kong gipangunahan ako nga isulti gyud kini. Nahibalo ba mo, nga si kinsa man nga babaye nga halos ginahuboan na ang iyang kaugalingon nga sama niana wala siya sa husto niyang panghunahuna? Nahibalo ba mo, nga siya, toohan man niya kini o dili, o hunahunaon niya nga dili, usa gayud siya ka bigaon? Bisan pa motindog kana nga babaye nga nakataas ang iyang kamot diha sa atubangan sa Dios ug manumpa nga wala gayud siya gihikap sa ubang lalaki kondili sa iyang bana lamang, ug tingali mao kana ang kamatuoran, apan siya sa gihapon usa ka bigaon. Miingon si Jesus, “Ang si kinsa man nga nagatan-aw sa babaye nga may pagkaibog kaniya nakapanapaw na uban kaniya.” Ug ang maong babaye tingali . . .

⁴⁹ Kita n’yo, siya’y “hubo,” nag-ingon ang Biblia, “ug wala nakahibalo niini.” Ang espiritu nga nagadihog kaniya aron himoon ang ingon-anang mga butang mao’y usa ka dautan, bigaon nga espiritu. Ang iyang panggawas nga pagkatawo, ang iyang pisikal nga lawas, ang iyang unod, mahimong hinlo siya. Mahimong wala pa gyud siya nakapanapaw, ug makapanumpa sa Dios nga mao kana ang kamatuoran, nga wala gayud siya nakapanapaw, apan ang iyang espiritu usa ka espiritu sa pagka-bigaon. Gibutahan gayud siya sa dios niining kalibutan bahin sa modernong paagi sa pagpangbisti; makihilawason niyang gibistihan ang iyang kaugalingon ug mogawas dinha.

⁵⁰ Niadtong miaging adlaw, ako ug si Igsoong Wood gipahimutang namo ang among bangka didto sa suba. Nagalakaw na ako niadto gikan sa balay sulod sa pipila ka minuto, aron paingon na didto sa suba. Ug bisan asa ka moagi, ang mga babaye nanagsul-ob niining gagmay’ng mga . . . ginatawag og mga bikini o ingon niana, nga ginasul-ob nila. Usa kana ka kaulawan. Dili mahimong anaa sa hustong pangisip ang usa ka babaye ug magasul-ob og unsa man nga sama niana.

Bigaon nga espiritu ang nagkupot kaniya. Karon, husaya kana sa Dios, gining, tungod kay imong mahikaplagan sa umaabot nga adlaw nga mao gyud kana ang Kamatuoran.

⁵¹ Unsaon man nimo, ingon nga usa ka gining, nga nahibalo ka man kung unsa ka sagrado ang imong lawas, ug imo kining ipasundayag dinha sa gawas sa niining mga maulagon, makasasala nga mga yawa nga nagalakaw dinha sa kadalanan sa niining kapanahonan? Kung ang mga anak nga lalaki sa Dios mga anak sa gihapon nga lalaki sa Dios, kung ang imong bana usa gyud ka anak nga lalaki sa Dios, mahimong pabistihon ka niya og tarung o iya kang biyaan. Kung ang usa ka lalaki usa gyud ka anak sa Dios, dili gayud siya magpakasal sa ingon niana nga klaseng babaye. Kita n'yo?

Moingon kamo, “Imo lang ginahi- . . .” Dili.

Kamatuoran ang ginasulti ko kaninyo, ug sa umaabot nga adlaw pagaatubangon ninyo Kini. “Hubo, mananapaw; wala nakahibalo niini.”

⁵² “Oh, ginapanumpa ko nga wala ko gyud nalapas ang mga panaad ko sa akong bana.” Pagahukman ka niana sa imong bana kung gilapas mo kana. Apan pagahukman ka sa Dios tungod sa kung unsa nga matang sa espiritu nga aduna ikaw diha sa sulod nimo; dili ka pagahukman tungod sa imong lawas, kondili tungod sa imong espiritu, kanang tawong anaa sa sulod dinha.

⁵³ Ang tawo nga panggawas mao ang pisikal nga pagkatawo nga ginakontrolar sa unom ka mga sensya. . . o lima ka mga sensya, diay. Ang tawong ania sa sulod mao ang espiritu nga tawo nga ginakontrolar sa lima ka mga sensya; konsensiya, ug gugma, ug uban pa. Ang tawong panggawas usab; igtatan-aw, igtitilaw, igbabati, igsisimhot, igdudungog.

Apan sa kinasuloran niana nga espiritu mao ang kalag, ug ginakontrolar kini sa usa ka butang, ang inyong gawasnong pagbuot. Mahimo ninyong dawaton kung unsa'y ginaingon sa yawa o dawaton kung unsa'y ginaingon sa Dios. Ug mao kana ang magpaila kung unsa nga espiritu ang anaa dinha sa sulod. Kung Espiritu kini sa Dios, magakaon Kini sa mga butang nga iya sa Dios, ug dili Kini magakaon og bisan unsa man nga iya sa kalibutan. Miingon si Jesus, “Kung nahigugma kamo sa kalibutan o sa mga butang nga iya sa kalibutan, kini'y tungod nga ang gugma sa Dios wala pa gayud nakasulod niining kinasuloran nga bahin.” Nalimbongan kamo ni Satanas. “Ug ang tawo mabuhi dili sa tinapay lamang, kondili sa matag Pulong nga nagagula sa baba sa Dios.”

Himatikdi karon, nahibaloan nato nga siya'y “hubo,” malaw-ay ug walay sapot.

⁵⁴ Ug ang kalibutan daw sa anaa na sa pinakadautan nga kapanahonan niini sukad-sukad. Wala sukad sa unang mang kapanahonan nga ang mga kababayen-an nanglihok nga

sama niana, wala gayud gawas lamang niadtong hapit na pagalaglagon ang kalibutan pinaagi sa baha. Ug naghisgot si Jesus niini. Pagahisgotan nato kana pagkataudtaud.

⁵⁵ Nawad-an ba og pagkontrolar ang Dios, o ginatugotan lang Niya ang ubang kagahum nga mokontrolar? Naghunahuna ako. Ang tinuod nga tubag sa niana nga pangutana mao'y, sa akong opinyon, adunay duha ka nagkabatok nga mga espiritu sa kalibutan karon, nga nagapamuhat. Karon, dili mahimo nga adunay sobra pa sa duha, duha ka ulo. Ug ang Usa niini mao ang Balaang Espiritu nga nagapamuhat; ang laing usa pa mao ang espiritu sa yawa, ug, sa niining kaulahiing mga adlaw, nga anaa diha sa pagpanglimbong.

Karon igabasi ko ang akong mga panghunahuna bahin niini dinhi alang sa ubang nahabilin pa nga teksto, sa nahabilin nga . . . nga atong Mensahe.

⁵⁶ Ang duha ka espiritu. Ang Usa niini, mao ang Balaang Espiritu sa Dios; ang laing usa pa, mao ang espiritu sa yawa, nga nagapamuhat aron sa pagpanglimbong. Ang mga tawo sa yuta karon nagahimo na sa ilang pagpili.

Ania ang Balaang Espiritu nga nagatawag sa Pangasaw-onon alang kang Cristo. Ginahimo Niya kini pinaagi sa pagpanghimatuod sa Iyang Pulong sa saad ngadto Kaniya, alang niini nga kapanahonan, ginapakita nga Kini mao gayud si Cristo.

Kung ang tudlo mao ang angay'ng magapamuhat sa niini nga kapanahonan, mamuhat ang maong tudlo. Kung ang tiil mao ang angay'ng magapamuhat sa niini nga kapanahonan, mamuhat ang maong tiil. Kung ang mata usab mao ang angay'ng makakita sa niini nga kapanahonan, makakita ang mata. Kita n'yo?

Ang Espiritu sa Dios, maingon nga midaku na Kini ngadto sa kahupnganan sa bantayog sa Dios, diha sa kapanahonan nga atong gikapuy-an karon. Ania ang Balaang Espiritu nga ginapanghimatud-an ang Mensahe sa niining panahon. Ug ginahimo kini sa Balaang Espiritu, aron nga ang mga tawo nga nagatoo sa Dios pagatawag na pagawas niini nga kasamok.

Ania usab ang dautang espiritu sa yawa nga nagatawag sa iyang iglesia pinaagi og kasaypanan, sama sa naandan na, pinaagi sa pagpangtuis sa Pulong sa Dios, sama sa gihimo niya kaniadto sa sinugdan. Makita ba ninyo kini nga nagabalik na usab niadtong panahon sa binhi, didto sa Eden? Ania na kini pag-usab.

⁵⁷ Karon, kung balikan kaniadto, nahisakop kamo- . . . sa ubang mga kapanahonan kaniadto, nahisakop kamo sa mga denominasyon, nahisakop kamo sa *niini*, *niana*, o sa *uban pa*. Unsa na ma'y nahitabo sa maong denominasyonhong lindog? Nagakalaya kini. Ang Espiritu padayon nga nagabiya ug

nagapadayon, ug nagapaingon na Kini ngadto sa pagka-Binhi. Nakita n'yo?

⁵⁸ Ug ang pagtintal, sa duha, nagabalik kini sa mao ra nga paagi kung unsa kini kaniadto sa sinugdan. Himatikdi. Ayaw—ayaw, ayaw, ayaw ninyo kini kalimti karon.

Sama kang Juan, Unang Juan 4:5 ug 6, kung gusto ninyong isulat kana, ang pagkasulti niya niadto, “ang espiritu sa kasaypanan.”

Dili nga ordinaryo lang nga migawas si Eva didto, nga tinuyo niyang, giingon, “Wala ako nagatoo sa Dios.” Dili. Usa kadto ka sayup ang gitooan niya.

⁵⁹ Wala mitungha si Satanas didto ug miingon, “Oh, bueno, dili man kana mao ang Pulong sa Dios.” Gi-admitar niya nga Pulong kadto sa Dios, apan gihatagan lang niya Kadto og kaugalingon niyang interpretasyon. Nga, klaro na nga giingon sa Dios kanila nga dili nila pagabuhaton kadto.

Unsa ma'y ginahimo niini? “Nagahimo kini og gahum sa pagkahisalaag, aron nga ang mga tawo managpanoo sa bakak, ug pagahukman tungod niini.” Karon kung gusto ninyong basahon kana, Ikaduhang Mga Taga-Tesalonica 2:11.

⁶⁰ Aduna ako, ug medyo pipila ka mga Kasulatan dinhi, ug dili na nato mahimong mabasa ang tanan niini. Mga usa karon ug unya, ihatag ko ang mga niini kaninyo. Tungod nga daw sa makahibulongan kini, nga nagaduhaduha kamo niini o unsa man, ug tingali ipahayag nato kini ug basahon alang sa inyong—inyong kaayohan.

⁶¹ “Nagahimo og gahum sa pagkahisalaag,” sama sa giingon na sa Biblia nga pagahimoon niini, Ikaduhang Mga Taga-Tesalonica. “Karon, motungha kining tawo sa sala, ug magalingkod sa templo sa Dios, magapasundayag sa iyang kaugalingon nga siya'y Dios, ug magsugyot sa mga tawo nga mopaingon sa gahum sa pagkahisalaag, aron managpanoo sa bakak; ug, sa pag-too niini, pagahukman tungod niini.”

Ingon niana usab ang gibuhat niya kang Eva kaniadto. Gihatagan siya. . . Wala—wala gayud niya siya giingnan nga dili husto ang Pulong, kondili gihatagan ang maong babaye og gahum sa pagkahisalaag, aron motoo siya sa usa ka bakak.

⁶² Ang espiritu sa pagkahisalaag mao'y iya sa yawa. “Ang mga yawa karon nagapamuhat diha sa mga anak sa pagkadilimasinulondon.” Dili-masinulondon sa unsa? Sa unsa ba'y dilimasinugtanan ang mga kaanakan niini nga panahon? Sama ni Eva kaniadto, sa sinugdan, dili sila masinugtanan sa tinuod nga Pulong sa Dios. Husto kana. Karon kung gusto ninyong isulat kana. . .

Atong ablihan kini, Mga Taga-Efeso 2, sa makadiyut lang, tungod kay mora'g maayo nga atong. . . Mohunong sa ko sa

makadiyut, kung wala kaayo mo nagdali, ug basahon ang pipila niini. Mga Taga-Efeso 2:1 hangtud 2.

Ug kamo iyang gibuhi sa mga patay pa kamo tungod sa mga kalapasan ug sala;

Nga kanhi mao ang inyong panaggawi uyon sa kahimtang niining kalibutan, uyon sa principe sa kagamhanan sa hangin, sa espiritu nga karon nagabuhat diha sa mga anak sa pagkadili-masinulondon:

⁶³ “Mga anak sa pagkadili-masinulondon.” Ug kung ang anticristo, nga nagsugod sa pagka-masuso pa lang niini kaniadto nga dili na masinulondon, unsa pa kaha kung misangko na kini sa persona sa anticristo? Pagkamalimbongon na gayud niini! Unsa ka labaw pa kaha nga gahum sa pagpanglimbong sa kalibutan ang mahimo sa usa—usa ka hamtong na, kay sa usa ka masuso nga bata! Ug miingon siya, “Ang espiritu sa—sa pagkahisalaag nga karon nagapanglihok na diha sa mga anak sa pagkadili-masinulondon,” mga dili-masinulondon sa Pulong. Himatikdi. Karon gusto kong magpabilin mahitungod niini sa makadiyut, “mga anak sa pagkadili-masinulondon,” usa ka anak.

⁶⁴ Nakahibalo ba mo, kamo, nga ang sinugdan ninyo, mapamatud-an ko pinaagi sa Pulong sa Dios nga kamo, ang bisan kinsa man nga tawo dinhi, buhi na kaniadto sa inyong apohan-sa-tuhod. Ug gikan sa inyong apohan-sa-tuhod, gipanganak kamo ngadto sa inyong lolo, dayon sa inyong amahan, ug pagkahuman diha na kaninyo. Nahibalo ba mo niana?

Miingon ang Biblia, nagatoo ko nga sa Mga Hebreohanon 7 kini, nga, si Melquisedec, sa dihang mibalik na si Abraham gikan sa pagpamatay sa mga hari, “Nagbayad si Abraham kang Melquisedec og ikapulo sa tanang mga inagaw niya.” Ug ania si Pablo nga nagaingon karon, nga, “Si Levi, nga nagadawat og mga ikapulo, anaa pa sa . . . Nagbayad siya kaniadto og ikapulo, tungod kay atua na siya sa mga bat-ang ni Abraham sa dihang natagbo niya si Melquisedec.” Busa bisan unsa man ang gihimo ni Abraham, kung ingon-ana nahibal-an nato nga si Levi anaa na diay kaniadto kang Abraham, nga iyang apohan sa tuhod. Kang Abraham natawo si Isaac; kang Isaac natawo si Jacob; kang Jacob natawo ang mga patriarca, si Levi.

Karon, nan, inyong makita, nga ginapaklaro niini, ang predestinasyon.

⁶⁵ Karon, sa niini nga mga Mensahe, gusto ko nga—nga—nga hatagan og punto ang mga butang nga gisulti ko kaninyo sa Mensahe, mahitungod niining panggabii nga Kahayag nga giingon sa Dios nga motungha sa yuta.

⁶⁶ Ug himatikdi ninyo, dayon, “Ang mapintas nga mananap nga motungha sa yuta, magapahisalaag sa tanan kinsang mga ngalan

wala nasulat sa Basahon sa Kinabuhi sa Cordero, nga gipatay sa wala pa ang pagkatukod sa kalibutan.”

⁶⁷ Sa kaugalingong panghunahuna sa Dios; ang Dios, ang halangdong Espiritu. Sa sinugdan, sa wala pa ang sinugdan, Dios na Siya, ug nahibalo ba mo nga atua na kamo Kaniya kaniadto? Kung usa kamo ka Cristohanon karon, atua na kamo Kaniya kaniadto pa.

Ug dayon, kung ingon-ana, ang kinatibuk-ang pagka-Dios diha sa pagkalawas naporma diha sa Persona ni Jesus Cristo. Ug dayon sa dihang namatay si Jesus didto sa krus, namatay ako uban Kaniya, kay ako atua man Kaniya kaniadto pa; kay Siya mao ang kahupnganan sa Pulong, nga napadayag, nahibalo na nga igapadayag kita sa kaulahian. Ug atua kita sa Kalbaryo uban Kaniya. Gilubong kita sa lubnganan uban Kaniya. Ug nabanhaw kita uban Kaniya ug sa Iyang pagkabanhaw. Ug karon mikayab kita, pinaagi sa Iyang Espiritu, ngadto sa Trono sa grasya, nga nagalingkod na sa Langitnong mga dapit diha kang Cristo Jesus. Hangtud sa kahangturan!

⁶⁸ Kay maingon man nga ang binhi sa natural nga kinabuhi nga naipasa-pasa, nga nagaka-germitize gikan sa usa ka amahan ngadto sa usa ka amahan, sa usa ka amahan, ngadto sa usa ka amahan, nagaka-germitize usab ang Kinabuhi ni Cristo.

Mao kana’y hinungdan nga ginagamit sa Dios ang Espiritu ni Elias sa lima ka nagkalainlaing higayon. Unsa man kini? Pagpanunod kini.

⁶⁹ Sama lang sa inyong natural nga kinabuhi ug mga kinaiya nga naipasa gumikan sa natural nga pagpasanay sa inyong amahan, mao usab ang Espiritu sa Dios, nga gipili nang daan sa wala pa ang pagkatukod sa kalibutan.

Ug sa diha nga ang tibuok Pulong sa Dios, ang kinatibuk-an niini, mipaingon sa usa ka tawhanong lawas nga gitawag og Jesus Cristo, gipabayad ako sa Dios didto alang sa akong mga sala, diha Kaniya kaniadto. Dayon gipabangon Niya ako, gibanhaw ako uban Kaniya, didto sa pagkabanhaw. Ug karon nagalingkod na kita uban Kaniya, nga aduna na’y gahum ug pagbulot-an ibabaw sa matag yawa. Oh, kung mahimo lang ninyong toohan ang gihatag sa Dios! Apan kung wala kamo nagalingkod didto, wala gyud kamo niini. Ug kung kamo nagalingkod man didto, ug wala nagatoo niini, ug mahadlok nga mamuhat, dili gayud ninyo kini magamit. Apan kung kamo nagalingkod gyud didto, inyo kining pagagamiton, tungod kay kamo gipili nang daan aron buhaton ang angay ninyong pagabuhaton.

⁷⁰ “Si Faraon,” sa pikas nga bahin, “gipatungha alang niini nga katuyoan,” nag-ingon ang Biblia, aron mamahimong Faraon. “Si Judas Iscariote usab gipanganak aron nga mamahimong anak sa kalaglagan.”

Karon himatikdi ninyo kining bantugang mga Kamatuoran nga hapit na natong pagahisgotan.

⁷¹ Karon nakita nato nga nagdumili ang iglesia sa pagdawat sa Pulong sa Dios aron nga mao unta ang magadumala kanila, ug si Barrabas hinoon ang gidawat. Karon, kung gusto ninyo ang Kasulatan mahitungod niini, kini'y sa Mateo 27:15 hangtud 23. Unsa ma'y gihimo niini? Unsa man nga resulta ang gihimo niini? Karon hunahunaa ninyo kini. Sa diha nga ang kalibutan sa iglesia, sa organisado nga kinabuhi niini sa mga matarung, balaan nga mga tawo, sama sa pagdahum nila sa ilang kaugalingon, ug sa mata sa mga tawo, bisan pa niana gilansang nila si Jesus sa krus, ug miingon, "Dili kami mosugot sa niining Tawo nga maoy mangulo kanamo." Ug si Jesus mao ang kahupnganan sa Pulong sa Dios. Ang Unang Juan 1, nagasulti niini. Ug miingon sila, "Dili kami mosugot sa niining Pulong sa Dios nga maoy mangulo kanamo." Bisan pa nga, Siya mao ang Pulong, apan gibutahan ang ilang mga mata sa kung unsa gayud Siya. Kay Siya man mao ang direktang tubag sa matag propesiya nga mahitabo Kaniya.

Karon, kitang tanan nagatoo niana, tungod kay ginabalikan nato kini aron makita nga nangahitabo kini kaniadto. Apan kung ang kalibutan, nga mao karon, kining sa karon nga dautan nga kapanahonan, mao ang atua kaniadto niadtong panahona, pagabuhaton usab nila ang mao ra nga butang nga ginabuhat nila karon, tungod kay sa gihapon mao ra kini nga Pulong, alang niini nga kapanahonan, nga napadayag. Pagabuhaton niya kini. Dili puedeng magabuhat sila og laing uban pa. "Mga anak sila sa pagkadili-masinulondon." "Gihatagan og gahum sa pagkahisalaag, aron managpanoo og bakak, ug pagahukman tungod niini."

⁷² Himatikdi ninyo sa dihang wala gidawat kaniadto sa kalibutan sa iglesia si Jesus, ang Pulong, nga napadayag niadtong panahona, tungod kay (ngano man?) gihubad man nila Kini sa lahi nga paagi. Apan angay unta nga naila nila nga Siya kadto mao ang Pulong, tungod kay ang tanan nga gisulti sa Dios nga Iyang pagabuhaton, gibuhat gyud Niya. Ug miingon Siya ngadto kanila, "Susiha ninyo ang mga Kasulatan alang niining panahona; ug kung wala Kanako ang kuwalipikasyon nga gisulti aron Akong pagabuhaton, kung ingon-ana ayaw Ako toohi."

Miingon sila, "Nagatoo man kami kang Moises."

⁷³ Ingon Siya, "Kung nagatoo kamo kang Moises, mitoo usab unta kamo Kanako, kay si Moises naghigot man bahin Kanako." Ug sa gihapon wala nila kadto nakita. Ang mismong Dios sa Langit nga naghimalasyon didto sa krus, ug ginasulti ang mao ra nga mga pulong nga giingon sa propeta nga Iyang igasulti, ug sa gihapon wala nila kadto nakita. Kita n'yo?

Sila dili man Niya mga kaliwat. Dili sila Pulong, dili ang Pulong; ug sila, bisan pa man, sila'y mga—mga relihiyoso kaayo. Apan dili sila Pulong, kay Kini—Kini ila unta naila ang posisyon Niini alang niadtong panahona.

⁷⁴ Himatikdi ninyo kung unsa ka maanindot ang pagkatakdo sa mga Kasulatan sa matag kapanahonan. Himatikdi karon.

Ug sa diha nga gibalibaran sa kalibutan sa iglesia ang Pulong sa Dios nga maoy mangulo kanila, gidawat nila ang usa ka mamumuno, nga si Barrabas. Unsa ma'y gihimo niini? Gituboy niini si Satanas, ang dios sa niining dautan nga kapanahonan, ngadto sa puwesto nga dugay na gyud niyang gipangandoy.

Karon paminaw. Kay, si Satanas wala giingon nga mao ang dios sa laing uban pa nga kapanahonan kondili sa niini ra nga kapanahonan. Wala giingon nga siya mao ang dios sa kapanahonan ni Noe. Wala giingon nga—nga siya mao ang dios sa kapanahonan ni Moises, ang dios sa kapanahonan ni Elias. Kondili, sa niini rang dautan nga kapanahonan, siya mao ang . . . Oh, ayaw ninyo kini sipyata! Siya mao ang dios sa niining dautan nga kapanahonan, nga ginasimba sa minilyon ug binilyon ka mga tawo, ug wala sila nakahibalo niini. Apan tugotan nato ang Kasulatan nga ibutyag siya niining buntaga, ug tan-awon nato, dayon inyong mahibaloan. Tugoti ang Kasulatan . . .

⁷⁵ Sama sa pagpang-ila diha sa mga panagtigum, pag-mopataliwala na ang Balaang Espiritu sa Iyang Pulong ug tawgon kining lalaki ug moingon, “Wala ka'y katungod nga makigpuyo kauban niining laing babaye nga dili mo asawa. Para sa unsa nga gibuhat mo man kadto, napulo na ka tuig ang milabay, sa dihang gipuyo-puyo mo ang babaye nga may bana na?” Unsa ma'y ginahimo Niya? Ginatug-an sa dayag ang lalaki, ginabutyag si Satanas, nga maoy naggapos sa maong lalaki, o sa babaye nga nakigpuyo sa bana sa ubang babaye, o ang mga kasal-anan nga gihimo nila, ang mga butang nga gihimo nila. Unsa ma'y ginahimo niini? Ginabutyag siya.

⁷⁶ Mogamit og mga instrumento ang mga doktor ug paningkamotan nga hibaloan kung unsa'y sakit. Dili nila mahimo kini. Dili nato mahibal-an. Apan nagaabot ang Balaang Espiritu ug ginapadayag kung unsa siya, ug ginabutyag siya. Kita n'yo? Ingon niana ang Pulong sa Dios. Kahayag kini nga nagadan-ag diha sa kangitngit.

Ug sa dihang may madungog kang kabanha sulod sa lawak, nga daw sa misterioso kini; daw sa kung unsa nga nagalihok, ug wala ka mahibalo kung unsa kini. Ablihan mo lang ang suga, sa gilayon . . . Mga gangis, mga uk-uk, sila—mga anak sila sa kangitngit. Ug pagmosiga na ang suga, magkatibulaag sila og panagan.

“Nanghawa sila gikan kanato tungod kay dili man sila ato,” nag-ingon ang Biblia. Kita n'yo? Dili sila mahimong mabuhi

diha sa Kahayag sa kalibutan. . . Kay, gipadala man sa Dios sa Langit ang Iyang Kahayag sa niining kaulahiing mga adlaw, aron madan-agan Niya ang dalan sa Iyang mga anak, aron sila dili managpanglakaw diha sa kangitngit ug mangapandol, kondili aron managpanglakaw sila diha sa Kahayag sa pagdan-ag ni Jesus Cristo, ang mao ra sa gihapon kagahapon, karon, ug hangtud sa kahangturan. Amen!

⁷⁷ Himatikdi, wala gitawag si Satanas ingon nga dios sa uban pa nga kapanahonan kondili sa niini ra nga kapanahonan. Gipangandoy na gyud niya nga mamahimong sama sa Dios, sukad pa kaniadto sa sinugdanan.

Atong basahon kana. Hinay-hinayon lang nato. Balikan nato sa. . . Kita n'yo, gisulat ko kini dinhi, Isaias 14. Balikan nato dinhi sa Isaias 14, sa makadiyut, ug tan-awon kung unsa'y giingon sa Dios. "Ang dios," kung unsa'y gihimo ni Satanas. Isaias 14:12 ug 14. Himatikdi.

Naunsa ang pagkahulog mo gikan sa langit, O Lucifer, anak sa kabuntagon! naunsa ang pagkalumpag mo ngadto sa yuta, nga ikaw man unta ang nagalumpag sa mga nasud!

Kay ikaw miingon diha sa imong kasingkasing, Ako mokayab ngadto sa langit, ituboy ko ang akong trono sa ibabaw sa mga bitoon sa Dios (mga anak sa Dios, karon): ug ako magalingkod sa bukid nga tigumanan, sa kinatumyang mga dapit sa amihanan:

⁷⁸ Gipangandoy na ni Satanas kaniadto nga simbahan siya nga sama sa Dios. Gikuha niya ang duha-sa-tulo, duha-sa-tulo sa mga bitoon sa Langit. Mikayab siya mismo sa ibabaw niadtong mga bitoon, ug nagwali kanila, ug gilimbongan ang duha-sa-tulo kanila. Nakita n'yo ba kini? Sige. Himatikdi, mao kadto ang iyang pangandoy.

Ug karon andam na siya, kauban sa iyang gipili og ayo, nga edukadong pangasaw-onon nga gi-edukar sa kaugalingon niyang kahibalo, kita n'yo, pinintalan og ayo sa iyang pagpanglimbong, sa dagkung mga bilding ug dagkung mga denominasyon, ug sa mga pintal sa kahibalo ug teolohiya, ug mga maantigo ug intelektuwal, ug edukado, aron pagalimbongan ang tibuok kalibutan, ug aron nga mamahimong "dios." Mao kana ang gibuhat niya. Paingon kini ngadto sa persona sa anticristo, nga human nang gipurongpurongan ingon nga "puli ni Cristo," sa iyang pangasaw-onon nga mahiligugmaon sa kalibutan, siyentipikanhon, nga nabistihan og ayo sa garbong intelektuwal, ug relihiyosong edukasyon. Gihimo ang maong pangasaw-onon nga relihiyoso sama niya, ug pinaagi sa kinaugalingon niyang interpretasyon sa Pulong sa Dios sama sa gihimo niya kaniadto kang Eva, ug sama usab sa gihimo sa anak niya nga si Cain.

Karon moingon kamo, "Anak ni Satanas?"

⁷⁹ Ipakita kanako ang usa ka dapit sa Biblia kon diin gitawag si Cain nga anak ni Adan. Ang Biblia miingon nga siya mao “ang anak niadtong maong dautan,” binhi sa serpente. Dili, gitangtang na karon ang maong tabon, igsoon. Naablihan na ang piramide, sama sa gipakita sa maong kapadayagan.

⁸⁰ Bantayi kung unsa’y iyang buhaton, ang iyang mga panghunahuna. Abi niya og nagapuyo ang Dios sa kalibutanong katahum. Gihimo niya kini kaniadto sa Langit. Wala nagsugod ang sala didto sa tanaman sa Eden; nagsugod kadto sa Langit, sa dihang si Lucifer, ang anak sa kabuntagon, gituboy niya ang iyang kaugalingon diha sa katahum, ug nangandoy og mas matahum pa nga gingharian kay sa kang Michael. Ug nagdahum siya nga nagapuyo ang Dios sa katahum.

⁸¹ Ug himatikdi ninyo si Cain. Dili niya gusto nga maghalad og dugo kaniadto. Miadto siya didto ug naghalad og prutas, o—o mga kaumahan sa katahum sa iyang altar. Relihiyoso kaayo, gihimo ang tanan, nga, eksaktong sama gayud sa gihimo ni Abel; naghalad og usa ka halad, mihapa sa atubangan sa Dios sa pagsimba, masinugtanon sa tanang paagi, apan walay kapadayagan sa Pulong.

Ug ang Pulong, sa sinugdan pa lang, plano na sa Dios. Apan nagapadayag ang Dios, pinaagi og mga pagpadayag, ang mismong butang nga iyang gipanghimatud-an ug gipuntohan nga kana mao’y husto. Dili relihiyon, dili usa ka altar, dili pagpahisakop sa iglesia, dili ang paghalad og halad, dili ang pagkasinsero; kondili pinaagi og kapadayagan sa Pulong sa Dios. Ang Dios nga nagapadayag kaniya kung unsa ang. . .

Ang iyang inahan wala man mikaon og mansanas nga gihatag kaniya sa bitin, kondili nagkaaduna siya og pagpakighilawas sa persona ni Satanas, diha sa porma sa mananap; dili sa usa ka nagkamang nga mananap, kondili sa pinakamaalamon, pinakamalalangon sa tibuok kapatagan, tawo mismo ang porma, ang mananap nga mao lamang ang puedeng mosagol sa kaliwat sa tawo. Karon ginapaningkamotan sa siyensiya nga pangitaon siya. Ug dili gyud nila siya makit-an, tungod kay nausab na ang matag bukog sa iyang lawas. Apan ang Biblia nagapahayag nga ingon gayud niadto ang nahitabo.

⁸² Himatikdi ninyo kung unsa’y buhaton sa niini nga tawo karon. Kini nga tawo, “Magalingkod siya sa templo sa Dios,” nga mao, ang iglesia, “nga ginapahayag ang iyang kaugalingon ingon nga Dios.” Karon kung gusto ninyong basahon kana, kana’y sa Ikaduhang Mga Taga-Tesalonica 2:3 ug 4, ug Pinadayag 13:4, 11 ug 12; kon diin gisulti, sa duha ka propeta, si Juan ug si Pablo, kung unsa kini nga tawo sa kaulahiing mga adlaw. Karon basaha ninyo kana, tungod kay aduna pa ako og gisulat dinhi. Apan akong . . . aron makadaginot ta og panahon karon.

⁸³ Ang adlaw nga atong gikinabuhian karon ginatawag, sa Biblia nga, “ang adlaw sa tawo,” adlaw nga iya sa tawo. Dili kini adlaw sa Dios. Ang Dios dili mao’y dios sa niini nga yuta; ang Biblia nagaingon nga Siya dili. Siya mao ang Dios sa Langit. Apan dili kini adlaw sa Dios.

Kini mao ang adlaw sa pagpili. Mahimong, magkinabuhi ka alang sa karon, ug mamatay; o pilion ang Dios, ug mabuhi. Ug ang Dios mao man ang Pulong, ug ang Pulong karon mao ang napadayag nga Pulong alang sa niining takna ug adlaw.

⁸⁴ Himatikdi, “ang adlaw sa tawo.” Kung gusto ninyong isulat kana, ako unta kining basahon. Apan Unang Mga Taga-Corinto 5:1-5. . . Unang Mga Taga-Corinto 4:1-5, pasayloa ko, Unang Mga Taga-Corinto diay 4:1 ug 5, kon diin nagahisgot si Pablo mahitungod kaniya nga pagahukman sa tawo, sa adlaw sa tawo.

⁸⁵ “Ang maong adlaw, nganong gitawag mo man kini og adlaw sa tawo?” moingon kamo. Kini mao man ang adlaw nga nahimaya ang mga buhat pinaagi sa kahibalo sa tawo.

Tan-awa kung unsa, ang tanang pagpanghinambog sa mga komunista, mga tawong nagapaninguha nga mapaadto ang tawo ngadto sa bulan. Ang Dios nagapaninguha pud nga mapaadto ang tawo ngadto sa Langit. Kita n’yo? Apan tan-awa ninyo ang minilyon ug binilyon ug trinityon nga dolyares nga gipanggasto nila, sa inusik nga mga pagpaninguha. Pagmoabot na sila didto, wala gayud sila og unsa man nga mahikaplagan didto. Unsa na man ang nahitabo kanila?

Dili ko igsapayan kung unsa man ang bulan. Gusto kong labyan lang ang bulan sa ingon ka paspas nga dili ko na gani makita kini; diretso lang nga nagapaitaas. Gusto kong labyan lang ang Milky White Way, nga diretsong, nagapadayon lang. Oo!

⁸⁶ Ug ang kalibutan sa karon bug-os nang ginatunong ang ilang mga kaugalingon ngadto sa kahibalo nga nagagikan kang Satanas. Ug nahimaya ang adlaw sa tawo, dili pinaagi sa Pulong sa Dios, kondili pinaagi sa kahibalo nga nagkaaduna siya.

Karon hunahuna ninyo. Ipatuhop gyud kana. Ug sa dihang ipatukar ninyo kini nga teyp pag-usab, sa niini nga bahin dinhi, paghunong sa makadiyut ug maghunahuna.

Ang iyang mga buhat ginatuboy nga mas labaw pa kay sa Pulong sa Dios ug sa mga buhat nga gipadayag; mas ang kaalam pa ni Satanas, nga gihatag niya kang Eba kaniadto sa sinugdanan. Karon paminaw; ayaw ninyo sipyata kini. Ang kaalam ni Satanas mao na ang ginatuboy ngadto sa trono sa pagsimba, sa tawo, nga mas labaw pa kay sa gipanghimatud-an nga Pulong sa Dios alang sa niini nga panahon. Ginapamatud-an kana sa atong mga kaiglesiahan pinaagi sa ilang—ilang mga seminaryo, mga eskwelahan sa kaalam, nga mas may nahibaloan pa kono kay sa nahibaloan sa Pulong sa Dios mahitungod

Niini, sa pagdahum nila. Ug dinha, si Doktor *Ingon niini-ug-ingon niana*, ug si Magtutudlo *Ingon niini-ug-ingon niana*, ug si Propesor *Ingon niini-ug-ingon niana*, ginatuboy ang ilang kaugalingong kahibalo, nga ang tawag nila (gikan kang Satanas) kamatuoran, ingon nga mas labaw pa kay sa gipanghimatud-an nga saad sa Dios, nga gipaklaro diha mismo sa atubangan nila. Ug nadala niini ang tawo. Kita n'yo?

⁸⁷ Ang mga siyentipikong kalampusan sa tawo, nagapaninguhang pamatud-an nga sayup ang Pulong sa Dios. Hunahunaa lang ninyo kana. Siya, ang iyang, kanang, teolohiya sa tawo, ginasaysay niini ang Pulong sa Dios ngadto sa mga tawo, ug ginapaka-walay pulos Kini pag-usab, sama sa gihimo niya kaniadto sa denominasyonghong kapanahonan sa diha nga mitungha si Jesus ibabaw sa yuta. Miingon si Jesus, “Kamong mga maut! Kamo, tungod sa inyong tradisyon,” nga maoy ilang interpretasyon, “gikuha ang Pulong sa Dios ug gipakawalay pulos Kini ngadto sa mga tawo.” Ug mao ra sa gihapon nga butang ang ginahimo nila karon. Nawad-an na Kini og kapuslanan.

⁸⁸ Himatikdi, “Sila,” ang mga tawo, “nga ginatuboy siya batok sa tanan nga ginatawag og Dios.” Dili ba ginaingon man sa Ikaduhang Mga Taga-Tesalonica nga pagabuhaton nila kana? Ug ang pagbulot-an sa usa ka denominasyonghong iglesia, mas ginatoohan sa mga tawo kana nga denominasyon kay sa pagtoo nila sa Dios. Ug ang Dios mao man ang Pulong. Mas ginatoohan pa nila ang ilang denominasyonghong kredo kay sa Pulong, mao nga “ginatuboy siya batok sa tanan nga ginatawag og Dios.” Ug aduna lamang og usa ka Dios, ug mao kana ang Pulong.

“Batok sa tanan nga ginatawag og Dios; busa siya ingon nga sama sa Dios nga nagalingkod sa iglesia sa Dios, nagapamatuod nga siya kono mao’y Dios,” tungod kay nadani man niya ang mga tawo nga simbahan siya. Ang Dios mao ang Pulong. Ug ginatuboy niya ang iyang kaugalingon batok sa tanan nga ginatawag og Dios. Ug aduna lamang og usa ka Dios, ug kana nga Dios mao ang Pulong. Kita n'yo? “Ug sa tanan nga ginatawag og Dios,” mao nga, ang dios sa niini nga kapanahonan ginatuboy niya ang iyang kaugalingon batok sa tinuod, ug gipanghimatud-an nga Pulong sa Dios. Kana’y San Juan 1. Kita n'yo? “Batok sa tanan nga ginatawag og Dios, busa siya ingon nga sama sa Dios nagalingkod sa templo sa Dios,” nga aduna na’y pagbulot-an.

Tan-awa ninyo, ug ginadayeg siya tungod niini! Oh, tugoti ang mga tawo, Dios, nga makita kana nga pagpanglimbong! Ginadayeg siya tungod niini, ug mahinuklogon pa nga ginatoohan sa mga tawo niining dautan nga kapanahonan. Karon makita ba ninyo ang mao nga dios ug ang mga alagad niya sa niining dautan nga kapanahonan?

⁸⁹ Karon tan-awon nato kini sa diha nga ginapadayag kini. Ginaingon niya nga nagahimo siya kono og mas maayo nga kalibutan aron pagapuy-an nila, pinaagi sa iyang kahibalo nga walay-labot ang dili-mapakyas nga Pulong sa Dios. Apan tungod sa iyahang, pinaagi og mga denominasyon, ug mga kredo, ug pagka-intelektuwal, ug pagka-siyentipiko, ug uban pa, nagahimo siya og mas maayo nga kalibutan aron nga puy-an sa tawo, ug ginabalewala ang saad sa Dios, nga ang panahon lamang nga mamahimong angayan puy-an sa kalibutan mao'y didto na sa Milenyum. Kabalo mo, sa opinyon ko, nagahimo siya og mas maayo nga kalibutan aron sa pagpakasala imbis nga pagapuy-an.

⁹⁰ Himatikdi. Gihimo ba diay niya kini? Gihimo niyang legal ang kasal-anan. Gihimo na niyang legal ang mga pag-inom og bino, ang mga pagpanigarilyo. Ug diha sa mga kaiglesiahan, gihimo nang legal nga ang usa ka babaye puede na mahimong miyembro sa iglesia, bisan mubo ang buhok. Karon hinaut nga mohunong una kamo sa makadiyut.

⁹¹ Mahimo na siyang magsul-ob og mga short, mangmeyk-ap, ug miyembro ra sa gihapon sa iyang relihiyosong pundok, nga diin bug-os kaayong sukwahi sa Pulong sa Dios. Nagaingon siya nga okey lang kono kana. Nakita n'yo na ang iyang kahibalo? "Unsa ma'y kahilambigitan niana sa usa ka babaye?" Sama ra kana sa pag-ambit sa ginadili nga bunga, o sa dili mo pag-ambit sa maong ginadili nga bunga, ingon niana kini. Nagsulti na ang Dios nga dili niya kadto kaonon, apan gikaon gyud niya.

⁹² Ug gitooan siya sa babaye, ug gihigugma siya sa maong babaye tungod niadto. Gikapongtan sa babaye ang Dios. Ang iya mismong mga buhat ang nagapamatuod niana. Ginaingon sa babaye nga ginahigugma kono niya ang Dios, apan ang ginahigugma niya si Satanas. Ginasimba niya ang dios sa modernong urog, ang dios sa kalibutan, ang mga diosa sa Hollywood. Ginahigugma siya sa maong babaye, apan gikapongtan sa maong babaye ang tinuod nga Pulong sa Dios, nga mao lamang ang bugtong tinuod nga Dios.

Ginahimo na kining legal sa mga kaiglesiahan. "Wala ma'y dautan. Mahimo rang buhaton sa among mga kababayan-an ang *ingon niini*, *ingon niana*, o ang *uban pa*." Apan sa Presensiya sa buhi nga Dios, dili gani siya mapahanugotan nga moduol, gawas kung naghinulsol siya.

⁹³ Makita, nga siya mao ang dios sa kalibutanong katahum, si Satanas. Gusto sa babaye nga mahimo siyang matahum tan-awon. Ug si Satanas mao ang dios sa katahum, sa sinugdanan pa lang. Mahimo niya, ug milampus siya pinaagi sa iyang kahibalo sa siyensiya ug mga materyales, aron ipatahum kining iyang, kining modelo nga kapanahonan. . . kining moderno nga kapanahonan, diay, sa kadautan. Napatahum kini.

⁹⁴ Himatikdi ninyo. Angay kining himatikdan. Sa sinugdanan kaniadto, si Seth ug ang iyang mga anak wala gyud napaingon sa siyentipiko nga dalan.

Karon maghisgot kita mahitungod sa siyensiya sa pipila ka minuto. Kung ako man kining isulti, dili ingon nga ipangatarungan ang akong pagkawalay-edukasyon; apan, sila ang maoy pundok sa mga walay hibangkaagan, ang bisan unsa man nga ginasalikway ang Pulong sa Dios. Kita n'yo? Sigurado.

Angay kining himatikdan. Tan-awa ninyo kini. Ang mga anak ni Seth walay gayud nahiadto sa siyentipiko nga dalan. Sila'y yano ra nga mga magbalantay sa kahayopan, mga mag-uuma, ug uban pa.

Apan ang mga anak ni Cain mao ang nahiadto didto. Ngano man? Nadihogan man sila sa ilang papa, ang yawa. Si Cain, nga nadihogan sa iyang papa, ang yawa, ug nadihogan sa mao nga binhi ang tanan nang nagsunod nilang mga kaliwatan.

⁹⁵ Tan-awa ninyo ang mga kaliwat nga iya sa Dios hangtud sa tanang kapanahonan, ug tan-awa kung diin na kini nagapadulong karon. Ang mga Cristohanon, mga tinuod nga Cristohanon, dili sila nahilambigit sa siyentipikong mga pagtuki ug mga ingon niana. Dili. Sa makadiyut lang, moabot ra kita dinha.

Apan ang mga kaliwat ni Cain napaingon niana, gipanunod lang ang kinaiyahan sa ilang amahan, ang yawa, nga puno sa kalibutanong kahibalo, katahum, ug siyensiya, ug uban pa. Siyentipiko ang mga anak ni Cain. Mga edukado sila. Sila mao ang mga tigtugtug sa musika—mga instrumento sa musika; usa ka modernong Elvis Presley, nga ang uban nianang butang nga sama niana ginapahanugotan pa gani sa hunta sa eskwelahan nga ipahigayon dinhi sa kalsada matag Sabado sa gabii. Mga magtutukod og siyudad, ginapatahum ang mga kababayan-an alang sa kaugalingon nilang mga pagpangibog, maingon nga ginapameyk-ap sa yawa ang mga kababayan-an, ug ginapaputlan ang ilang buhok, ug ginapasul-ob sila og mga short, ug mga butang nga sama niana. Sila, alang lang kana sa kaugalingon niyang mahilas nga mga pagpangibog. Diretsahan gayud kana, apan wala na ako'y hingsayran nga ubang paagi sa pagsulti niini.

⁹⁶ Karon, nahibaloan nato nga ang ebanghelyo ni Satanas mao ang ebanghelyo sa siyensiya ug kauswagan. Giwali niya kana didto sa Eden; dili ang Dios; si Satanas maoy nagwali, sa siyensiya sa pag-uswag. Ang siyensiya ug kauswagan mao ang ebanghelyo ni Satanas. Tan-awa ninyo kon diin niya kita gidala karon, pinaagi niana. Kita n'yo?

⁹⁷ Himatikdi, giwali niya kana didto sa Eden, kang kinsa? Sa pangasaw-onon ni Adan. Ug nahulog niana ang maong babaye. Gilingla niya ang babaye aron duhaduhaan ang usa sa mga

Pulong sa Dios. Tan-awon nato kung unsa kaha ang giingon niya. Tingali'g miingon siya, “Dili siyentipiko nga mamatay, sa niining balaan nga iglesia.” O, “Kinahanglan nga mapaeskwela ka ug mamahimong edukado, aron dili na lang basta toohan ang ingon-anang dili makatarunganong butang sama sa kamatayon. Dili ko igsapayan kung gisulti man kana sa Pulong sa Dios; dili kana makatarunganon.”

⁹⁸ Oh, tan-awa ninyo siya karon. “Ang Dios usa man ka buutan nga Dios. Anaa kamo sa Iyang balaan nga iglesia; aba, dili kamo mahimong mamatay.” Apan miingon ang Dios nga mamatay gyud kamo, ug mao na kana. Makita ba ninyo siya karon? “Oh, magpamiyembro lang sa iglesia. Kini dili ingon sa kon unsa ang ginahimo n’yo, o *ingon niini*, *ingon niana*, o *uban pa*. Pagsimba lang ug magbinuutan lang ingon nga miyembro. Ang dili-pagpaputol sa inyong buhok, binuang ra kana. Ug ang pagsul-ob og mga short, ug ang pagpangmeyk-ap, ug ang pag-adto sa mga sayawan, ug diyutay’ng beer usahay, dili man kana makapadaut kaninyo, basta dili lang kamo magpalabi niana. Sa tinuod lang, gusto ko gani nga kamong mga kabataan matilawan ninyo kini, aron nga mahibaloan nila kon magustohan ba nila kini o dili.” Mao kana siya, ang dios sa niini nga kapanahonan, sa niining dautan nga kapanahonan.

⁹⁹ “Ang Dios usa ka buutan nga Dios.” Nadungog ko na kana sa makadaghang higayon hangtud nga napul-an na gayud ako. Ang Dios usa usab ka Dios sa hustisya. Dili Siya usa ka lolong tigulang nga giango-ango na nga mahimo na lang ituklod-tuklod dinha, ug nga wala man lang sala ang mga apo Niya. Siya’y usa ka Dios sa hustisya ug pagkabalaan. Gipamatud-an na Niya kana didto sa tanaman sa Eden, didto sa una Niyang mga anak. Paggilapas mo kana nga utlanan, usa sa Iyang mga Pulong, mamatay ka gyud. Nagaaplikar sa gihapon ang maong butang sa karon.

¹⁰⁰ Ug himatikdi ninyo, giwali niya kadto nga matang sa siyentipiko, pangkatilingban, edukado, mauswagon nga ebanghelyo ngadto kang Eva, ug gitoohan kadto sa pangasaw-onon ni Adan. Ug nagmalampuson gayud siya sa pagpuno sa gapatawag nga pangasaw-onon ni Cristo, ang iglesia sa Ikaduhang Adan, sa mao ra nga mga pangatarungan. Husto kana.

¹⁰¹ “Oh, dili—dili man ingon niana ang Dios; maayo kaayo ang Dios aron himoon kana. Aba, basta nagasimba lang kamo. ‘Kung nagatoo ka lang.’” Nagatoo man ang yawa; dili nga nagapatoo-too lang, kondili nagatoo gayud siya. Dili lang siya luwas. “‘Kung nagatoo ka lang.’” Huh!

¹⁰² Giingnan niya ang ikaduhang pangasaw-onon, o ang Pangasaw-onon sa Ikaduhang Adan, sa mao ra nga giingon niya sa unang pangasaw-onon. Sama sa, “Karon, ang Balaanong

pagpang-ayo, wala gayu'y ingon-anang butang. Mahimo namong pamatud-an kana. Wala sukad og ingon-anang panghitabo nga napanghimatud-an na." "Ug kining bautismo sa Ngalan ni Jesus, karon wala ba mo mahibalo nga ako ang may pagbulot-an sa iglesia?" ingon niya. "Nasulbad na namo kana didto sa Nicaea, sa Roma," sa diha nga kadtong tulo ka mahugaw nga mga espiritu migula sa dragon, ang mga mini nga propeta, ug uban pa. "Nagatoo kami nga aduna gyu'y trinidad sa mga Dios." Oh, naunsa man itawon! Pagano kaayo kana. Ayaw gayud kamo pagduol sa atubangan sa Dios nga dala-dala ang butang nga sama niana, maninguha man lang nga mobarug sa Iyang Presensiya. "Oh, wala ma'y diperensya kung nabautismohan kamo sa mga titulo sa 'Amahan, Anak, Espiritu Santo.' Unsa ma'y kalainan niana?"

¹⁰³ Daku kaayo ang kalainan niana, hangtud nga gisugo mismo ni Pablo ang usa ka pundok sa mga Baptist kaniadto nga gikinahanglan silang mabaustismohan pag-usab sa Ngalan ni Jesus Cristo sa diha nga wala pa miabot ang Espiritu Santo ngadto kanila. Ug nagpahinungdan usab kadto nga mosinggit kadtong maong tinun-an, ug miingon, "Bisan pa og usa ka manulonda ang moabot gikan sa Langit ug magawali og unsa man nga lahi, ipatunglo siya." Sigurado gayud, aduna gyu'y kalainan. Oh, grabe!

¹⁰⁴ "Wala ma'y ingon nianang butang sama sa bautismo sa Espiritu Santo sa niining mga adlaw. Alang lang man kadto sa mga apostoles. Miagi na kana. Ug ang ingon nianang butang sama sa mga propeta? Wala man gani ka'y maila karon nga ingon niana. Mga milagro? Dili man kana nakabasi sa siyensya. Malaquias 4? Alang lang kana sa laing kapanahonan. Juan 14:12? Oh, dili man ingon niana ang ginapasabot ni Jesus niadto? Lukas 17:30? Oh, usa lang kana ka tinumotumo. Kita n'yo, sayup—sayup lang ang pagpasabot niana; wala man kana sa orihinal." Grabe nga mga binuang!

Sa dihang mikanaug man gani ang Dios nga Makagagahum sa Tanan sa atong taliwala ug gipamatud-an kini. Sa dihang miingon Siya, nga, "Si Jesus Cristo mao ra sa gihapon kahagapon, karon, ug hangtud sa kahangturan," gipamatud-an gyud Niya nga ingon niana kana. Dili ko igsapayan kung kinsa man ang moingon nga dili ingon niana kana; ginahubad man sa Dios ang Kaugalingon Niyang Pulong. Miingon Siya nga buhaton Niya kini nga butang sa kaulahiing mga adlaw. "Magkaaduna og Kahayag sa panahon sa kagabhion." Ug nagkaaduna gayud og Kahayag, alang sa pagpadayag sa Anak sa Dios.

¹⁰⁵ Ang mao ra nga adlaw nga nagasubang diha sa sidlakan mao ra usab kana nga adlaw nga nagasalop diha sa kasadpan. Miingon ang propeta, "Adunay moabot nga adlaw nga dili mahimong tawgon nga adlaw o gabii man." Makilumkilumon

kini, nga ang mga panganod, ginatabunan ang nawong sa adlaw. Apan giingon, “Sa panahon sa kagabhion motungha ang Kahayag pag-usab.” Ang mao ra nga Anak! Siya mao ang Alpha ug Omega. Ang mao ra nga Anak nga misubang sa silangan kaniadto gitagna nga mosubang pag-usab sa kasadpan, sa kaulahiang mga adlaw, sa dili pa matapos ang maong adlaw. Wala ako nakahibalo kon unsaon nila sa paghubad Niini; ang Dios man ang nagahubad sa Kaugalingon Niyang Pulong. Ginapamatud-an gyud Niya Kini. Mao na kini ang panahon sa kagabhion.

¹⁰⁶ Masubo, apan sigurado gyud nga nahulog siya niadto pag-usab. Nahulog niadto ang pangasaw-onon ni Cristo, ug gidawat ang intelektuwal nga kahibalo sa kung kinsa man nga magwawali sa seminaryo imbis nga toohan ang putli, gipanghimatud-an nga Pulong sa Dios.

¹⁰⁷ Karon sa mga ministro sa tibuok nasud kung asa man kamo, mahimong dili kamo mouyon Niini. Wala ko kamo ginadaut. Ginapaninguhaan ko lang-...Nagapakigsulti lang ako sa kaugalingon kong pundok. Ginapaningkamotan ko lang. . . Kung gusto ninyong molingkod dinhi, malipay gyud ako nga madungog ninyo Kini. Ug dayon paminaw kamo Niini. Kita n’yo? Apan ginasulti ko lang kanila kung unsa’y ilang—kung unsa’y ilang nakita, ug ginapakita kini nganha kanila; ginapamatud-an kini sa Dios, nga husto gayud kini. Kita n’yo?

Mao na kini ang takna. Wala na nagkinahanglan pa og kinsa man aron mohubad Niini. Ang inyong kalibutanong kahibalo walay bisan unsang. . .Mahimong aduna kamo og B.A., D.D., A.D., o unsa man kana; wala kana nagkahulogan ni unsa man. Ang Dios ang nagahubad sa Iyang Pulong, Siya Mismo. Gisaad na Niya kini, ug ania kini.

¹⁰⁸ Apan tungod sa pang-seminaryo nga kahibalo, denominasyonhong mga wali, “nagpahinungdan kini sa tibuok kalibutan nga nanghibulong sa mapintas nga mananap kinsang samad nga ikamatay naayo,” gikan sa pagka-pagano kaniadto ngadto sa iya na sa papa. Makita ba ninyo kung diin na siya nagapadulong? Ginatoohan niya kini. Ginatoohan sa maong babaye ang maong kahibalo nga ginaingon kaniya sa yawa.

¹⁰⁹ Ingon niana kini, karon tan-awa ninyo, ingon niana ang nahitabo nga ang duha ka pangasaw-onon nga minyoonon na unta mitoo sa kahibalo ni Satanas nga batok sa Pulong sa Dios. Mitoo ang pangasaw-onon ni Adan sa kahibalo ni Satanas nga batok sa Pulong sa Dios, ug ang pangasaw-onon pud ni Cristo mitoo sa kahibalo ni Satanas, sa niining intelektuwal ug dautan nga kapanahonan, nga batok sa Pulong sa Dios.

Ug himatikdi ninyo. Si Eva, diha sa natural, nga mitoo niadto, ug maoy nagpahulog sa tibuok kaliwatan sa tawo ngadto sa kamatayon. Ang natural nga pangasaw-onon! Si Adan, ang

natural nga lalaki sa yuta; ang iyang pangasaw-onon, sa wala pa niya nahimo sa maong babaye, ingon nga iyang asawa, gihulog na sa maong babaye ang tibuok kaliwatan sa tawo ngadto sa kamatayon. Kon kini siyentipiko man o dili, mamatay gyud gihapon kita, 'kay miingon man ang Dios nga mamatay gayud kita.

Bisan anaa ka pa sulod sa balaan nga Eden, o sa balaan nga iglesia, o sa balaan nga denominasyon, o unsa man kini, mamatay gayud ka sa adlaw nga dili mo toohan ang usa ka Pulong sa Pulong sa Dios ingon nga Kamatuoran, sa diha nga gipanghimatud-an na Kini ug gipamatud-an na diha kanimo. Kana mao ang adlaw nga imong ginapahimulag ang kaugalingon mo gikan sa Dios. Dili ingon nga usa gyud ka han-ay sa pulong; usa ra ka Pulong. "Ang kinsa man nga magadugang og usa ka pulong, o magataktak og Usa," kana mao ang adlaw nga mamatay ka.

¹¹⁰ Himatikdi, ang pangasaw-onon ni Adan maoy hinungdan sa natural nga kamatayon sa iyang kaliwatan, sa kaliwatan sa tawo.

Ug ang pangasaw-onon usab sa Ikaduhang Adan, ang pangasaw-onon ni Cristo nga minyoonon na Kaniya unta, maoy nagpahagbong sa tibuok iglesia ngadto sa denominasyonhong kamatayon, aron dawaton niini ang marka sa mapintas nga mananap, pinaagi sa siyentipiko, intelektuwal, ug dagkung mga denominasyon. "Mga Baptist kami. Presbyterian kami. Mga Pentecostal kami," ug uban pa. "Aduna kami og *ingon niini*, ug nanag-iya kami og mas daghang mga kabtangan. Kami, ilado kami sa gobyerno. Anaa kami bisan asa sa tibuok kalibutan," ug tanan nang ingon-anang mga butang. "Ug ang mga pinakamaayo, ug ang mayor sa siyudad, ug uban pa, nagatambong kanamo. Bisan ang Presidente nagatambong pud sa misa uban kanamo, ug nakaabot kami sa *ingon niini*, *ingon niana*, o sa *uban pa*." Ang tibuok kalibutan nahagbong na ngadto sa espirituhanon, denominasyonhon nga kamatayon; ang tibuok iglesia. Patay na siya!

Moingon mo, "Daghan ka na kaayo og ginalakip nga mga hisgotanan."

¹¹¹ Miingon si Jesus, "Maingon sa nahitabo kaniadto sa mga adlaw ni Noe, diin walo ka mga kalag ang nangaluwas, mao man usab sa pag-abot sa Anak sa tawo." "Sa mga adlaw ni Lot, diin tulo napahigawas gikan sa Sodoma, niadtong adlawa . . ." Karon adunay pundok nga nakagawas na, timan-i ninyo. "Apan, maingon sa nahitabo kaniadto, sa diha nga ang Anak sa tawo mapadayag na." Tan-awa ninyo kung unsa na nga adlaw, tan-awa ninyo kung asa na kita nagakinabuhi!

¹¹² Karon ang babaye ang nahimong hinungdan sa tibuok kalibutan aron dawaton niini ang siyentipikong pagpanguna sa

pang-edukasyon nga programa nga gihatag ni Satanang kaniya ilalum sa ngalan sa iglesia, ang pagpanguna sa usa ka pang-edukasyon, ug siyentipiko nga programa. Ginahulagway ko lang kaninyo ang dios sa niining kalibutan.

Sa dihang ang pangasaw-onon, sama ni Eva, ingon nga aduna na mismo ang pagpuno sa Pulong sa Dios diha sa iyang kamot, mahimo man niya unta nga dawaton ang Pulong sa Dios. Apan unsa ma'y gihimo niya Niana? Imbis nga hulaton ang bautismo sa Espiritu Santo, gitugotan niyang pamatud-an sa siyensiya kaniya nga ang Espiritu Santo para lang kono sa mga tinun-an kaniadto.

Imbis nga ipapadayon ang Balaanong pagpang-ayo, sa dihang nagapabangon na unta siya og mga patay karon ug nagahimo og dagkung mga milagro; gitugotan niya si Satanang, ilalum sa pagpanguna niini pinaagi sa usa ka relihiyosong tawo, nga gamiton ang Pulong sa Dios ug paninguhaong isulti nga alang kono Kini sa ubang kapanahonan. Ug gitooan niya kadto.

¹¹³ Sa dihang, miingon man ang Biblia, “Ang mga butang nga Akong ginabuhay inyo usab pagabuhaton.” Gisulti kana ni Jesus. “Panglakaw kamo sa tibuok kalibutan ug iwali ang Maayong Balita ngadto sa tanang binuhay.” Mga binuhay man usab kita. “Kini nga mga ilhanan maganunot sa matag usa kanila nga nagatoo.” Ginalimod niya ang matag tipik nga bahin Niini.

¹¹⁴ Ginalimod niya ang tanan nga supernatural, ug gibaylo niya Kini sa intelektuwal nga panghunahuna nga iya sa yawa mahitungod sa Biblia; diin ang mga pari, ug balaan nga mga pari, kono, diin ang mga obispo, mga arsobispo, diin ang pang-distritong mga presbyter, pangkinatibuk-an nga mga tagdumala, ug uban pa, gibutang na nila ang ilang kinaugalingong hubad Niini. Ug gibiyaan sila sa Dios, nga nangbuy-od didto, nga ingon niadto na ka patay sama sa alas dose.

Ang mga butang na lang nga nahibilin sa kaulahiyan nga mga adlaw mao ang usa ka gamay'ng pundok sa mga Pentecostal nga adunay mga musika nga ingon ka banha gayud, nagadagan ngadto-nganhi sa entablado, nagasulti og laing mga dila ug nanagsinggit, “ug nagabaton og dagway sa pagkadiosnon, apan ginapanghimakak ang Pulong.” Sultihan mo sila nga magpabautismo sa Ngalan ni Jesus Cristo; kataw-an ka lang sa imong atubangan. Apan, bisan pa niana, ang Dios nagapadayon sa gihapon nga ginahimo ang mao ra nga butang, ginapamatud-an ang Iyang Pulong nga mao ra sa gihapon.

¹¹⁵ Himatikdi, ang punoan nga gigamit ni Satanang nga nagpadani kang Eva nga moambit niadto, mao “ang punoan sa maayo ug dautan.” Usa kadto ka sinagol nga punoan.

Karon tan-awa ninyo ang adlaw nga atong gikinabuhian, ang adlaw nga nagapanawag Siya paggawas og usa ka Pangasaw-onon. Aduna Siya'y iglesia nga nagaangkon nga nagabuhat kono og maayo, apan dautan man diay, tungod nga ginalimod niini ang Pulong. Usa ka sinagol nga punoan. Oh, moingon, “Sila—aduna sila ug dagkung mga kapunongan. Sila—sila—sila—nagatabang man sila sa *ingon niini*. Ug gina-endorso kini sa Red Cross. Ug ang tanan nga mga eskwelahan, ilang. . . Tan-awa ninyo!”

Oh, apan ilimod mo lang ang usa ka Pulong, mao lang kana ang imong buhaton ug mamatay ka na; bisan unsa pa man ka intelektuwal, bisan unsa pa ka maayo kana. Miingon si Jesus, “Usa ra ka gamay'ng pudyot sa levadura magapatubo na sa tibuok nga minasa.” Usa lang ka gamay'ng bahin sa levadura dauton na niini ang kinatibuk-an. Usa lang ka Pulong sa Dios, nga gituis, dauton na niini ang tibuok Hulagway. Unsa na lang kaha kung ang akong bukton ania nahimutang dinhi diin angay'ng mahimutangan unta sa akong tiil? Kita n'yo? Unsa na lang kaha kung ang akong dalunggan ania nahimutang dinhi sa ubos diin angay'ng mahimutangan unta sa akong kamot? “Usa ra ka gamay'ng pudyot sa levadura patubuon na niini ang tibuok nga minasa.”

Moingon kamo, “Giunsa mo man sa pagpakahibalo nga Kini'y husto?” Ang Dios nagapamatuod nga husto Kini. Ginapanghimatud-an Niya Kini. Gisulti Niya Kini dinhi sa Pulong, dayon ginapamatuod-an Niya Kini. Ingon niana kon unsaon nato sa pagpakahibalo kung husto ba Kini o dili.

Ilimod mo lang ang usa ka Pulong mao ra gayud kana ang gikinahanglan aron mamatay. Nagdala kini og mao ra nga mga resulta sa niining dautan nga kapanahonan, espirituhanong kamatayon, sama sa gidala niini nga pisikal nga kamatayon kaniadto sa tibuok nga kaliwatan sa tawo.

¹¹⁶ Himatikdi ninyo kung giunsa pagdani ni Satanas niadtong siyentipikanhong panahon, sa panahon ni Noe kaniadto, nga nanagsalig sila sa kaugalingon nilang salabutan. Huh! Nagaingon ang Biblia kanato, diha sa Mga Proverbio, “Ayaw pagsalig sa kaugalingon ninyong salabutan.” Ug, “Ang matag pulong sa tawo bakak, ug ang sa Dios mao'y tinuod.” Apan si Satanas, pinaagi sa iyang kahibalo, sa sinugdang pa lang didto sa tanaman sa Eden kaniadto, nadani gyud niya ang mga tawo nga mosalig sa kaugalingon nilang salabutan. Ug, kabalo na mo, pinaagi sa iyang bantugang pang-Max Factor nga mga buhat nga gihimo niya kaniadto, napatahum niya og ayo ang mga kababayan-an nga nagpahinungdan kadto sa anak sa mga tawo. . . sa mga anak sa Dios, diay, nga mahulog sa sala ug pakaslan ang maong mga babaye. Oo. Siya. . . Matahum kaayo ang mga kababayan-an kaniadto, mga maanyag gayud.

117 Karon tan-awa n'yo na lang ang ordinaryo nga babaye diha sa dalan karon. Daghan kaninyo ang nakabasa na sa maong sugilanon; tingali og wala pa ninyo madungog kini, tungod kay wala pa ako kadto nga panahon. Si Pearl O'Brien, pila man ang nakadungog na mahitungod kaniya? Sigurado. Siya kono mao ang pinakamatahum nga babaye sa kalibutan kaniadto. Aba, wala na'y batang nagaeskwela karon kondili ingon na ka doble ka mas matahum pa kay kaniya. Nganong ingon man niana? Kay ang pagkaanyag sa mga kababayen-an mahitabo gayud sa kaulahiing mga adlaw.

Ginapapatlan na nila ang ilang buhok. Ginasul-ob nila kadtong mga sinina nga iya sa mga batang babaye. Nagasul-ob sila og mga short, ug mga bikini, ug kung unsa ma'y tawag ninyo, sa mga niini. Nagapangmeyk-ap sila, ug nagapang-lipstick, ug tanan na nga matang sa niining mga butang, aron himoon silang ingon niana nga dili sila. Kita n'yo? Apan pinaagi sa siyentipikanhong kahibalo nahimo nila ang pagkab-ot niini. Nakahibalo ba mo nga mas daghan pa ang ginagasto nga salapi alang sa kosmetiko sa mga kababayen-an, kay sa, dinhi sa Estados Unidos, duha o tulo ka pilo ang gidaghanon, kay sa ginagasto nga salapi alang sa pagkaon aron nga mabuhi? Napamatud-an kana nga, husto kana, para lang sa kosmetiko.

118 Himatikdi, "Nakita sa mga anak nga lalaki sa Dios ang mga anak nga babaye sa mga tawo," dili mga anak nga babaye sa Dios, "mga anak nga babaye sa mga tawo, nga mga maanyag sila," ug nagpahinungdan kadto sa mga anak nga lalaki sa Dios nga mahulog niadto nga pagpanglimbong. "Ug nanagkuha sila og niadto nga matang sa mga kababayen-an ug gipakaslan sila," ug nagdala kadto og kapanahonan sa prostitusyon, nga sama niini karon; sama kaniadto sa Sodoma, sama sa gipanagna na nga mahitabo karon.

Nga, ang mga kalalaken-an ug kababayen-an sa niining maong adlaw managbinayloay na og mga asawa. Kung dili nila gusto kini nga asawa, sila—moadto sila didto sa Reno, Nevada, ug magpakasal; ug, o kaha makigbulag, sa niadtong usa, ug magpakasal pag-usab sulod ra sa kinse minutos. Ug maanyag na kaayo ang mga kababayen-an nga halos dili na puede nga dili madani ang mga lalaki. Ug unsa man kini? Ang yawa! Kita n'yo na si Satanas nga anaa gihapon diha sa katahum? Himatikdi.

119 Himatikdi, kadto nga sala wala gayud napasaylo diha kanila. Kadtong maanyag, siyentipikanhong kapanahonan mao ang mismong dautan nga kapanahonan nga gilaglag sa Dios sa ibabaw sa kalibutan; kadtong maanyag, ug siyentipikanhon nga kapanahonan. Miingon si Jesus nga mahitabo kini pag-usab sa dili pa ang pag-abot sa Anak sa tawo. Husto ba kana? Himatikdi, nga miingon si Jesus, "Maingon sa nahitabo kaniadto sa mga adlaw ni Noe, mao man usab ang mahitabo sa pag-abot sa Anak sa tawo," sa dihang naningkamot silang tanan kaniadto nga

managminyo . . . Karon himatikdi, “Giminyoan sa mga anak nga lalaki sa Dios ang mga maanyag nga anak nga babaye sa mga tawo,” ug wala gayud sila gipasaylo sa Dios tungod niadto.

¹²⁰ Sama lang kaniadto sa pagpanudlo ni Balaam, nga nahimo niya nga ang maanyag, intelektuwal, siyentipikanhong mga kababayan-an sa Moab nga . . . tungod sa ilang madanihon nga mga mata, tungod sa ilang mga meyk-ap ug pulbos, tungod sa ilang humot kaayong mga pahumot, nadani gyud nila ang mga anak nga lalaki sa Dios; kumpara sa mga kababayan-an nila didto nga nagatrabaho ug aduna na’y mga kubal sa ilang mga kamot, nga wala pa gyu’y mga meyk-ap. Gidani sila, ug, “Managminyo kita sa usa’g usa, tungod kay kitang tanan managsama ra man.” Usa kadto ka bakak! Usa kadto—usa kadto ka bakak, ug usa kadto ka kalampusan sa yawa, nga madani ang mga anak nga lalaki sa Dios nga makigminyo sa—sa mga anak nga babaye sa mga tawo.

Usa kadto ka bakak sa yawa, alang kang Balaam, kadtong mini nga propeta, nga naninguhang magpropesiya batok kang Moises nga naningkamot nga mapabiling walay-sagol ang kaliwatan; ug miingon, “Buena, pareho ra man kita nagatoo sa mao ra nga Dios. Pareho ra man kita nagahalad og mao ra nga mga halad. Pare-pareho ra ang atong mga halad. Managsama ra natong ginahimo ang tanang butang.”

“Halos magkapareho ra gayud nga ipahisalaag niini ang mga Pinili kung mahimo pa.” Kita n’yo? [Blangko nga bahin sa teyp—Ed.] Pahilayo kamo kaniya, katawhan! Wala gyud kamo og bisan unsa man nga kahilambigitan kaniya!

¹²¹ Himatikdi, dili gayud mahitabo nga pagahubaron sa Dios ang Iyang Pulong ngadto sa dautan nga kaliwatan ni Cain. Dili. Dili gayud pagahubaron sa Dios ang Iyang Pulong ngadto kanila. Himatikdi ninyo . . . [Blangko nga bahin sa teyp—Ed.]

Ang Dios ba, sa kahibalo nga himoong maanyag kaayo ang kalibutan ug siyentipikanhon ug makasasala, kinahanglan ba Niya nga pagalaglagon kini? Buhaton ba kana sa Dios, nga himoong maanyag kaayo ang kalibutan; tan-awa ninyo kini, pagahimoon ba sa Dios nga maanyag kaayo ang Iyang mga anak nga babaye, ug pagabistihan sila nga makihilawason, aron ang mga anak Niyang lalaki managpangibog kanila ug manapaw? Unsa? Mohimo ba diay ang Dios og butang nga sama niana?

Kining hubo, naghubo-hubo nga pundok sa mga taga-Laodicea, nga nagasimba sa dios sa niining kalibutan, pinaagi sa ilang mga etiko, ug edukasyon, ug pagkamaliputon, ug pagkatahum! “Gumula kamo kaniya,” ang ingon sa Biblia, “ayaw pag-ambit sa iyang mga sala, ug ayaw pagdawat sa iyang mga hampak.” Magapaulan ang Dios og ulan nga yelo gikan sa kawanangan usa ka adlaw, nga ingon ka daku sa usa ka gatus ka libras kada usa, ug pagalaglagon siya pinaagi sa pagbato kaniya;

sama sa kanunay nang ginaingon sa Iyang Pulong nga ginabuhat Niya, tungod sa Iyang mga kasugoan.

Bueno, kung gibuhat man sa Dios ang ingon nianang butang, nga gipadayag ang Iyang Pulong ngadto sa mga tawo nga sama niadto, nan Iyang paga—pagadauton ang Mismo Niyang katuyoan. Dili buangbuang ang Dios. Siya mao ang tinubdan sa tanang kaalam.

Busa nakita na ba ninyo kung diin kana nga butang nagagikan? Nagagikan kini kang Satanas, ug sa gihapon iya kini ni Satanas. Ug ginatooan kini sa iglesia.

¹²² Karon nakita n'yo, mga kababayen-an, nga ginapaningkamotan ko lang nga ipakita kaninyo ang Pulong sa Dios. Miingon ang Biblia, “Kung ginapaputlan sa usa ka babaye ang iyang buhok, ginapakaulawan niya ang iyang ulo,” nga mao ang iyang bana. Ug ang iyang bana mao man ang ulo, kauban ang Dios, busa ginapakaulawan niya ang Dios ug ang iyang bana.

¹²³ Karon ginapakita niini kung si kinsa ang ulo niining sistemang iglesia sa kalibutan. Ginapakita niana kung si kinsa ang ulo niini. Si Satanas kini, diha sa porma sa usa ka labaw'ng tawo, tawo nga adunay kahibalo, hilabihan nga kahibalo. Mas daghan ang nahibaloan niya kay sa tanang uban pa kanila. Bisan unsa pa ang ginaingon sa Pulong, siya—aduna siya'y kaugalingon niyang interpretasyon Niini, kita n'yo, ang interpretasyon alang niining dautan nga kapanahonan.

¹²⁴ Himatikdi ninyo ang mga plano niya nga magtukod og usa ka daku kaayo nga denominasyonghong iglesia, ang World Council of Churches, kita n'yo, usa ka daku kaayo nga denominasyon, aron nga simbahon siya sa tibuok kalibutan, ang mapintas nga mananap, ilalum sa ngalan sa nagkahiniusang Cristianismo. Gusto n'yo bang basahon kana diha sa Biblia? Pinadayag 13:6 ug 8. Usa kini ka moderno nga tore sa Babel.

¹²⁵ Wala ba kamo mahinumdom kung giunsa ni Nimrod, kadtong tigpagawal, sa pagtukod niadtong daku nga tore ug gipabayad niya og buhis ang tanang uban pang gagmay'ng mga siyudad didto? Ang Lamlam ug ang Babel mao ra. Ginausab lang niini ang ngalan niini, ug, sa diha nga nagauswag kini. Kini mao'y, ang Roma karon mao ang Babilonia kaniadto. Ug ang tibuok kalibutan gidala na ngadto sa Babilonia, ug gidala kini pinaagi sa World Council of Churches nga mao magpayukbo sa matag usa kanila ngadto kaniya. Ug gidawat na ninyo ang marka sa mapintas nga mananap, nga walay pagkasayod kung unsay inyong ginabuhat. Tungod kay . . .

Apan kadtong mga pinili magapatalinghug gayud sa Pulong ug manggawas gikan niini.

¹²⁶ Supak gayud sa Pulong sa Dios ang denominasyon! Wala Siya sukad nagkaaduna og ingon niana ni usa, wala Siya

sukad nagpakigtigayon ni sa usa niini, ug dili gayud Siya magpakigtigayon sa ingon niana. Gusto kong ipakita kanako sa usa ka magsasaysay kon diin aduna sukad og usa ka propeta nga mitungha gikan sa iglesia. Ipakita kanako kon diin adunay gipanalanginan ang Dios og usa ka iglesia sukad-sukad nga . . . human nga nag-organisa kini. Napaingon kini sa displihanang na lang ug namatay, tungod sa intelektuwal nga kaalam nga gikan sa yawa, tungod sa ilang mga lider, ug tungod gibalibaran ang Pulong sa Dios sa diha nga nagatubo na unta Kini ngadto sa hingpit nga bantayog ni Cristo. Karon anaa na kini sa ulo. Supak na gyud kaayo!

Pagpahimulag kamo gikan nianang dili-nagatoo nga Eva, kamong mga anak sa panggabii nga Kahayag!

¹²⁷ Si Satanas, ang dios sa niini nga kapanahonan, pinaagi sa iyang kahibalo, ginadani niya ang mga tawo nga mokaon gikan sa iyang sinagol nga punoan sa maayo ug dautan. Himatikdi ninyo, si Satanas, pinaagi sa iyang kahibalo, nahimo niyang mapakaon ang mga tawo sa niining dautan nga kapanahonan diha sa iyang punoan sa maayo ug dautan. Nagaingon siya nga nagatukod siya kono og usa ka mas maayo nga Cristiano nga sibilisasyon, pinaagi sa iyang kahibalo sa maayo ug dautan, usa ka mas bantugan nga Cristianong sibilisasyon.

¹²⁸ Apan ang gamay'ng Ulay ni Cristo, Pulong, Panon, Pangasaw-onon, wala gayu'y pagtagad sa iyang kahibalo. Siya nagapabilin, nga halayo sa kaaway, nagapabilin nga halayo kaniya. Unsa ma'y . . . Karon hisgotan nato ang mahitungod kaniya, sa makadiyut. Nagahulat Siya sa Iyang Ginoo ug sa Iyang honeymoon ngadto sa Milenyum, mismo, nga kauban na ang Pamanhonon nga Pulong, ingon nga Siya man mao ang Pangasaw-onon nga Pulong.

¹²⁹ Ang kahibalo ug ang sibilisasyon, ug ang tinuod nga Cristianismo, wala og bisan unsa man nga pagkaparehas. Ang sibilisasyon, ug ang tinuod nga Cristianismo, wala gayud og bisan unsa man nga pagkaparehas.

Ang sibilisasyon mao'y pinaagi sa kahibalo. Nahibalo kitang tanan niana. Ug nagagikan ang kahibalo didto sa Eden, napamatud-an kana, tungod sa kung unsay giwali sa serpente kaniadto sa Eden. Ug nagaresulta og kamatayon ang kahibalo. Husto ba kana? Unsa man ang nahimong hinundan sa kamatayon didto sa tanaman sa Eden? Kahibalo. Tungod dili mamahimong iya kadto sa Dios, busa iya gyud kadto sa yawa. Whew, pagkaanindot niana! Ang kahibalo, siyensiya, ug edukasyon, mao ang pinakadakung babag nga nagkaaduna ang Dios sukad. Iyaha kini sa yawa.

Karon makadawat gyud ko og pipila ka mga sulat mahitungod niana, nasayod ko. Ginahulat ko ang mga niini.

¹³⁰ Tan-awa ninyo kung diin na kita gidala sa kamatutuan karon? Kita n'yo? Tan-awa ninyo kung unsay gihimo niini? Diin na man kita? Misalig na kita sa ingon nianang mga butang, tungod sa kaugalingon natong pagpanabut pinaagi sa atong siyensiya.

Moingon kamo, “Unsa na man ang mahitungod sa Dios, sa hunahuna mo ba nga pabor Siya sa pagkawalay-kahibalo?” Oh, dili.

Magatukod ang Dios og Kaugalingon Niyang matang sa sibilisasyon ibabaw sa yuta, sa diha nga Siya na ang magahari niini. Iya pa kini ni Satanas nga kalibutan; siya karon mao ang dios sa iyang kalibutanon nga siyentipikanhong kahibalo. Apan magpatungha ang Dios og Kaugalingon Niyang matang sa sibilisasyon. Dili kini mamahimong sibilisasyon nga sama niining sa karon. Timan-i lang ninyo kana. Dili kini mamahimong sibilisasyon nga aduna kita karon. Dili, dili. Mamahimo kining sumala sa Iyang Pulong ug sa Iyang katuyoan. Kay, ang dios sa niining kasamtangang dautan nga kapanahonan pagalaglagon man, ug ang iyang gingharian usab uban kaniya.

¹³¹ Kining modernong kapanahonan nga mahiligugmaon sa kaalam dili mamahimong magkaaduna og mas maayo nga lider kay sa usa nga aduna sila, nga mao si Satanas, nga usa ka magtutuis sa Pulong sa Dios, sama sa gisugdan niya kaniadto sa tanaman sa Eden, ingon nga usa ka relihiyosong tawo nga nagasalig sa kaugalingon niyang salabutan.

Sama sa giingon ko na kaganina, Mga Proverbio 3:5, nga, “Dili gayud kita magasalig sa kaugalingon natong salabutan.”

Siguradong aduna gyud sila’y gina-dios-dios, kay sila mga tawo man. Apan, ginapasagdan lang sila sa niini nga dios kung unsay gusto nila. Ingon nga usa ka tawo, sa kanunay, ang tanang tawo. . . Sa pag-abot nato dinhi kaniadto, nahikaplagan gani nato ang mga Indian nga nagasimba sa mga dios-dios, ug sa adlaw, ug sa tanan na. Ingon nga tawo, aduna gyud sila’y dios. Busa kining bantugang intelektuwal nga kapanahonan aduna gyu’y dios, mao nga nahimo kining. . . Ang nahimo nang dios sa niini nga kalibutan mao na ang kahibalo, denominasyon, siyensiya, “adunay dagway sa pagkadiosnon, apan ginapanghimakak ang Gahum niini.”

¹³² Himatikdi ninyo, ginapasagdan lang sila sa ilang dios kung unsay gusto nila. Nagapangibog sila sa unod, ug mao kana ang ihatag sa ilang dios kanila. “Gusto nilang magsul-ob og mga bikini. Ipasul-ob niya kini kanila. Kita n'yo? Kung gusto nilang buhaton ang *ingon niini* o *ingon niana*, ipabuhat niya kini kanila. Wala man kono og dautan niini; nagasimba man sila. Ang inahan nila Methodist man, Baptist, Pentecostal, Presbyterian. Ginapasagdan lang sila.”

Mao kana ang dios sa niini nga kapanahonan; maantigo, maalamon, siyentipiko. Wala na kini nagkinahanglan pa og pagtoo. Dili na kinahanglan niini nga pamatud-an ang bisan unsa. Human na kining napamatud-an, pinaagi sa ilang kahibalo. “Bueno, kami ang pinakadaku nga iglesia nga anaa sa tibuok lungsod,” ilang kahibalo. “Ang among pastor adunay D.D., Ph.D.” Kita n’yo, wala na nagkinahanglan og pagtoo; nagasalig ra sa kahibalo. Ginapasagdan ra sila nga magkinabuhi sa bisan unsang paagi, basta gatambong lang sila aron ginasimba siya pinaagi sa ilang denominasyon ug kredo. Aduna gayu’y dakung itum nga mata dinha, ug tan-awa ninyo kana.

Ginakataw-an ang Pulong sa Dios, nagasulti og mga butang nga sukwahi sa Pulong; ug nagapaningkamot, pinaagi sa ilang kahibalo, aron siyentipikanhong pamatud-an nga dili tinuod ang Pulong. Oh, grabe nga kapanahonan nga atong gikapuy-an! Kita n’yo na ang dios sa niini nga kapanahonan?

¹³³ Himatikdi ninyo, nga ginahulat ra sa Dios hangtud nga mapuno na ang pagkadautan sa niining moderno nga mga Amorehanon. Ayaw’g kabalaka, giandam na Niya ang Iyang Moises alang nianang panahona. Magkaaduna og usa ka exodo, sa umaabot nga adlaw, paingon sa yutang saad. Adunay moabot nga usa ka Moises, nga magapanawag og, “ipasig-uli ang Pagtoo sa mga anak balik sa mga amahan.” Moabot gyud kana, usa sa niining mga adlaw. Mamahimong . . .

Moingon kamo, “Bueno, tan-awa lang kung daw sa unsa na ang pag-uswag namo.”

Siyempre, wala pa man mapuno ang kadautan sa mga Amorehanon. Moabot ra kini, usa sa niining mga adlaw. Pasagdi silang pagalaglagon nila ang ilang mga kaugalingon.

¹³⁴ Ang sibilisasyon, kahibalo, ginatuis niini ang Pulong sa Dios aron mouyon sa kaugalingon nilang panilaw. Mao ra sa gihapon ang ginahimo sa matag denominasyon. Ginawali ni Satanas kung ingon-ana ang kaugalingon niyang ebanghelyo sa kahibalo diha sa kaugalingon niyang iglesia.

¹³⁵ Adunay duha lamang ka matang sa mga tawo nga gihisgotan diha sa Bag-ong Tugon. “Ang mga anak sa Dios, ug ang mga anak sa yawa.” Nahibalo ba kamo niana? Gusto n’yo bang isulat ang Kasulatan alang niana? Unang Juan 3:10, kung gusto ninyo ang maong Kasulatan. Ginabasa ko kini dinhi mismo, ako na kining nasulat. Sige. Sige.

¹³⁶ Diha sa Mga Taga-Efeso 2:2, ginatawag sila nga, “Mga anak sa pagkadili-masinulondon.” Sama ni Eva kaniadto, nga masupilon sa Pulong sa Dios. Ang mga anak sa pagkamasinugtanon ug ang mga anak sa pagkadili-masinulondon, wala gayud og bisan unsa man nga pagkaparehas.

Kung ingon niana unsaon man pagpakigkauban sa Pangasaw-onon ni Cristo sa denominasyon, sa dihang masupilon man ang usa ug ang usa usab masinugtanon? Unsaon man sa usa, ingon nga Pulong; ug ang usa usab, tinuis nga pulong? Unsaon man sa usa ka bigaon ug sa usa ka hinlo nga babaye magalakaw nga nagkauyon? Dili nila mahimo kana. Wala gayud sila'y pagpakig-uban man lang. "Panggawas kamo gikan kanila!" Iya kana sa yawa. Marka kana sa mapintas nga mananap. Nagapaingon na sila ngadto niana karon; ang tanang mga denominasyon. Dili ko igsapayan kung kinsa man kini.

Magakuha ang Dios, dili og usa ka denominasyon, kondili "usa ka katawhan alang sa Iyang Ngalan." Ang denominasyon dili man modawat niini nga mga Kamatuoran. Magkinahanglan kini og usa ka tawo nga mahimo niyang makita ang Dios, motan-aw sa Iyang Pulong ug motoo Niini, ug dili nahisakop sa unsa man nga organisasyon; kondili nagakinabuhi alang sa Dios, dili alang sa iyang organisasyon, sa intelektuwal nga kaalam sa kung kinsa nga obispo o sa kung kinsa man nga nagatudlo niini. Husto kana.

¹³⁷ Ang mga anak sa pagkadili-masinulondon, ug ang mga anak sa pagkamasinugtanon, wala gayu'y bisan unsa man nga pagkaparehas. Ang usa . . . mao'y iya sa adlaw sa Kahayag; ang laing usa, mao'y iya sa gabii ug kangitngit, dautan nga kapanahonan, niining dautan nga kapanahonan sa kangitngit, mga nightclub, mga sayawan, apan miyembro sa iglesia. Okey lang kana sa ilang dios. Wala man lang og unsa nga pagbati nga nakasala sila tungod niana; wala sila'y pagkahingawa.

"Aba, wala ma'y pagsaway sa sulod nako nga putlan ang akong buhok," ingon sa usa ka babaye. "Wala man nasakit ang akong konsensiya." Mas aduna pa'y bat-ang ang bitin kay sa aduna siya'y konsensiya. Husto kana. Wala gayud. Wala gani siya kahibalo kung unsa ba ang konsensiya. Migahi na kini og ayo hangtud nga wala na gani siya kahibalo kung unsa gyud kini. Husto kana.

¹³⁸ Ginalibot-libotan lang, ang Pulong sa Dios, moingon, "Aba, sa kaniadto pa kana. Ayaw pag-adto didto; pundok lang kana sa mga kasaba ug kung unsa na lang ang ginabuhay, ayaw gyud." Huh! Wala gyu'y nahibaloan mahitungod sa Dios sama sa usa ka Hottentot nga walay nahibal-an mahitungod sa kabalyerong Egiptohanon. Husto kana. Tinuod kana.

"Adunay dagway sa pagkadiosnon, apan ginapanghimakak ang Gahum niini; likayi kining maong mga tawhana. Kay mao kini ang matang nga magapanaka-saka sa kabalayan, ug magapamihag sa mga mahuyang nga babaye."

"Oh, pinangga, ikaw, *ingon-ani* unta ang kinahanglan mong buhaton. Oh, pinangga, sa tan-aw ko kanang inyong kinaraang magwawali dinha, kung imong lang. . . Oh, mamahimo kang

maanyag sa niining 'kini," o unsa ma'y tawag ninyo niana. "Ikaw, mahimo mo man buhaton ang tanang *ingon niini, ingon niana, ug uban pa*. Aba, wala ma'y bisan usa nga madaut sa diyutay'ng pagpanigarilyo. Miyembro man ako sa iglesia, ug kahibalo ka nga ang among denominasyon mas ginahangad kay sa mga uban dinha." Ayaw ninyo toohi kanang tigulang ug pinintalan nga bakakon. Nagapamakak siya kaninyo. Husto kana. Oo, sir.

¹³⁹ Okey ra kana sa ilang dios. Oh, tan-aw niya gani nga pagkamaanindot niana, ug mao nga gusto kaayo nila siya tungod niana.

Grabe, makiglalis pa gyud sila kanimo. Ila kanang barugan ug makipaglantugi gyud kanimo bahin niana. Aba, oo, mibarug usab si Satanas sa atubangan mismo ni Jesus Cristo, ang Pulong, ug naninguha pa sa pagsulti, "Nahisulat na."

Ug atua Siya didto, ang gipanghimatud-an nga Pulong sa Dios. Miingon Siya, "Pahawa Kanako, Satanas!" Padayon lang og lakaw ug himoa ang mao rang butang.

Sama sa usa ka tawo nga miingon kanako usa ka higayon kaniadto, miingon, "Karon, kung nagatoo ka nga tinuod ang bautismo sa Espiritu Santo, ug nagatoo ka nga aduna ka Niini," ingon pa, "karon himoa akong buta." Usa kadto ka magwawali. Miingon, "himoa akong buta!" Ingon siya, "Si Pablo nagbuta man og usa—usa ka tawo kaniadto."

¹⁴⁰ Ingon ko, "Mister, unsaon ko man sa pagbuta kanimo kon buta ka na? Unsaon ko man sa pagpatay kanimo kon patay ka na?" Uh-huh.

Ingon siya, "Ako, twenty-twenty man ang akong mga mata!"

Ingon ko, "Ang pisikal mo nga bahin; apan buta ka sa gihapon."

"Imposible kana! Wala man naghubad ang Biblia sa ingon-anang mga butang. Ginasulti ra nato ang kung unsay gisulti sa Biblia, ug mohilom kon diin Kini hilom."

¹⁴¹ Miingon ko, "Sige, sa dihang atua kaniadto si Elias sa—sa Dothan, kita mo, miabot ug gipalibotan siya sa tibuk kasundalohan nga mga Sirianhon. Ug midagan ang iyang sulugoon, miingon, 'Oh, amahan ko!' Miingon, 'Amahan ko!' miingon, 'napalibotan na kita sa mga Sirianhon.'"

"Gilugod ni Elias ang iyang mga mata, bag-ohay lang nakamata ug miingon, 'Mas daghan pa ang nagauban kanato kay sa nagauban kanila.'"

"Ingon siya, 'Wala ma'y bisan usa nga akong nakita.'"

"Miingon, 'Dios, ablihi ang iyang mga mata.' Karon, buta siya. Ug milantaw siya sa palibot niadtong tigulang nga propeta, ug ngadto sa mga kabukiran; puno kadto sa mga Manulonda, ug mga caro nga Kalayo, ug mga kabayo nga Kalayo."

“Ug miadto si Elias didto, ug ang Biblia nag-ingon, ‘Gibutahan niya sila.’ Gibutahan ngadto sa unsa? Ngadto kaniya. Mipaduol siya, miingon, ‘Ginapangita ba ninyo si Elias?’”

“Oo, gipangita namo siya.”

“Miingon, ‘Umari kamo, ipakita ko kaninyo kung diin siya.’ Si Elias nga ginaagak sila ngadto ra pud kang Elias. Mga buta!”

Miingon ko, “Kabalo ka ba kung unsay igasulti ko kanimo? Ingon ka eksakto gayud sa kung unsay gisulti sa akong Ginoo ngadto sa imong amahan, ‘pahawa kanako.’” Uh-huh. Uh-huh.

¹⁴² Himatikdi ninyo, ang mga anak sa pagkamasinugtanon, ug sa pagkadili-masinulondon, wala gayu’y bisan unsa nga pagkaparehas. Ginasimba sa mga masupilon ang ilang dios. “Oh,” moingon sila, “nagatoo man kami sa Biblia.” Oo, usa man kini ka sinagol nga punoan. Kita n’yo, ginadugang nila ang kalibutan ug kahibalo ngadto Niini. Ang punoan ni Satanas, sinagol; kita n’yo, mikaon ang babaye gikan sa punoan ni Satanas, maayo ug dautan. “Oh, nagatoo kami sa Pulong.” Oo, apan dili ang kinatibuk-an Niini. Mitoo man usab si Eva sa Pulong, apan gitugotan—gitugotan niya si Satanas nga gamiton ang punoan niini ug tuison Kini og diyutay. Ingon niana kadto.

“Ang kinsa man nga magadugang og usa ka pulong, o magataktak og usa ka Pulong gikan Niini.” Siya ang mao ra sa gihapon kagahapon, karon, ug hangtud sa kahangturan! Himatikdi. Sige.

¹⁴³ Kining dautan nga kapanahonan iya kini sa kangitngit, apan sa gihapon nahisakop sa iglesia. Ang ilang dios, gusto kaayo nila siya tungod kini, kung unsa nga ginapasagdan lang niya sila sa kung unsay gusto nilang buhaton. Wala gyu’y pagbati nga nakasala sila. Wala man lang nahadlok basta miyembro lang sila sa iglesia.

Ingon niana usab ang gitudlo ni Balaam sa iglesia kaniadto. “Maghiusa kita; managsama ra man kitang tanan.” Mao kadto ang kaulahi panglimbong. Wala gayud sila gipasaylo sa Dios tungod sa pag-too sa ingon niadtong bakak.

¹⁴⁴ Hinumdumi, nga usa kadto ka dili-mapasaylong sala, tulo ka higayon sa Biblia, alang sa bisan kinsa man nga magadugang og usa ka pulong nga kaugalingon nilang interpretasyon sa Pulong sa Dios human nga gipanghimatud-an na Kini ingon nga Kamatuoran.

Sa tanaman sa Eden kaniadto, didto mismo, sa tanaman sa Eden, usa ra ka pulong ang gidugang maoy nahimong hinungdan sa kamatayon.

Sa dihang gidugang ni Balaam ang pulong, nga, “Managsama ra man kitang tanan,” sila, wala gayud gipasaylo sa Dios ang Israel tungod niadto. Ang matag usa kanila

nangamatay didto sa kamingawan, gawas lang sa tulo nga gipahigawas sa Dios.

Miingon si Jesus, “Sila, tanan sila, patay gyud,” kana mao’y Walay Katapusan nga pagkahimulag. Nangalaglag silang tanan; wala gayud gipasaylo. Usa kadto ka dili-mapasaylong sala; wala gayud sila gipasaylo. Oh, grabe!

Pahilayo kamo niini, mga anak sa panggabii nga Kahayag!

¹⁴⁵ Makita na ba ninyo karon kung si kinsa kining pangulo niining moderno, relihiyoso, ug dautan nga kapanahonan? Ang yawa, nga ginakuha kanang punoan sa maayo ug dautan, ug ginabutang kini dinha, himatikdi ninyo, ginadala ang maanyag niyang iglesia nga pangasaw-onon ngadto sa ekuminikanhong konseho alang sa usa ka kasal. Maayo kana. Ang iyang maanyag ug siyentipiko nga iglesia, nga aduna kaniya ang tanan nga—nga—nga mga digri nga mahimong maangkon; mga Ph.D gikan sa church of Christ, mga Ph.D gikan sa Baptist, Presbyterian, mga Pentecostal, ug tanan na. Ginatipon silang tanan, uban sa ilang dinayandayanang mga adorno ug dagkung mga iglesia, paingon tanan ngadto sa ekuminikanhong konseho, “Usa ra kita.” Dili gayud sila mapasaylo tungod niini. Ang denominasyon, ang pagdala sa ngalan sa usa ka denominasyon, mao ang marka sa mapintas nga mananap. Human na nato kanang gihisgotan dinhi; ug magpasakop pa kamo niana. Pahilayo kamo niini, mga anak, pahilayo kamo niini! Kita n’yo? Bantugan, ug maanyag nga iglesia nga nasul-oban og ekuminikanhong bisti, ginasul-ob ang iyang marka!

Mga short, oo, kalibutanong binistihan, makihilawason, pinintalan, mga maayo gayud nga tinun-an sa yawa, aron pagadanihon ang mga anak nga lalaki sa Dios; maikasal lang ang usa ka buutang lalaki nga gipadaku nga matarung ngadto sa usa ka dautan nga sama niana. Husto kana. Daw sa unsa . . .

¹⁴⁶ Moingon kamo, “Pagpapatol sa buhok, unsa ma’y kahilambigitan niana?”

Igsoon, mohunong una kita dinhi sa makadiyut. Nabati kong adunay nasuko bahin niana. Tingali’g anaa kana dinha sa mga nakakonekta sa telepono kon diin man.

Paminaw kamo. Ang buhok sa usa ka babaye usa ka pang-Nazareong panaad. Ang buhok alang kang Samson kaniadto usa ka pang-Nazareong panaad. Ug sa dihang ginapapatlan sa babaye ang iyang buhok, bug-os niyang—niyang ginalimod ang iyang pang-Nazareong panaad nga siya’y usa ka Pangasaw-onon alang kang Cristo. Tungod kay, dinha, sa nianang usa ka butang, ginadaut na niya ang tibuok Hulagway. Husto! Ang usa ka *Nazareo* mao’y “usa ka tawong linain alang sa usa ka katuyoan.” Husto ba kana? Si Samson kaniadto linain na alang sa usa ka kapanahonan ug alang sa usa ka katuyoan, busa aduna siya’y hataas nga buhok. Ang usa ka anak nga babaye sa Dios,

ginapataas niya ang iyang buhok, aron ipakita nga usa siya ka linain alang sa Pulong sa Dios.

¹⁴⁷ Kung ginapaputlan niya kini, dili ko igsapayan bisan nagasayaw pa siya sa Espiritu, nagakanta, nagakanta man siya sa choir, nagasulti sa laing mga dila, nagadagan ngadto-nganhi, o miyembro man sa tanang kapunongan nga nagahatag og mga hinabang, patay siya. Kana ang MAO KINI ANG GINAINGON SA GINOO, ang Pulong sa Dios. Unang Mga Taga-Corinto 14. Oo. Gisalikway niya ang iyang Nazareong panaad ug bug-os nang gitugyan ang iyang kaugalingon ngadto sa dios niining moderno nga kapanahonan. Ingon niana ang ginabuhat niya. Karon, makauulaw ka, gining, o babaye!

¹⁴⁸ Nagadani gayud og mga anak nga lalaki sa Dios, sama sa nahitabo kaniadto. Sama sa giingon ni Jesus, “Maingon sa nahitabo kaniadto sa mga adlaw ni Noe, maanyag ang mga kababayan-an, ug ang mga anak nga lalaki sa Dios nakigminyo kanila, mao man usab ang mahitabo sa pagbalik sa Anak sa tawo.” Ug naghunahuna ang ilang dios nga maayo kaayo kini, ug maanyag, ug siyentipiko, kahibalo; mga pamisting nagsunod-sunod sa Hollywood, nga gipang-disenyo diha sa mismo niyang gam-anan, oo, ang tanan niining mga lunang ug ingon-anang mga butang, kahibalo na mo.

¹⁴⁹ Ug siya, ang iyang iglesia, gusto gyud ang ingon niana! Oh, grabe! “Buut kong masabtan mo, usa ako ka Methodist. Usa ako ka Presbyterian. Adunay mas labaw nga kahibalo ang among pastor kay sa mosulti og ingon-anang butang.” Kung ingon niana wala gyud diay siya og igong kahibalo aron nga isulti ang mga butang nga ginasulti sa Dios. Kita n’yo?

¹⁵⁰ Siya, ang maong iglesia, ginasimba gyud niya kini. Gusto niya kaayo kini. Tukma gyud sa kung unsay gusto niya! Dili siya magpasakop sa bisan unsa man, igsoon, o motambong sa bisan unsa man diin kinahanglan niyang maglihok nga lahi kaysa kung unsay ginalihok niining modernong mga Jezabel, tungod kay ingon niana man ang kinaiyahan nga anaa kaniya.

Unsaon man ninyo nga mamahimong lahi nga kinaiyahan . . . “Kinsa ba’y tungod sa pagkabalaka nakadugang og usa ka siko sa iyang gitaa-on?” Kung gipanganak ka nga mahimong lima ka piye ang katas-on, dili ka gyud mamahimong unom ka piye. Oh, oo, sama sa “pampataas nga makinarya” ni Booth-Clibborn.

¹⁵¹ Kung ingon-ana paminaw, lalaki, kamo nga pundok sa mga Ricky! Kung gipanganak kamo ingon nga usa ka lalaki, kung ingon-ana manglihok kamo ingon nga usa ka lalaki. Kanang mga bangs nga nakabuhayhay sa inyong nawong, ug gilukot pa gyud nga abi niya ambongan siya, aba, kamong mga tinuis nga kaliwat sa mga bitin! Unsa ba’y nahitabo kaninyo, naunsa na man mo?

Pagahukman sa akong Dios kining maong nasud sa umaabot nga adlaw pinaagi og kalayo. Ipaunlod Niya kini pailalum sa

dagat. Haduol na ang takna sa Iyang paghukom. Pagahukman gayud ang tibuok kalibutan.

¹⁵² Relihiyosong pagpangtuis! Pagpangtuis sa mga tawo; wala na gani kahibalo ang mga lalaki kung lalaki ba gyud sila, mao usab ang mga kababayen-an. Motindog dinha nga nagasul-ob og usa ka pares sa panglalaki nga overall, o usa ka pares sa mugbong karaang purol, mga saput nga . . . sa iyang matag lihok makita ang porma sa iyang lawas, ug tawgon ang kaugalingon niyang usa ka Cristohanon. Dili gani siya mamahimong usa ka gining, unsa pa kaha tawgon ingon nga usa ka Cristohanon. Usa siya ka bigaon diha sa dalan nga gigamit ni Satanas, dinihogan ni Satanas, aron danihon ang mga anak nga lalaki sa Dios paingon sa impiyerno, aron mamatuman ang Pulong nga gisulti ni Jesus Cristo nga magakahitabo. Dili ko tinuyo nga isulti kana, apan gisulti Niya kana, bisan pa man. Kita n'yo na kung diin nagagikan kining relihiyosong espiritu? Sa sinagol nga punoan.

¹⁵³ Moingon, “Unsa ma’y sayup nianang pagsul-ob og mga karsones,” o kung unsa ba’y tawag nila niana, “mga pedal-pusher?” o kung unsa man kana.

Ang Biblia miingon, nga, “Ang si kinsa man nga babaye nga magsul-ob og usa ka bisti nga iya sa lalaki, usa kini ka dulumtanan sa panan-aw sa Dios.” Kana’y MAO KINI ANG GINAINGON SA BIBLIA.

Ug ang babaye nga magpapatul sa iyang buhok, ginapakaulan niya ang iyang ulo. Ug dili man gani kini . . . Usa ka makasasalang butang alang sa usa ka babaye nga mag-ampo nga mubo ang buhok, mao kana ang giingon sa Biblia, nagaampo atubangan sa publiko nga walay pandong ang iyang ulo. Ug ang iyang . . .

Oh, moingon kamo, “Nagasul-ob man ko og kalo.”

¹⁵⁴ Ikaw nga hipokrito, ginatudloan mo silang mga kababayen-an og ingon-anang mga butang! Sa diha nga, miingon na ang Biblia, “Ang iyang buhok gihatag kaniya ingon nga igpapandong,” dili ang kung unsa nga kalo nga hinimo og tawo. Mao kana ang giingon sa Biblia. Dili ko katungdanan; ang akong katungdanan lamang nga isulti ang Kamatuoran. Dili magmalimbungon, sama sa giingon sa Biblia, “Nga gigamit ang Pulong sa Dios nga may pagpanglimbong,” aron—aron ayo-ayohon o—o aron mapahanugotan ang gusto sa pundok sa mga ricketta.

¹⁵⁵ Ania ang pulong nga *evil* dinhi. Nahisulat ko ang pulong nga “Elvis” imbis nga *evil*. Pareho ra man kana. Ang pulong nga *Elvis* nagkahulogan og usa ka “iring,” ug ang pulong pud nga *Ricky* nagkahulogan og usa ka “ilaga.” Pagmoingon ka nga “gamay’ng Ricky,” ang buut mo ipasabot niana nga, “gamay’ng ilaga.” Kung unsa’y tawag mo kaniya, mao gyud kana kung unsa

siya. Kung ingon niana ang ngalan sa imong anak, usaba kini dayon, alang sa Ebanghelyo. Ayaw hinganli ang usa ka bata . . .

Wala ka gayu'y madungog og ingon-anang mga ngalan sa Biblia kaniadto, o sa uban pa nga kapanahonan. Tungod kana sa niining kapanahonan, mga ngalan kana sa niini nga kapanahonan. Kung aduna ma'y nangahiwi nga mga ilaga ug iring, ania na karon.

¹⁵⁶ Ang tanan niining . . . ? . . . minilyon ka dolyar nga mga disc jockey, ug kining mga bata nga nagalakaw dinha sa gawas, dili gani makaadto sa—sa eskwelahan nga walay nakasuksok diha sa ilang dalunggan, ug anaa ang usa ka gamay'ng radyo nga transistor sulod sa ilang bulsa, nga nagapa, “boom-de-boom.”

Oh, nagtrabaho sila didto sa balay, ug among . . . Gipintalan sa niining mga lalaki ang balay ko kaniadto. Ingon namo, “Ipagawas ninyo kana dinhi. Kung dili kamo makatrabaho nga walay ingon niana, nan ayaw na lang mo dinhi magtrabaho. Ginapanerbiyos kaayo ko niana nga dili ko maagwanta nga anaa kana dinhi. Amo kining gihalad nga dapit sa Dios. Ayaw namo og ingon-anang matang sa walay pulos nga mga boogie-woogie nga iya sa niining kaulahiing mga adlaw dinhing dapita.” Ingon ko, “Palunga kana o ayaw na mo dinhi magtrabaho!”

¹⁵⁷ Himatikdi, mga relihiyoso, kono, oh, sigurado, nagasimba mismo ug motindog mismo dinha sa pultahan, nagapaminaw og boogie-woogie.

¹⁵⁸ Himatikdi, usab, ang Pulong-Pangasaw-onon ni Cristo nagapaingon na sa ulo, usab. Sama sa atong nakita kon diin na nagapadulong ang anticristo, balik kaniadto sa sinugdan ug karon nagapaingon na sa ulo; ang ekumenikanhong konseho ang magpapatwesto niini nga mamahimong ulo pang-iglesia. Ug ang mapaubsanong Iglesia nagapaingon na, usab, ang Pulong-Pangasaw-onon ni Cristo sa tanang mga kapanahonan, nagapaingon na usab sa Ulo, tungod mamahiusa na Siya balik sa Kapikas Niini. Sa kanunay, sama sa iglesia ug sa tanang uban pa, sigurado gyud Kining mahiusa. Ang Trigo, sama sa tanang uban pa, nagabalik gayud sa ulo niini kon diin kini nagsugod; sama ni Cain ug ni Abel. Nagapadulong na ang Pulong-Pangasaw-onon ngadto sa Persona sa Pulong sa Dios nga napadayag sa niining dautan nga kapanahonan nga atong gikinabuhian. Kita n'yo na kon diin na kini nagapadulong?

¹⁵⁹ Ug dili magdugay pagakuhaon na ni Satanas ang iyang intelektuwal nga pangasaw-onon ug igatuboy na niya kining usa nga bantugan, nga mao ang anticristo, ang herarkiya, ug ipalingkod na siya sa usa ka trono, “ug ang tibuok kalibutan manghibulong kaniya.”

Ug dayon moabot si Cristo. Ug dili man mahimong duha ang maghari sa mao rang higayon. Ug pagatangtangan ang gingharian ni Satanas; ug pagalaglagon siya.

Ug si Cristo, ang Pulong sa Dios...Nga, ang babaye kabahin sa lawas sa lalaki. Dili sila duha; usa ra sila. Ug ang Pangasaw-onon, ang Iglesia, ang Pulong, “usa ka katawahan nga gitawag pagawas gikan *dinhi* ug *didto*, alang sa Iyang Ngalan,” mamahiusa na diha sa Lawas ni Jesus Cristo.

Ug ang gingharian sa anticristo pagakuhaon na ug pagalaglagon. Ug si Cristo na ang magahari, ug molingkod sa trono sa Iyang amahan nga si David, ug magahari sa yuta sulod sa usa ka libo ka tuig; dayon igapresentar ang Iglesia ngadto sa Dios, “ingon nga walay buling o ikasaway.” Oo!

¹⁶⁰ Karon himatikdi ang iyang taas nga buhok, ang Nazareong panaad sa Pulong. Igahulagway ko ang Pangasaw-onon ni Cristo karon. Gihulagway na nato ang anticristo, kung diin siya mao’y, relihiyoso ug tanan na, ug siyentipiko. Karon ang mapainubsanong Pangasaw-onon ni Cristo nagatoo lang gayud sa Pulong, bisan kinsa man Siya. Mga indibidwal kini. Nanghinaut ug nagatoo ko nga daghan sa mga nagalingkod dinhi, ug daghan ang mga nagapaminaw karon. Ug nanghinaut ko nga ako, ug ang matag usa kaninyong tanan, kabahin niana nga Pangasaw-onon. Nanghinaut ko nga daghan. Ug, mamahimo nga, ang tanang gitagana nang daan alang niana mamahimo gayud, tungod kay mao man kini ang ilang kinaiyahan. Makita nila. Pagailhon lamang sa Pulong ang Pulong. Dili pagailhon Niini ang denominasyon o usa ka pagpangtuis. Mas nakahibalo Kini; ang Pulong man Kini. Kita n’yo? Dili mahimong ilhon Niini ang unsa man . . .

Ang trigo dili mamahimong unsa man kondili usa ra gyud ka trigo. Misugod kini, nga usa ka trigo; mopaingon pud kini, ingon nga usa ka trigo. Ug ang sagbot dili gayud mamahimong trigo, bisan pa og gibisbisan kini sa mao ra nga pagdihog. Kita n’yo? Ug dili gyud kini trigo. Sama sa gikaingon ko niadtong miaging adlaw, mahitungod sa punoan nga nagkaaduna og nagkalain-laing mga sanga.

¹⁶¹ Ang iyang taas nga buhok, nga pang-Nazareong panaad, nagapakita nga aduna Siya’y gipanaad sa Dios. Iya kining maanindot nga bistida bahin sa gisaad nga Pulong sa Dios alang sa kapanahonan nga Iyang gikinabuhan, nga nakaputos Kaniya, nga ginapanghimatud-an Siya sa Dios Mismo, diha sa Mga Hebreohanon 13:8, “Si Jesus Cristo mao ra sa gihapon kagahapon, karon, ug hangtud sa kahangturan.” Tungod nga, kabahin man Siya sa Pamanhonon nga Pulong, nga matinuuron gayud ngadto sa maong Pamanhonon sa tanan nga anggulo.

¹⁶² Karon tan-awa ninyo. Kung mogawas ang usa ka babaye dinhi ug ingon nga kasal na siya sa usa ka lalaki, ug mogawas siya ug magkari-karinyo sa ubang lalaki ug magpakigrelasyon sa maong lalaki, ug mobalik siya sa iyang bana, angay ra siyang palayason sa iyang bana. Husto ba kana? Kinahanglan nga

magmatinuuron gayud siya sa iyang bana, tungod kay aduna siya'y gipanaad kaniya.

Ug ang Pangasaw-onon ni Cristo nanaad usab kang Cristo; ug Siya mao ang Pulong.

Bisan ang pagpangidhat ngadto sa lain, dili gani puede nga mangidhat ang usa ka babaye sa ubang lalaki. Dili gayud siya magpakita og bisan unsa man nga mga ilhanan, wala gyu'y og bisan unsa man nga pagbati para sa ubang lalaki, tungod kay bug-os siyang usa ka pangasaw-onon ngadto sa usa ka pamanhonon.

¹⁶³ Ayaw namo sa inyong sinagol nga mga punoan, ang inyong mga denominasyon. Magmatinuuron kamo kang Cristo, ang Pulong. Pagapanghimatud-an Niya Kini nga mao ang kamatuoran. Dili, sir, ni unsa man nga pagbati aron magpakigkarinyo kaniya, ni magpasakop sa iyang pundok o sa unsang uban pa, o paguniton man lang sa mga bukton niya o magpa-amuma kaniya, o—o kumbinsihon ka sa *ingon niini*, o *ingon niana*.

Magpatalinghug ka lamang sa usa ka Tingog. “Ang Akong mga karnero nakaila sa Akong Tingog. Sa usa ka dumuloong dili sila . . .” Unsa man ang Iyang Tingog? Ang tingog sa kinsa man nga tawo pulong kini sa tawo. Ug mao Kini, ang Biblia, walay bisan usa ka pulong nga igadugang Niini o pagataktakon gikan Niini. Pagpabilin lang dinha mismo sa niana nga Tingog. “Sa usa ka dumuloong dili sila mosunod,” sa usa ka denominasyon.

¹⁶⁴ Kay, Siya kabahin man sa Pamanhonon, matitud-anon Kaniya sa tanan nga bahin, nga nagahulat sa Kasal. Magapakighiusa, dili sa ekumenikanhong konseho; kondili didto sa kawanangan, sa pang-Kasal nga Panihapon. Gihatagan ang maong Pangasaw-onon . . . Alang kini sa ato mismong iglesia. Ang . . . Gihatag Kaniya, ug gipadayag Kaniya, ang Pito ka-Selyo nga mga tinago sa Biblia. Kita n'yo? Nakita Niya ang kabuang sa maglilimbong, nga haduol kaayo sa Kamatuoran, nga halos mopahisalaag gayud sa mga Pinili. Iya kining nakita. Iyang . . .

¹⁶⁵ Kita n'yo na ang duha ka magkabatok nga espiritu nga nagapanglihok niining dautan nga kapanahonan? Makita ba ninyo kini? Ang matag usa relihiyoso kaayo, si Cain ug si Abel, mga espiritu nga nagapadulong pag-usab sa ilang mga ulo, mao ra sa gihapon kung unsa sila misugod kaniadto. Ang usa, nagasimba pinaagi sa katahum, ug pinaagi sa kahibalo, ug pinaagi sa edukasyon, ug pinaagi sa siyensiya, ug pinaagi sa mga etiko. Ug ang laing Usa, pinaagi sa pagtoo sa kapadayagan sa Pulong sa Dios. Silang duha parehong ania dinhi mismo sa niini nga bilding karong buntaga. Husto kana.

¹⁶⁶ Kapadayagan, o pagtoo, sa Iyang Pulong, walay mga pagpangangkon nga aduna siya’y kahibalo; ingon niana ang tinuod, matuod nga Cristohanon.

Moingon sila, “Aduna ka ba—aduna ka ba og digri sa pagka-doktor?”

Walay ingon-ana nga mga pamahayag. “Ako—ako nagatoo sa Iyang Pulong.” Kita n’yo? Walay bisan unsa man nga mga pagpamahayag. Wala nagapamahayag nga edukado siya. Dili siya sakop sa bisan unsa man nga denominasyon, unsa man nga kapunongan, o unsa man nga sekta. Nahisakop Kini kang Cristo. Mao Kini ang Iyang Asawa; dili nga asawa sa iglesia.

Usa ka bigaon kini nga iglesia. Miingon ang Biblia nga usa siya ka “bigaon,” ug, “ANG INAHAN SA MGA BIGAON,” ug magkahiusa silang tanan ug mamahimong pareho ra nga bigaon. Ug kana nga matang sa babaye mao’y usa ka babaye nga dili-matinuuron sa iyang Bana; ug angkonon nga iyaha konong bana si Cristo, ug unya sakop sa usa ka denominasyon. Binuang kana! Nahisakop kita kang Cristo.

¹⁶⁷ Apan, sa pagkamasinugtanon, kining Babaye sa pagtoo, nga nagakinabuhi pinaagi sa pagtoo, ang Pangasaw-onon; mahimong mao kanang tawo *dinhi, didto*; dinhi, o didto sa kung asa man nga dapit, sa kung asa nga iglesia, sa kung asa nga denominasyon, o unsa man kini, diha sa ubang. . . Nga nagatoo sa Pulong sa Dios, nga masinugtanon, may paghigugma nga nagahulul, alang sa saad sa kapanahonan nga mapamatud-an. Nagapaabot siya niini. Kabahin man siya niana nga Pulong, ug nagapaabot Siya nga maipahayag sa Iyang kinabuhi kana nga Pulong.

Mga igsoon, dili ba ninyo makita kana? Nanghinaut ko nga wala kana milabay lang kaninyo.

Nagahulul ang Lawas (nga mao ang Pulong), nagahulul alang sa Kinabuhi (nga mao ang Espiritu) aron pamatud-an o buhion Kini. Mao kana ang ginahulul sa Pangasaw-onon. Wala na’y laing kinabuhi ang magpulos Kaniya. Dili Siya mabuhi sa uban pang paagi. Bisan pa man, nabati Niya kini, ug nasayod Siya nga mahitabo gyud kini; dayon pagkahitabo niini, nan nakamata Siya. Miingon man ang Dios, “Magkaaduna,” ug mitungha ang Pangasaw-onon sama sa nahaunang usa nga mitungha usab.

¹⁶⁸ “Mga anak sa pagkadili-masinulondon” nagakahulogan ang pagkamasinugtanon. . . Ang *pagkadili-masinulondon* nagakahulogan og “pagsukol.” Gitan-aw ko kana sa diksiyunaryo, aron nga makasigurado. Pagsukol, misukol batok sa (unsa?) sa pinadayag nga Pulong sa Dios. Sama ni Cain nga nagpadayag. . . misukol batok sa nahayag nga kapadayagan ni Abel, nga gipanghimatud-an sa Dios nga matarung kadto. Ug misukol si Cain batok niadto, ug gipatay ang iyang igsoon.

Ang mga Fariseo, uban sa kaugalingon nilang denominasyonhong kahibalo kung unsa ang Pulong sa Dios, hinashasang pinili nga mga kalalaken-an, misukol batok sa gipanghimatud-an nga Pulong sa Dios nga napadayag alang sa ilang panahon, si Jesus Cristo, ug gipatay nila Siya. Husto ba?

Ingon niana kung unsa “ang mga anak sa pagkadilimasinulondon”, usa ka pagsukol batok sa Pulong sa Dios.

Karon kita n’yo na kung hain na sila karon? “Oh, milabay na ang mga adlaw sa milagro. Dili na ingon niana si Jesus Cristo. Wala ma’y ingon nianang bautismo sa Espiritu Santo. Binuang lang kanang ingon-anang mga butang!” Kita n’yo, pagsukol! Dili na nila kinahanglan nga mosulti og duha ka butang; usa lang ka butang, kana lang. Pagsukol na kana, dinha mismo. Dili nila mahimong isulti nga wala kamo’y mga mata, wala kamo’y mga dalunggan; kinahanglan mong dawaton ang tibuok nga lawas, ang tibuok nga Pulong. Kita n’yo?

Nagapanawag ang Balaang Espiritu, “Gumula kamo kaniya, ayaw pag-ambit sa iyang denominasyonhong dogma,” samtang iyang ginakataw-an ug ginatamay ang Pulong sa Dios sa niining adlaw.

“Kay ang Dios dili mabiybiay,” hinumdumi lang ninyo. Pagasilotan gyud siya. Ayaw kamo pagkabalaka. Pagasilotan gyud siya. Ang Biblia, diha sa Mga Taga-Efeso 4:30, kung gusto ninyong isulat kana, Mga Taga-Efeso 4:30, miingon dinha. “Ang Dios dili mabiybiay. Bisan unsa ang ipugas sa tawo, mao usab kana ang iyang pagaanihon.” Dili sila puedeng magbiybiay ug magbugalbugal, ug isulti ang ingon niining mga butang, ug dili sila pagasilotan niini. “Sama sa tinapay ngadto sa katubigan, magabalik kini.”

¹⁶⁹ Siya mao ang pangasaw-onon sa yawa, nga naputos sa iyang relihiyosong, kahibalo nga mahiligugmaon sa sala alang niining dautan nga kapanahonan sa pagkakaran, aron pagalimbongan kamo. Oh, grabe! Usa ka pundok o denominasyon sa malimbongon nga mga espiritu, pinaagi sa siyentipikong kahibalo ug moderno nga sibilisasyon! Nagapamahayag. . .

Magatapos na kita sa pipila na lang ka minuto. Mohunong na ko, tungod kay dili ko na mahuman kining tanan, kita n’yo.

Nagapamahayag nga nagatukod kono siya og usa ka maayo kaayo nga kalibutan aron nga inyong pagapuyan. Ginapamahayag niya, nga, sa iyang sibilisasyon kono, nakatukod siya og maayong mga kasimbahanan, mga kolehiyo, mga eskwelahan, mga ospital, mga libraryo, ug temporaryo nga panabang alang sa tawo, nga wala ang Pulong sa Dios. Nabuhat niya kana. Gipamatud-an niya nga mahimo niya kadtong buhaton. Ug nahulog gayud ang mga tawo niana; oo, sir; mga eskwelahan, mga denominasyon, kultura, mga tawo

nga mas maayo og pangpangbisti, mga tawo nga mas maayo ang ginakaon.

Mas gustohon ko pang nakapila alang sa libreng tinapay, ug mamahimong husto sa Dios; kay sa nagakaon og pritong manok tulo ka beses sa usa ka adlaw, ug nahisakop ra sa usa ka bigaon nga sama niana.

¹⁷⁰ Hinumdumi ninyo, nga haduol na ang takna sa diha nga moabot na ang maong pagmarka. Mahimong mahiapil kamo niana o dili mahiapil niana. Moabot kana nga sama sa usa ka kawatan sa kagabhion. Masakpan kamo niana nga anaa dinha, ug atua pud kamo didto. Wala na gayu’y higayon nga makagawas pa gikan dinha nianang tungora; human na man ninyo kining gidawat. Gumula na kamo!

Usa ka Manulonda ang mikunsad gikan sa Langit, nga nagasidlak ang nawong, ug misinggit Kini ngadto sa mga tawo. Nagpatay-og kadto sa yuta. “Panggawas kamo sa Babilonia, kay kini nagun-ob na. Aron dili kamo makaambit sa iyang mga hampak, katawhan Ko!” Gumula kamo kaniya. Gumula na kamo! Dili ba bag-ohay lang nato kining gibasa sa Pulong, kaganina? Ang *manulonda* usa ka “mensahero,” kita n’yo, nga minaug. Himatikdi ang Balaang Espiritu, “Panggawas kamo kaniya, aron nga dili kamo makaambit.”

¹⁷¹ Karon nagtukod siya niining tanan nga mga butang. Nagtukod siya og dagkung mga kasimbahanan. Nagtukod pud siya og kolehiyo, mga eskwelahan, ginadala ang mga tawo ug gina-edukar sila paingon sa usa—usa ka mas maayo, kono nga, sibilisasyon. Ug gi-edukar nila sila pinaagi sa moderno nga sibilisasyon nga mao ang nagdala kanila ngadto sa gahong sa kamatayon, pinaagi sa kahibalo, palayo sa Dios ug sa Iyang Pulong.

Dili ba ninyo makita ang maong tibuok nga pagpanglimbong? Nakita ba ninyo kini, iglesia? [Nagaingon ang kongregasyon, “Amen.”—Ed.] Kamong anaa dinha sa pagsibya, kung inyo na kining nakita sa mismo ninyong mga kongregasyon dinha, pag-ingon og “amen,” aron mahibaloan sa tanang uban pa kanila kon asa gyud kamo nagabarug. Kita n’yo?

Gihimo niya kini. Siya mao’y. . . usa kini ka dios sa yuta, ug nagtukod siya og mga kolehiyo. Nagtukod siya og mga unibersidad. Nagtukod siya og mga ospital. Nagtukod siya og mga libraryo. Gitukod niya ang tanan niining mga butanga alang sa temporaryo nga panabang sa tawo, igo ra aron malimbongan sila, aron mapasimang sila sa niana nga Pulong. Ug hain man niya sila gidala? Gitambog niya ang tibuok kalibutan sa iglesia ngadto sa kamatayon, kay miingon man ang Dios nga pagasunogon Niya ang maong bigaon, ug ang mga anak niini, pinaagi sa usa ka kalayo nga walay katapusan.

Panggawas na kamo dinha, katawhan! Ayaw gyud mo pagpasapon dinha. Pahilayo mo gikan niana nga butang sa ingon ka agpas nga mahimo ninyo!

Pinaagi sa iyang siyentipikong kahibalo, nahimo niya kini, karon himatikdi, nga wala ang Pulong sa Dios.

¹⁷² Wala kita sukad giordenahan sa Dios nga manglakaw ug mangtukod og mga eskwelahan. Wala gayud Siya nag-ordena. Wala Niya kita giingnan nga magtukod og mga ospital. Maayo man ang mga niini. Wala Niya kita giingnan nga magtukod og mga libraryo. Wala, sir. Wala gayud Niya sukad gisulti kana.

Miingon Siya, “Iwali ninyo ang Maayong Balita.” Ug, ang Maayong Balita, mao ang pagpahayag, pagpadayag sa gahum sa Balaang Espiritu.

Miingon si Pablo, “Miabot kanato ang Maayong Balita, dili sa pulong lamang, kondili usab sa pagpahayag ug mga pagpadayag sa Balaang Espiritu.” Miingon si Pablo, “Wala gayud ako mianhi kaninyo nga dala ang madanihong mga pulong sa kaalam sa kung kinsang doktor sa kung unsa man, kondili mianhi ako kaninyo sa gahum ug pagpadayag sa Balaang Espiritu; aron nga ang inyong pagtoo dili magapanukad sa kaalam o kahibalo sa mga tawo niining kalibutana, kondili diha sa gahum sa pagkabanhaw ni Jesus Cristo; tungod kay Siya buhi, ang mao ra sa gihapon kagahapon, karon ug hangtud sa kahangturan.” Hinaut nga tabangan kita sa Dios nga toohan ang mao mismong butang, ug panghimatud-an sa Dios ang mao ra sa gihapon sama sa ginahimo na Niya kaniadto pa.

¹⁷³ Padayon kamo nga ginababagan sa yawa nga makita ang tinuod nga kapadayagan ug pagtoo sa Pulong sa Dios nga ginapadayag ug ginapanghimatud-an karon, pinaagi sa iyang mga eskwelahan, mga libraryo, literatura, mga ospital, ug uban pa. Kita n’yo? Ginababagan niya kamo. Nagahubad siya karon, sama sa gihimo niya kang Faraon kaniadto, nga nagapaninguhang babagan kamo nga makita ang kahulogan sa maong gipanghimatud-an nga Pulong sa Iyang gisaad nga kapanahonan sa panggabii nga Kahayag, nga gipanghimatud-an ug napamatud-an na. Ginapaningkamotan niya, pinaagi sa iyang kahibalo, ug mga eskwelahan, ug mas edukado nga mga tawo, ug mga etiko, ug uban pa, aron babagan kamo nga makita Kana.

Bisan unsa na lang, aron nga dili kamo motan-aw Niana ug makita nga kana mao si Jesus Cristo! Unsaon man ninyo pagkahibalo nga si Jesus Cristo kana? Siya mao ang Pulong, ug Siya mao ang Pulong niini nga kapanahonan. Ug sa niini nga kapanahonan, gikaingon na nga mahitabo kini sa niini nga kapanahonan, ug ania nagakahitabo na kini. Kita n’yo? Kita n’yo? Nagapaninguha gyud ang yawa kutob sa iyang mahimo nga babagan kamo nga makita Kana.

Butang-butangan niya Kini og bisan unsa na lang nga mahugaw nga ngalan kutob sa iyang mahimo. Kita n'yo? Bansagan niya Kining “mga holy-roller” ug tanang uban pa. Gitawag niya si Jesus kaniadto nga “Beelzebub.” “Ug kung gitawag nilang Beelzebub ang Agalon sa balay, unsa pa kaha ka labaw ang itawag nila sa mga tinun-an?” Kita n'yo?

¹⁷⁴ Kita n'yo, nagapaninguhang babagan kamo nga makita ang tinuod nga kahulogan sa Pulong. Dili ang kung unsa... Kita n'yo, ginahubad niya Kini, nagaingon nga nagakahulogan Kini og *ingon niini*.

Miingon ang Dios, “Nagsaad Ko sa kaulahiing mga adlaw nga igapadala Ko kaninyo si Malaquias 4.” Dili na Kini kinahanglan pa nga hubaron; gihubad na Niya kana. Miingon Siya, “Ug maingon usab sa nahitabo kaniadto sa mga adlaw ni Lot, nga ang kalibutan maanaa sa kahimtang sa Sodoma; ug nianang panahona, igapadayag Ko ang Anak sa tawo pinaagi niini, sa tukma gayud.” Anaa na kanato ang tanan na nga matang sa mga pagsundog-sundog ug tanang uban pa, niini, apan ania kanato kanang Usa nga tinuod, usab. Kita n'yo? Miingon Siya nga buhaton Niya kini.

Miingon Siya nga motungha ang anticristo ug halos ipahisalaag ang mga Pinili kung mahimo pa. Apan miingon, “Pasagdi lang sila. Pasagdi lang sila nga magapadayon. Ang ilang binuang madayag ra.” Ngano man? Ang pag-testing niini diha sa Pulong mao man ang magapamatuod. Kita n'yo?

Pagmoabot na kini sa niana nga Pulong, “Kinahanglan unta nga sa *ingon niini* kana, *ingon niana*? Oh, wala ako nagatoo sa binhi sa serpente. Wala ako nagatoo sa *ingon niini*, *ingon niana*, ug sa *uban pa*.” Wala pa gayud kanila napadayag, kita n'yo, wala pa, wala pa gyud. Oh, igsoon, tan-awa lang ninyo kung hain... .

Kinahanglan na natong tapuson, tungod kay alas dose na.

¹⁷⁵ Himatikdi, nagapaningkamot siya nga babagan kamo nga makita ang kahulogan sa Pulong niini nga kapanahonan, ang panggabii nga Kahayag nga mahubad. Kini'y... Unsa ma'y pasabot niini? Haduol na ang panahon sa exodo, moabot na ang Dios alang sa Iyang Pangasaw-onon, nga ingon ka sigurado gayud. Kita n'yo?

¹⁷⁶ Karon gusto ko nga mangutana kaninyo. Tungod kay, alas dose na karon, lima ka minuto na ang milabay; ug ipapadayon ra nato, unyang gabii. Makita n'yo ba ang dios sa niini nga kapanahonan? [Ang kongregasyon nagaingon, “Amen.”—Ed.] Nagatoo ba kamo niini? [“Amen.”] Makita n'yo ba kung unsa kini, usa ka iglesia, intelektuwal, siyensiya?

Ang tibuok kalibutan nahisakop na niana, kita n'yo, sa mga denominasyon. Ug, moingon ka, “usa ako ka Cristohanon.” “Miyembro ka sa unsa nga denominasyon?” Bueno, kung miyembro man ako sa usa ka denominasyon, dili ko motoo nga

mamahimo na akong Cristohanon. Karon, mabug-at kana nga pagpanulti, apan tinuod kana.

Bag-o pa lang ko nahuman sa pagsulti nga ang kahibalo ug siyensiya, ug ang Cristianismo, dili mahimong magpakig-fellowship. Kay ang usa niini iya sa yawa, ug ang laing usa iya man sa Dios. Ang bisan unsa mang butang nga ginapanghimakak ang Pulong sa Dios, pahilayo kamo niini. Kita n'yo? Dili, sir. Nagatawag ang Biblia, sa niining kaulahiing mga adlaw, alang sa mga Cristohanon nga gumula gikan niana nga bigaon, nga mao ang punoan sa maayo ug dautan.

¹⁷⁷ Oo, aduna man gihapon siya'y kaayo. Aduna ba'y makasulti og dautan bahin sa usa ka ospital? Wala, sir. Sa library? Wala, sir. Sa edukasyon? Wala, sir. Apan, kita n'yo, nagahatag sila og ingon niana sa mga tawo nga wala ang Pulong. Kita n'yo na kung unsa ka malimbongon kini? Hatagan ang mga tawo og usa ka iglesia nga maadtoan, usa ka pagsimba aron makasimba sa, "usa ka dios nga nagalingkod diha sa trono." Gisulti na kini sa Biblia kaniadto.

¹⁷⁸ Karon nahisakop kamo sa usa sa niana nga mga lawas. Adunay duha lang nga ania sa yuta karon, ingon niana na kini kaniadto pa, ug mamahimong ingon niana sa gihapon hangtud sa pag-abot ni Jesus, ug ang usa nianang duha pagalaglagon. Karon nahisakop kamo sa usa sa niana nga mga lawas. Ang usa niana, nagpa-miyembro mo; ug ang laing usa, natawo kamo diha Niini. Kita n'yo?

Ang usa niana, kabahin na kamo tungod kay natawo man kamo diha Niini. Kabahin na gayud kamo Niini. Malimod ba nako nga aduna ako'y bukton? Pareho ra kana nga dili ko malimod ang bisan unsa man nga Pulong sa Dios, kung kabahin gyud ako sa Dios. Kabahin ako ni William Branham; aduna ako'y mga bahin, ug ang matag bahin niini kabahin nako. Ug ang matag Pulong sa Dios kinahanglan nagatakdo gayud sa akong espiritu, kinahanglan nga nagatakdo sa akong kalag, kinahanglan nga nagatakdo sa akong pagkinabuhi, kinahanglan nga nagatakdo Kini sa akong mga panghunahuna. Kung supak man ang mga panghunahuna ko diha Niana, nan wala nagapuyo ang Espiritu sa Dios dinhi kanako. Husto kana. Dili ko gayud mahimong ilimod ang bisan usa ra ka Pulong Niini.

¹⁷⁹ Nahisakop kamo sa usa sa niana nga mga lawas. Mamaingon-ana kana, kinahanglan nga mamaingon-ana gayud. Mahimong Lawas kini sa Dios, nga pinaagi sa Pulong; o kaha sa lawas ni Satanas, pinaagi sa iglesia. Ug ang tibuok kalibutan siguradong nahisakop gayud sa kung unsa mang iglesia; nga ginasimba ang unsa man nga dios. Mahimo nga ang ginasimba ninyo dios sa kahibalo, nagasalig kamo sa kung unsa'y madungog ninyo pinaagi sa kahibalo, nagasalig kamo sa *ingon niini*, o *ingon niana*, o sa *uban pa*; o mahimong nagasalig

kamo sa Pulong sa Dios, pinaagi sa pagtoo, nagapaabot Kaniya nga panghimatud-an Kini ug himoon Kining tinuod.

Ginahulat sa tinuod nga Iglesia ang pag-abot
nianang malipayong adlaw sa Milenyum,
Sa dihang moabot na ang atong
mapanalanginong Ginoo ug ang nagahulat
Niyang Pangasaw-onon pagasakgawon na;
Oh, ang akong kasingkasing napuno sa kalipay
samtang ako nagapamuhat, nagahulat ug
nagaampo,
Kay ang atong Ginoo mobalik na pag-usab sa
yuta.

Oh, ang atong Ginoo mobalik na pag-usab sa
yuta,
Pagagapuson si Satanas sa usa ka libo ka
tuig, ug wala na'y manintal kanato nianang
panahona,
Human nga si Jesus mibalik na pag-usab sa
yuta.

¹⁸⁰ Oh, mga katawhan niining Estados Unidos, kon diin nagapaingon kining maong Mensahe karon, mangalagiw na mo kutob sa inyong mahimo palayo niining kahibalo, siyentipikanhong kapanahonan nga atong gikinabuhian. Pagpangalagiw na kamo paingon sa Pulong sa Dios!

Kamo, Ako, walay si kinsa man nga makahimo—makahimo, sa pagpanghibalo Niini. Walay makapamatuod Niini. Ang Dios lang ang nagahimo sa Kaugalingon Niyang pagpamatuod. Walay si kinsa man ang may katungod nga mohubad Niini; ako, o ang ubang tawo man walay katungod sa paghimo niana. Ang Dios ang nagahimo sa Kaugalingon Niyang paghubad. Nagsaad Siya. Miingon Siya nga pagabuhaton Niya kini sa kaulahiing mga adlaw.

Ug sa kaulahiing mga adlaw pagabutahan sa dios niining dautan nga kapanahonan ang mga mata sa mga tawo, pinaagi sa iyang intelektuwal nga kahibalo, nga usa ka sinagol nga punoan sa maayo ug dautan, nga sa gihapon ginatanyag sa mga tawo. Ug ania na, kana nga butang nga nagapadulong na, kanang denominasyon nga ingon niana na kaniadto pang Mangitngit nga Kapanahonan, ug sa wala pa ang maong Mangitngit nga Kapanahonan, ang tanan niini nagapaingon na ngadto sa usa ka tawong-labawlabaw, si Satanas, nga miingon, “Ituboy ko ang akong kaugalingon sa ibabaw sa mga anak sa Dios, ug magapatalinghug sila kanako.” “Ug siya ingon nga Dios magalingkod sa templo sa Dios, ug dinha mangahulog ang mga anak sa Dios.”

¹⁸¹ Aba, ang anak sa Dios, moingon, “Bueno, ang akong asawa, dili man siya ingon niana; usa siya ka buutan. . .” Sige, pasagdi. Kita n’yo?

Moingon mo, “Bueno, ingon Niya ‘mga anak sa Dios.’” Oo, sir.

Ang lalaki, bisan kinsa pa siya, gibuhat siya diha sa hulagway sa Dios, alang sa himaya sa Dios. Ug ang babaye mao’y binuhat lang gikan sa lalaki alang sa lalaki, dili diretsong gibuhat sa Dios. Husto. “Sa dihang nakita sa mga anak nga lalaki sa Dios ang mga anak nga babaye sa mga tawo nga maanyag, nagkuha sila alang kanila og mga babaye.”

“Ug maingon sa nahitabo kaniadto sa mga adlaw ni Noe, mao man usab ang mahitabo sa pag-abot sa Anak sa tawo.”

Karon tan-awa ninyo, kung gusto ninyong mahibaloan kung unsa na ang kahintang sa iglesia, tan-awa ninyo kung unsa na ang kahintang sa mga kababayan-an, kita n’yo, tungod kay siya mao man ang iglesia. Tan-awa ninyo kung unsay ginabuhat niya, kita n’yo, ug sa niining dautang bigaon nga kapanahonan.

¹⁸² Tan-awa ninyo, wala na’y mas dautan, mas salbahis, mas ubos pa, bigaong siyudad sa kalibutan kaniadto, kay sa Nazaret, ug gikan dinha nagpili ang Dios og usa ka ulay. “Mahimo bang may motungha og unsa man nga maayo gikan sa Nazaret?”

Ug gikan sa niining dautan nga kapanahonan, kon diin gibutahan sa dios sa niining kapanahonan ang mga mata sa mga tawo, tungod sa ilang mga dogma ug mga denominasyon; gikan mismo sa niini nga kapanahonan, nagapili mismo ang Dios og usa ka katawhan alang sa Iyang Ngalan.

Bisan pa ginasalikway ug ginabiyabiya dinhi,
moabot ra ang adlaw nga pagadalhon sa
Ginoo

Ang Iyang mga pinili pasulod na sa ganghaan,
ug bililhon kana kaayo.

Dayon manag-awit ug managsinggit kita, ug
managsayaw,

Pagapahiran sa Cordero ang atong mga luha;
Magkaaduna kita’y malipayong pagpauli sa
usa ka semana,

Sa unang napulo ka libo ka tuig. (Husto kana.)

Katingalahang mga katawhan alang sa Iyang
Ngalan ug sila’y pagatawgon nga Iyang
Pangasaw-onon. (Husto ba kana?)

Bisan pa ginasalikway ug ginabiyabiya,
moabot ang adlaw nga pagadalhon sa Ginoo
Kadtong Iyang mga pinili sulod sa ganghaan
(diha sa pag-exodo) ug kana’y bililhon kaayo
para kanako.

¹⁸³ Nagakatigulang na ako. Ug nagsugod na nga nagakahurot ang akong mga adlaw; ug nagsugod na nga nagakahalap ang akong panan-aw; ug nagsugod na usab nga nagakapalong ang kalayo sa akong kinabuhi. Wala ako mahadlok sa kangitngit. Kay buut ko nga isulti kini, uban ni Pablo, “Naila ko Siya sa gahum sa Iyang pagkabanhaw.” Bisan asa pa man nila ako ilubong, kung malumos man ako sa dagat, o masunog sa usa ka hudno, o pagakaonon man sa leon, pagatawgon Niya ang akong ngalan, ug motubag ako. Amen!

Mag-ampo kita.

¹⁸⁴ Kung aduna man dinhi, o dinha nga anaa sa mga linya sa telepono nga nagapaminaw niini nga Mensahe sa tibuk nasud, dinha sa inyong gagmay'ng mga iglesia ug mga grupo ug mga tigumanan, ug kung hain man kamo nagalingkod, kung aduna ma'y usa, oh, tugoti kong aghaton kamo; tugoti kong magpakilooy kaninyo, ingon nga usa ka ministro sa Maayong Balita; tugoti kong magpakilooy kaninyo, sa Ngalan ni Jesus Cristo; pangalagiw na kamo sa kapungot niining dautan nga kapanahonan! Ayaw ninyo alagari ang dios sa niining dautan nga kapanahonan.

Oh, nasayod kong moingon kamo, “Maayo man kini. Maayo man sila.” Eksakto gayud, usa ka sinagol nga punoan. Dili ninyo mahimong isagol ang kahibalo sa Pulong sa Dios.

Pulong Kini nga angay'ng toohan pinaagi og pagtoo, dili sa kahibalo. Dili ninyo Kini kinahanglan sabton; ginadawat ninyo Kini. Ang ginaingon n'yo nga husto Kini, ug dayon inyo Kining gikinabuhi. Mao lang kana ang ginahangyo Niyang buhaton ninyo.

Kung aduna ma'y sa atong mga kauban nga ania dinhi, dili na nato mahimo ang pagtawag sa altar aron paanhion kamo dinhi, tungod kay wala na'y igong lugar; o dinha sa mga pagsibya, dinha sa mga linya sa telepono, kung aduna ma'y si bisan kinsa dinha nga wala pa makaila Kaniya. Ayaw . . .

¹⁸⁵ Oh, mga kababayen-an, gipangsayaw ko kamo niining buntaga, apan dili kini ako, ginasulti ko lang ang kung unsa'y gisulti sa Pulong. Mugbo nga buhok, pagsul-ob nianang mugbo nga mga bisti, ginabistihan n'yo ang inyong kaugalingon nga makihilawason kon tan-awon, wala ba ninyo mahunahuna nga kanang espiritu nga . . . Mahimong hinlo ka man, igsoong babaye, pinangga, kung hisgotan ang imong lawas, apan diha sa imong kalag dili mo ba makita kung unsa kanang nagakontrolar kanimo?

Mahimo ba sa Dios nga himoong makihilawasong tan-awon ang Iyang anak nga babaye aron limbongan ang mismong anak nga lalaki sa Dios, aron kini mangibog kaniya, ug aron papanubagon silang duha tungod sa pagpanapaw? Mahimo ba Niya kana, igsoong babaye? Ipangutana ninyo kana nga

pangutana sa inyong mga kaugalingon. Dili, bisan pa sa napulo ka milyon ka milya. Ayaw ninyo ibasol kana sa Dios.

¹⁸⁶ Igsoong lalaki, gihatagan ka ba sa maong dios og ingon-anang espiritu niining kalibutana hangtud nga dili na nimo makita nga sayup kana? Gibutahan ba niya og ayo ang imong mga mata, sa mga etiko sa iglesia, denominasyon, kredo, ug uban pa, nga dili nimo makita nga ginapanghimatud-an sa Dios ang Iyang Pulong ug ginatuman Kini? Ang imo bang trabaho, imong agalon, imong asawa, imong mga anak, imong iglesia, o unsa man, ang nagpahimulag kanimo gikan sa Pulong sa Dios, nga mao lamang ang bugtong tinubdan sa Kinabuhi? Pagpahilayo niana, igsoon kong lalaki! Gihigugma ko ikaw, sa diosnong paghigugma. Wala ako'y pinalabi sa bisan kinsa man sa mga igsoon kong lalaki nga labaw pa kanimo, wala gayud. Kung gihimo ko man, gipakita ko na unta nga aduna gyud ko'y tawong pinalabi. Wala ko ginasulti kining mga butanga aron pasukoon kamo. Ginapakita ko, ginasulti kini nga mga butang tungod kay anaa man kini sa Pulong sa Dios. Ug tungod nga usa ako ka alagad sa Dios, ug ang gugma sa Dios anaa sulod sa akong kasingkasing, ginasulti ko kaninyo kining mga butanga aron nga inyong makita ug masabtan. Siguro dili gani ninyo mahibaloan ang mga niini kung wala nako gisulti kaninyo. Mahimo ba ninyong pahilayoan kana karon?

Karon, uban sa mga anaa dinha sa bisan asa mang dapit sa tibuok nasud, iduko nato ang atong mga ulo.

¹⁸⁷ Minahal nga Dios, napahimutang sa atubangan ko karon ang maong mga panyo. Masakiton ang mga tawo; ginapandong ko ang akong mga kamot diha kanila, aron nga Imo silang ayohon.

¹⁸⁸ Ug nagasalig ako, Ginoo, unyang gabii, nga magkaaduna og usa ka dakung panerbisyo, nga maania ang Gahum sa Dios, dagkung mga ilhanan ug mga katingalahan. Sama sa nadungog namo nga mga resulta sa niadtong ulahing pipila ka mga panagtigum, nga makahibulongan gayud, ang nakita nga mga nangahitabo! Ginaampo ko, minahal nga Dios, nga Imo kaming hatagan og doble ka pilo niini unyang gabii. Ginaampo ko kini nga may matitud-anon nga kasingkasing, Ginoo, tungod kay gugma ko kini alang Kanimo ug sa Imong Pulong, ug alang sa niini nga mga tawo. Itugot kini, minahal nga Dios.

¹⁸⁹ Ug kung aduna man sa tibuok nasud, o bisan dinhi karon, nga adunay sakit ug nagaantus, ug kinahanglan na nga mopauli unyang gabii, dili na makaanhi, o kinahanglan nang maatua sa ilang mga simbahan o mga lugar kon diin sila nagakatigum; ako nagaampo nga ayohon Mo sila. Karon, Ginoo, apan ang pinakahalangdon sa tanan nga pagpang-ayo! Kung giayo Mo man ang ilang pisikal nga lawas gikan sa kanser, TB, pulmonya, o unsa man, magkaaduna gyud sila sa gihapon og sakit, sa walay pagduhaduha, kung mabuhi pa sila og dugay-dugay,

kay ang ilang lawas anaa ra man gihapon ilalum sa sala, sa tunglo. Apan itugot nga maangkon gyud nila ang—ang tinuod nga Balaanong kaayohan, ang kaayohan sa kalag, nga mao'y magapahimo kanila nga mahimong usa na ka bag-ong binuhat, nga milabang na gikan sa kamatayon paingon sa Kinabuhi, ug dayon magahulat na sa niining tigulang na nga tabernakulo alang sa katubsanan sa lawas human nga maluwas na ang kalag. Itugot kini, Ginoo.

¹⁹⁰ Hinaut nga palagiwhan nila ang mga denominasyon ug mga kredo. Dios, dinha sa niana nga mga kredo ug mga denominasyon nahimamat ko ang pipila sa pinakamaayo nga mga igsoong lalaki. Ug, Dios, unsaon ko man kini sa pagsulti aron nga makita nila, ug maipakita kanila ang Pulong? Nagapabalaka kini kanako. Apan nasayod ako, usab, nga miingon Ka, “Walay tawong makahimo sa pagduol,” bisan unsa pa siya ka maayo, unsa pa ka buutan, unsa pa ka maaghop, “gawas lamang nga gitawag siya sa Akong Amahan. Ug ang tanan nga gihatag Kanako sa Akong Amahan, magaduol sila.” Ug, Ginoo, nabati ko ang akong bugtong responsibilidad sa pagsulti sa Kamatuoran.

Ug dili nga mahisama sa giingon ni Pablo, “Gigamit ang Pulong sa Dios nga may pagpanglimbong,” nga may denominasyonhong dogma nga gisagol Niini, sama sa usa ka sinagol nga punoan sa maayo ug kahibalo, sa maayo ug dautan; kondili adunay usa ka abli nga kasingkasing ug Balaang Espiritu. Itugot kini, Dios. Luwasa ang matag usa.

¹⁹¹ Karon samtang nagaduko ang atong mga ulo ug nakapiyong ang atong mga mata. Ug dili para kanako. . . Dili ako makasulti niana, “Walay sapayan kini alang kanako kung buhaton man ninyo kana o dili.” Aduna gayud kana'y epekto kanako. Gihigugma ko kamo. Ug nagalaum ako nga dili ninyo hunahunaon nga tungod kay kinahanglan kong magsulti nga mabagison. . . Sama sa giingon ni Pablo, “Buut kong maanaa diha uban kaninyo, ug usbon ko ang akong kinaiya.” Dili tungod kay dili niya sila gusto; gihigugma man niya sila. Dili nga. . . Sama gikinahanglan ni Jesus nga badlongon sila, ug dayon namatay alang kanila. Kita n'yo, “Amahan, pasayloa sila, wala man lang sila nasayod sa ilang ginabuhat.” Ang hunahunaon, nga adunay usa ka tawo nga gustong mamahimong matarung, ug nagapaningkamot nga mamahimong matarung, ug dayon makita kana nga yawa. . . Mao kana ang butang nga dili ko ginauyonan, nga mabutahan ang mga mata sa niini nga mga tawo.

¹⁹² Kini nga nasud angay unta nga magadilaab diha sa himaya sa Dios, nga makita kung unsa na'y nagakahitabo sa nasud niining kaulahiing adlaw, niining pinaka-ulahi. Nganong wala ma'y ingon niini nga mga rebaybal ang nagakahitabo sa banwahanong mga lugar? Kining maong West Coast dinhi, ang pinakalayo nga kasadpan nga maadtoan ninyo. Karon

nagadahunog na paubos ilalum sa yuta ang kahilabihan sa sala, ug nagakaunlod na siya; kining mga lugara, ug ang Los Angeles ug Hollywood, nagakaunlod og pipila ka pulgada matag oras, wala na gayu'y paagi nga mapungngan pa kini. Oo, ania na kita. Sa matag oras halos madungog na gyud nato ang mga pagtawag. Kung nakahibalo na mo nga . . .

Karon, ayaw pagtan-aw kang bisan kinsa. Pero kung nasayod mo, diha sa inyong kasingkasing. . . nagahangyo ako kaninyo. Dili ko mahimong hibaloon ang inyong kasingkasing, gawas kung ipadayag kini sa Dios. Apan gikan sa inyong kasingkasing, kung nakita ninyo nga wala kamo sa kahimtang nga angay'ng maanaa unta kamo diha sa Dios ug sa Iyang Pulong, sa pagtoo, mahimo bang ipataas n'yo lang diha Kaniya ang inyong kamot, ingna Siya, "Ginoo, tabangan Mo ako." Oh Dios! Dinhi niining iglesia, nga puno, puno bisan diha sa mga bungbong, sa sulod ug sa gawas, literal nga gatusan ka mga kamot, tingali'g mga duha ka gatus ka mga kamot ang gipataas. Salamat sa inyong pagkamatinuuron.

¹⁹³ Minahal nga Jesus, ayaw itugot nga adunay usa kanila ang mawala. Ingon nga Imong alagad, nga nagatindog tali sa mga buhi ug sa mga patay, ginatudlo ko sila, gamit kining tudlo, ngadto sa Pulong sa Dios. Dili ako makaluwas kanila, Ginoo, apan gusto gayud nilang maluwas. Ug, Amahan, sama sa ginaingon ko sa makadaghan na nga higayon, nga sa pagsubang sa adlaw sa kabuntagon; ug sa diha nga nagasidlak kini sa tibuok yuta, gipadala kini sa Dios aron pagpahinog sa mga lugas, alang sa paghimo og natural nga pagkaon aron nga mabuhi sa natural. Apan, Oh Dios, miingon Ka, "Kanila nga may kahadlok sa Iyang Ngalan ang Adlaw sa pagkamatarung mosubang nga adunay kaayohan diha sa Iyang mga pako." Itugot nga ang Adlaw sa pagkamatarung, ang Pulong sa Dios, mosubang sulod sa mga kasingkasing sa mga tawo, ug pagaayohon sa mga silaw sa kaayohan sa pagtoo sa niana nga Pulong ang matag masupilon sa Pulong, ug dalhon sila ngadto sa kahupnganan ingon nga mga anak nga lalaki ug mga anak nga babaye sa Dios.

Imoha man sila, Ginoo. Sa Ngalan ni Jesus Cristo, sa mga ania dinhi ug sa mga anaa usab diha sa mga pagsibya, ginapresentar ko sila nga nagapataas sa ilang mga kamot Kanimo alang sa kaluwasan sa ilang mga kalag. Amen.

There my raptured soul shall find (Hain man?
Sa niini nga altar.)

Rest beyond . . . (pinaagi sa pagtoo nagatan-aw
ako didto kon diin ako magapadulong)

Near the cross, (dinha ginabayaw ang
Pulong) . . . the cross,
Be my glory ever;

Till my raptured soul shall find
Rest beyond the river.

Jesus, keep me. . . (Ang, malansang sa krus
kauban Niya, nga wala na og unsa man nga
mga tinguha pa sa kalibutan. “Ipapabilin
akong gilansang sa krus.”)

There’s a precious fountain,
It’s free to all, a healing stream,
Flows from Calvary’s fountain.

In the cross, in the cross,
Be my glory (ipataas nato ang atong mga
kamot) ever;
Till my raptured soul shall find
Rest beyond the river.

¹⁹⁴ [Nagpakig-istorya si Igsoong Branham karon sa mga magtutugtog—Ed.] “I can hear my Saviour calling.”

Itunol nato ang atong mga kamot ug magpakiglamano, ug moingon, “Panalanginan ka sa Dios, Cristohanon.”

[Nagpakig-istorya pag-usab si Igsoong Branham sa mga magtutugtog—Ed.] “I can hear my Saviour calling.”

Nabati ba ninyo ang Iyang Presensiya? [Ang kongregasyon nagaingon, “Amen.”—Ed.]

Dinha nga anaa sa mga telepono, maglamanohay kamong tanan sa usa’g usa dinha, ug moingon, “Panalanginan ka sa Dios, Cristohanon.”

¹⁹⁵ Kabalo mo, dinha dapit dunay bautismohan. Nagakuha Siya og usa ka katawhan nga magadala sa Iyang Ngalan. Kung wala pa kamo nabautismohan sa Ngalan ni Jesus Cristo alang sa kapasayloan sa inyong mga sala, adunay bautismohan dinhi, adunay mga ilisan, adunay tawo usab nga nagatindog dinha nga andam nang magbautismo. Ginaabi-abi kamo, kung tinud-anay gyud ninyong ginadawat si Jesus ingon nga inyong Manluluwas ug toohan nga mao kana ang Kamatuoran.

¹⁹⁶ Hinumdumi, wala gayu’y usa ka tawo kaniadto sa Biblia, o sa unsa mang panahon nga wala pa naorganisa ang Katolikong iglesia, nga nabautismohan sukad-sukad sa unsa mang paagi gawas sa Ngalan ni Jesus Cristo. Walay dapit nga mahikaplagan sa Kasulatan, o sa kasaysayan, nga adunay si bisan kinsa nga nabautismohan, sa Iglesia sa buhi nga Dios, sa ngalan sa maong mga titulo nga “Amahan, Anak, Espiritu Santo.” Usa kini ka Katoliko nga dogma, ug nga wala gitudlo sa Biblia.

¹⁹⁷ Sa nagpakighinabi kanako ang usa ka pari kaniadto, gipangutana ko siya bahin niana. Ingon siya, “Mao kana ang kamatuoran. Apan kami man ang iglesia; mahimo namong usbon ang bisan unsa man nga gusto namo. Anaa na sa iglesia ang maong seremonya. Ang Dios anaa sa Iyang iglesia.”

¹⁹⁸ Ingon ko, “Ang Dios anaa sa Iyang Pulong. Ug kung ang iglesia . . .” Ingon ko, “Ang Dios mao ang Pulong. Ug kung ang iglesia nagasukwahi sa Pulong, nan dili ko toohan ang maong iglesia.”

Para kanako bakak ang pulong sa matag tawo, pari man kini, papa, bisan unsa pa man siya, ug ang Pulong sa Dios lang ang tinuod.

Ug giaghat kaniadto ni Pablo ang tanang tawo, bisan unsa pa ang pagbautismo kaniya, kung wala siya nabautismohan sa Ngalan ni Jesus Cristo, giaghat niyang magduol ug magpabautismo pag-usab.

¹⁹⁹ Ug pagkahuman nga aduna na’y nakadawat sa Espiritu Santo, miingon si Pedro, “Mahimo ba nato ang pagsalanta sa tubig, sa pagkakita nga ang mga niini nanagpakadawat na sa Espiritu Santo,” Mga Buhat 10:49, “sa pagkakita nga ang mga niini nanagpakadawat na sa Espiritu Santo sama sa atong gihimo sa . . .” Ug gimandoan niya sila, “Sa dili pa kamo mobiya niining lugar, bisan pa nga nadawat na ninyo ang Espiritu Santo, umari kamo ug magpabautismo sa Ngalan ni Jesus Cristo.”

Kay, gihatag man kaniadto kang Pedro ang yawi sa Ginharian, nga nagaingon, “Bisan unsa’y imong pagabugkason sa yuta, pagabugkason Ko kini sa Langit.” Ug unsa man ang ginahimo sa usa ka yawi? Ginaablihan niini ang usa ka butang, ang misteryo.

²⁰⁰ Ug sa diha nga miingon si Jesus kaniadto, “Umadto kamo, bautismohi sila sa Ngalan sa Amahan, Anak, Espiritu Santo,” gibutang kana dinha aron pagabutahan ang dili-magtotoo.

Tan-awa! Nganong wala man kadto gituman ni Pedro, letra por letra? Ingon niadto unta ang gihimo niya.

Kung nabautismohan ang usa ka tawo sa mga titulo nga, “Amahan, Anak, Espiritu Santo,” wala man lang siya nabautismohan; wala man kana’y Ngalan. Ang *Amahan* dili kana ngalan, ang *Anak* dili kana ngalan, ug ang *Espiritu Santo* dili usab kana ngalan. Ang Espiritu Santo mao’y kung unsa Kini; sama sa, tawo. Kini maoy Espiritu Santo.

Ang *Amahan* usa ra ka titulo; usa ako ka amahan. Ang *Anak* usa ra ka titulo; usa ako ka anak. Ang *Tawo* usa ra ka titulo; mao kana’y kung unsa ako. Apan ang akong ngalan mao si William Branham.

Ug ang Ngalan sa Amahan, Anak, Espiritu Santo mao ang Ngalan nga “Jesus Cristo.” Miingon si Jesus, “Mianhi Ako sa Ngalan sa Akong Amahan.” Unsa man ang Ngalan sa Amahan? Ang si kinsa man nga anak nagaabot sa ngalan sa iyang amahan. Ug ang Ngalan sa Amahan mao si Jesus Cristo. Kita n’yo? Kita n’yo na ang buut kong ipasabot?

²⁰¹ Kung sultihan ko kamo nga moadto ug magkuha og usa ka butang para kanako gikan sa estante, sa ngalan sa mayor sa siyudad. Pila man ang nakaila dinhi kung kinsa ang mayor niining siyudad? Ang buutan kong higala, nga si Rich Vissing. Bueno, dili man mo moadto didto ug moingon “sa ngalan sa mayor sa siyudad.” Moingon kamo, “Sa ngalan ni Richard Vissing.” Kamong mga katawhan nga taga dinhi sa Jeffersonville nakaila kung si kinsa siya.

Ug mao kana’y hinungdan nga miingon Siya, “Amahan, Anak, ug Espiritu Santo.” Diha Kaniya nagapuyo ang pagka-Dios, diha sa pagkalawas ang bug-os kinatibuk-an sa Pagka-Dios. Miingon Siya, “Bautismohi sila sa Ngalan sa Amahan, Anak, Espiritu Santo.”

²⁰² Nagatindog si Pedro didto dala ang kapadayagan nga sa ibabaw niini gitukod ni Jesus ang Iglesia, kung si Kinsa Siya, miingon si Pedro, “Paghinulsol kamo, ang matag usa kaninyo, ug magpabautismo sa Ngalan ni Jesus Cristo.” Ug wala gayud . . . Ang mga yawi miliso sa Langit ug sa yuta. “Wala na’y uban nga Ngalan sa silong sa Langit nga gihatag sa mga tawo nga pinaagi niini mamaluwas kamo.”

²⁰³ Nganong nagapamautismo man kamo sa Ngalan ni Jesus Cristo? Alang sa kapasayloan sa mga sala. “Kinsa ganing mga sala ang inyong pasayloon, diha kanila kini pagapasayloon.” Kita n’yo? Apan kung sa hunahuna n’yo nga dili siya takus ug dili angay nga pagabautismohan, ayaw ninyo buhata kana. Tungod kay, paggibuhat ninyo kana, mao na gyud kana, kita n’yo. Nakuha ba ninyo kung unsa’y buut kong ipasabot?

I can hear my Sav- . . . (ang Pulong) calling,
(nagapanawag didto sa lubnganan)

I can . . . (“Mahimo ka bang mamatay uban
Kanakano, aron nga mobangon ka uban
Kanakano?”) . . . -iour calling,

I can hear my Saviour calling, (unsa ma’y
igasulti sa kalibutan?)

“Take thy cross, and follow, follow . . .”

Karon, kung wala pa ninyo nahimo:

Where He (Siya mao ang Pulong) leads me I . . .

(anaa ang bautismohanahan dinha)

Where He leads me I will follow,

Where He leads me I will follow,

I’ll go with Him, with Him all the way.

Iduko nato ang atong ulo.

²⁰⁴ Minahal nga Dios, andam na ang bautismohanahan. Karon magpakigsulti Ka sa mga kasingkasing, Ginoo. Hinaut nga madungog nila si Cristo, ang Pulong, nga nagapanawag kanila, ug bug-os nga mouban na Kaniya.

“Mouban ako Kaniya diha sa tanaman. Mouban ako Kaniya sa bautismohan. Pagadalhon ko ang Iyang Ngalan. Gusto ko nga mahimong usa sa mga tawo nga ginatawag Niya alang sa Iyang Ngalan. Pagatooan ko ang Iyang Pulong. Magasunod ako. Dili na ko magpakighugoy-hugoy sa kalibutan. Magmatinuuron na ko, nga kaslonon nga Pangasaw-onon. Dili gyud ako mosimang sa bisan usa ka tipik sa Iyang Pulong. Sa matag hangyo, magmatinud-anon ako nga, tinuod nga Pangasaw-onon. Ang tanan Niyang ginahangyo kanako nga buhaton, pagabuhaton ko.

“Kung gusto sa umaabot kong Bana nga pataason ko ang akong buhok, buhaton ko. Kung gusto Niyang tangtangan ko ang tanan niini nga meyk-ap, buhaton ko. Kung gusto Niya. . . Moingon Siya kanako nga dautang espiritu kini, ang maong dautan nga akong ginasunod, tungod niining mahilas nga mga binistihan; buhaton ko, dili na nako kini pangsul-obon pa. Dili ko igsapayan kung unsa ma’y isulti ni kinsa man, dili na gyud nako kini pangsul-obon pa.

“Gusto Niya nga mogawas ako sa niana nga pundok nga akong ginaapilan, nga mga dili-magtotoo, pagabuhaton ko; bisan pa og mangabudlay ko aron makakaon, o bisan unsa pa man. Gisaad Niya nga dili Niya ako pagabiyaan ni pasagdan man. Akong—Akong pagabuhaton gayud. Mouban ako Kaniya nga bug-os gayud. Gusto Niya nga mabautismohan ako sa Iyang Ngalan, buhaton ko.”

Ginoo, gisaad Mo kini sa Imong Pulong dinhi, mao kana’y Imong gusto. Hinaut nga makita kini sa matag tawo, Ginoo, ug nga may pagkamalolot, mapainubsanon nga magasunod Niini. Sa Ngalan ni Jesus nagaampo ako. Amen.

²⁰⁵ Iya na kamo sa Dios. Hinaut nga pagakuhaon sa Dios ang maong kabus og binugto-bugto nga mga pulong ug himoon kining tinuod diha kaninyo, mao’y akong kinasingkasing nga pag-ampo.

Pagaandamon na ang bautismohan. Si kinsa man nga gustong moduol, ilaha nang. . . Ipahibalo ra kana sa ministro pagkataudtaud. Ang si kinsa man nga naghinulsol na ug gustong magpabautismo, gamit ang Ngalan ni Jesus Cristo, duol lang kamo dinhi mismo. Andam na ang tanan. “Andam na ang tanan.” Ang tanan nga mahimo namo sa pagtabang kaninyo aron magkinabuhi kamo alang sa Dios, ania kami aron buhaton kana. Panalanganan kamo sa Dios.

²⁰⁶ Karon manindog kita. Karon ang hamubo nato nga awit, *I Love Him*. “Gihigugma ko Siya tungod kay una Siyang nahigugma kanako.” Ato kining kantahon, ang tanan karon.

I love Him, . . .

Itaas nato ang atong mga kamot samtang ginakanta nato kini.

. . . I love Him
 Because He first loved me
 And purchased my salvation
 On Calvary's tree.

Samtang nagaduko ang atong mga ulo ug kasingkasing karon, ato kining laylayon diha Kaniya. [Si Igsoong Branham nagsugod na sa paglaylay og *I Love Him*—Ed.]

I love Him.

[Si Igsoong Branham padayon nga nagalaylay og *I Love Him*—Ed.]

Oh Dios, nga among Amahan, magmaluloy-on Ka kanamo nga makaluluoy'ng mga binuhat, Ginoo. Lig-ona kami alang sa bulohaton nga anaa sa umalabot. Tabangi ako, Oh Dios, tabangi ako! Nabati ko nga adunay butang nga napahimutang dinhi mismo, Amahan. Tabangi ako, Oh Dios, nga mahibaloan ang Kamatuoran. Panalangini kini nga mga tawo, minahal nga Dios. Pangunahi sila, ako nagaampo, sa Ngalan ni Jesus.

²⁰⁷ Karon samtang ginaduko nato ang atong mga ulo, hangyoon ko ang pastor nato dinhi, si Igsoong Neville, ang bililhon nato nga igsoon, nga mosaka dinhi karon ug isulti kung unsa'y iyang isulti, mahitungod sa kung. . . mahitungod sa pagbautismo. Tingali'g ipahibalo ko kana. Siguro abli na ang bautismohan, dinha.



ANG DIOS SA NIINING DAUTAN NGA KAPANAHONAN CEB65-0801M
(The God Of This Evil Age)

Kining Mensahe ni Igsoong William Marrion Branham, una giwali sa Ingles niadtong Dominggo sa buntag, Agosto 1, 1965, didto sa Branham Tabernacle sa Jeffersonville, Indiana, U.S.A., gibalhin gikan sa magnetikong teyp rekording ug gipatik nga walay nakulang sa Ingles. Kining Cebuanong hubad pinatikan na ug gipang-apodapod sa Voice of God Recordings.

CEBUANO

©2017 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Pahibalo Bahin Sa Katungod Sa Pagmantala

Ang tanang katungod sa pagmantala iyaha lamang sa tag-iya. Kining basahona mahimong i-print sa printer sa balay alang sa personal nga gamit o sa pagpang-apod-apod, nga walay-bayad, ingon nga usa ka instrumento sa pagpakaylap sa Ebanghelyo ni Jesus Cristo. Kining basahona dili mahimong ibaligya, kopyahon nga pang-dinaghan, i-post sa website, i-store sa usa ka retrieval system, ihubad sa ubang pinulongan, o gamiton sa pagpangayo og mga amot nga walay ginapagawas nga kasulatan nga pagpahanugot gikan sa Voice Of God Recordings®.

Alang sa dugang nga mga kasayuran o alang sa uban pa nga ginapang-apod-apod nga mga materyales, mahimong kontakon ang:

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org